

lated.

March 439

RELATION

DE CE QVI S'EST PASSE' ¹⁶²⁸

EN LA

NOVVELLE FRANCE

EN L'ANNE'E 1638.

Enuoyée au

R. PERE PROVINCIAL

de la Compagnie de Iesvs en

la Prouince de France.

*Par le P. PAVLE LE IEVNE de la mesme Compagnie,
Superieur de la Residence de Kébec.*



A PARIS,

Chez SEBASTIEN CRAMOISY, Imprimeur
ordinaire du Roy, rue saint Jacques,
aux Cicognes.

M. DC. XXXVIII.

AVEC PRIVILEGE DV ROY.






TABLE DES CHAPITRES

contenus en ce Liure.

R	RELATION de ce qui s'est passé en la Nouvelle France en l'année 1638. page 1.	
	Chapitre I. Des moyens que nous te- nous pour publier & amplifier la foy parmy les Sauvages.	2
	Chap. II. Du Baptesme d'un Sauvage, & de quel- ques-uns de sa famille.	55
	Chap. III. De quelques autres Sauvages baptisez.	15
	Chapitre IV. D'autres personnes adultes baptizées solemnellement.	20
	Chap. V. De la Conuerſion & du Baptesme d'un ieune homme, & de quelques autres Sauvages.	25
	Chap. VI. Des grandes diſpoſitions d'une Catechu- mene Algonquin.	35
	Chap. VII. De quelques Sauvages errans deuenus ſedentaires.	41
	Chap. VIII. De l'eſtat preſent des Sauvages touchant la Foy.	49
	Chap. IX. Du Seminaire des Hurons.	55
	Chap. X. Continuation du Seminaire.	60
	Chap. XI. Ramas de diuerſes choſes.	69

Relation de ce qui s'est passé dans le Pays des
Hurons en l'année 1637. & 1638. 1

Chap. I. Des persecutions que nous auons souffert en
l'année 1637. 3

Chap. II. Assemblée generale de tout le pays où on
delibere de nostre mort. 14

Chap. III. Assistance particuliere de Dieu sur nous
dans nostre persecution. 23

Chap. IV. Des Hurons baptisés cette année 1638.
31

Chap. V. La Conuerſion de Ioseph Chixatenbua, na-
tif de ce bourg d'Oſſoſane. 35

Chap. VI. La conduite de Dieu sur nostre nouveau
Chrestien. 40

Chap. VII. Iour de ſainct Ioseph ſolemnel dans les
Hurons pour quelques circonſtances. 47

Chap. VIII. Nostre employ pendant tout l'hyuer
quand ces peuples ſont plus ſedentaires. 52

Chap. IX. La reſidence de ſainct Ioseph à Ihonatiria.
60

Chap. X. Bref Iournal des choſes qui n'ont peu entrer
dans les Chapitres precedents. 63



RELATION

DE CE QVI S'EST PASSE' EN LA
NOVVELLE FRANCE
EN L'ANNE'E 1638.



ON REVEREND PERE,

Puis que nous ne pouuons auoir de treue pour la Relation de ce qui se passe en ce nouveau monde, & qu'il en faut encor payer le tribut cette année, ie me comporteray enuers ceux qui la souhaitent, comme on fait enuers des estomacs desia rassasiés, auxquels on ne presente que peu de choses, & encor bien delicates, de peur de les débaucher. On est desia si remply des façons de faire de nos Sauvages, & de nos petits trauaux en leur endroit, que i'apprehende le degoust; c'est pourquoy ie diray peu de beaucoup, omettant des chapitres entiers, de peur d'estre accusé de longueur.

C H A P I T R E I.

Des moyens que nous tenons pour publier & amplifier la Foy parmy les Sauvages.

LA superstition, l'erreur, la barbarie, & en suite le peché, sont icy comme dans leur empire, nous nous seruons de quatre grandes machines pour les renuerser; Premièrement nous faisons des courses pour aller attaquer l'ennemy sur ses terres par ses propres armes, c'est à dire, par la cognoissance des langues Montagnese, Algonquine, & Hurone. Quand les portes nous seront ouuertes dans d'autres nations encor plus esloignées, nous y entrerons si Dieu nous preste secours. Or ie diray en passant sur ce poinct, que plusieurs n'attendoient rien des vieilles souches Sauvages. Toute l'esperance n'estoit que dans la ieunesse; mais l'experience nous apprend qu'il n'y a bois si sec que Dieu ne fasse reuerdir, quand il luy plaist. Nous commençons à voir dans les Hurons & parmy nos Montagners & Algonquins, quelques familles professer publiquement la Foy, & frequenter les Sacremens avec vne deuotion & modestie qui n'a rien de Sauvage que l'habit. Cette basse estime qu'on auoit de nos pauvres Sauvages errans, se doit changer en des actions de grace & de benediction, comme nous verrons cy apres.

Secondement comme ces peuples sont atta-

qués de grandes maladies, nous procurons qu'on leur dresse vn hospital. On y traualle maintenant fort & ferme, selon que le pais le peut permettre, Madame la Duchesse d'Aiguillon qui a jetté les fondemens de ce grand ouurage, peut dès cette année goûster les fruiets de ses liberalités. Car les hommes qui trauallent icy pour son dessein, rendent cét hyuer quelque assistance à de pauvres Sauvages delaisés, Dieu les toucha tellement, qu'en verité ie souhaitteroie vne semblable mort à celle qu'il a donnée à deux de ces Barbares, deuenus enfans de Dieu dans le sang de Iesus-Christ.

En troisieme lieu, nous nous efforçons de commencer des Seminaires de Hurons, d'Algonquins, & de Montagnets. Nous en auons maintenant de ces trois sortes à Kebec, i'en diray deux mots cy après.

En quatrieme lieu, nous tachons d'arrester les Sauvages errans. Ie confesse qu'il faut des chaines d'or pour ce dessein, mais leurs ames sont plus precieuses que l'or & que les perles, c'est bien gagner au chāge que de les prendre à cet appas. Vne personne de grande vertu a commencé de leur tendre ce piege. Ayant gagé quelques hommes pour ayder ces pauvres Barbares à se bastir, & à cultiuer la terre. Il a pris du premier coup à cette diuine attrappe deux familles, composées d'environ vingt personnes; ie me trompe, il en a pris dauantage: car bien qu'on n'ait encor logé que ces deux familles, il y en a beaucoup d'autres gagnées par ce miracle de charité. C'est vne benediction de voir ces pauvres Sauvages deuenus enfans de Dieu, les vns en effet par le saint Baptême,

4 *Relation de la Nouv. France,*

les autres par desir & par bonne volonté, nous en parlerons plus amplement en son lieu.

Voyla les quatre batteries qui détruiront l'empire de Sathan, & qui arboreront le drapeau de Iesus-Christ en ces quartiers. Ce sont les mains & les cœurs de quelques personnes cheries de Dieu qui font ioïir ces machines par leurs bien-faits & par leurs prieres. Les Chapitres suiuaus leur vont donner sujet de croire que leurs oraisons sont agreables à Dieu, puis qu'il se plaist à les exaucer & par consequent ie les coniuire de nous cōtinuer ce grand secours. Je confesse ingenuëment ma pu-sillanimité, ie ne m'attendois pas le reste de mes iours de voir de si puissans effets de la grace en des ames si barbares. Iulques icy quelque Sauuages approuuoient le Baptême en leurs enfans, & en leurs malades: maintenant ceux qui sont en santé, & qui demeurent vne partie de l'année proche de nos habitations, l'honorent & le pourchassent avec affection pour eux-mesmes. Ce changement a esté si soudain & si sensible, que ceux qui n'esperoient quasi rien de ces peuples errans, ont esté contrains de confesser que le Dieu du Ciel estoit aussi bien le Dieu des Barbares, que le Dieu des François. Je ne parle point des Sauuages de Tadoussac; ce sont les moins disposez de tous, mais de ceux qui se retirent ordinairement à Kebec, ou aux trois Riuieres. Nous en auons baptisé plus de cēt-cinquāte cette année, sans compter ceux qui ont esté faits Chrestiens aux Hurons. Je ne rapporteray pas tout ce qui s'est passé de remarquable en ces Baptêmes. i'en diray peu, & ce peu r'assemblé, approchera peut-estre plus pres de la lo-gueur que ie ne desirerois. Entrons en discours.

en l'année 1638.

CHAPITRE II.

*Du Baptisme d'un Sauvage, & de quelques
uns de sa famille.*

I'Escriuy l'an passé les entretiens que nous auions eu avec vne escoiade de Montagnets & d'Algonquins qui s'estoient campés proche de nous pendant l'hyuer, pource que la graine de l'E-uangile ne germa pas si tost que quelques vns attendoient, cela leur fit dire que c'estoit peine perdue de prescher des Sauvages, veu mesme que celui qui tranchoit du Capitaine parmy eux, nommé Maxheavichtichiou, n'auoit pas correspondu à l'esperance qu'on auoit eu de luy : C'est chose estrange, qu'on voudroit en vn moment introduire le Christianisme dans l'infidelité, la politesse dans la Barbarie, & il a fallu des siècles pour établir nostre creance dans l'Europe parmy des nations sedentaires & policées ! Or ie puis dire que cette graine sacrée qu'on ietta cet hyuer dans leurs cœurs, a rapporté au centuple.

Premieremēt ce Capitaine Makheabichtichiou n'est point dans le desespoir de son salut, ie croy qu'il a la foy, quoy qu'il en soit, de la charité, il y a bien de la difference entre croire, & obeir à Dieu. Nous estant venu voir ce Printemps, il n'osoit entrer dans nostre maison, ie le tançay vertement, il m'escouta patiemment, puis il me repliqua : Si tu sçauois le regret qui me rōge le cœur, tu me porterois compassion au lieu de me tancer, ie pensois que tu m'interrogerois sur la creance, que tu m'as

6 *Relation de la Nouu. France,*

enseignée, iet'en eusse rendu bonne raison, car i'ay prié Dieu tout cet hyuer, & au lieu de me monstrier bon visage, tu me reçois avec des reproches? Tu me dis que i'ay tousiours plusieurs femmes? pense-tu qu'on se defasse si aisément de ses vieilles habitudes? peut-estre que vous autres aués eu autant de peine que nous de quitter vos anciennes coustumes, quand on a commencé de vous annoncer la Foy? Prescris moy laquelle tu desire que ie retienne de mes femmes, & ie chasseray les autres. En vn mot, il est dans vne bonne disposition, ie n'en parleray neantmoins qu'en passant, iusques à ce que ie le voie Chrestien, si Dieu luy en fait la grace.

En second lieu, le sorcier nommé Pigarouich, avec lequel nous auions eu quelques prises, comme ie l'ay escry en la Relation precedente, a brulé toutes les vtenfilles de son art, & iamais plus ne s'en est voulu mesler depuis, quoy qu'on l'en ait sollicité plusieurs fois en cachette, & par de grands presens, s'estant fait plainement instruire, il a fait des merueilles pour la Foy, mais pource qu'il a terny ce lustre par quelques actiōs de proptitudes, que nous ne pouuons supporter en vn Catechumene, ie n'en diray pas dauantage, encor bien qu'il nous soit venu depuis peu tesmoigner ses regrets iusques aux larmes; s'il continuë fortémēt à frapper, on lui ouurira les portes de l'Eglise.

En troisieme lieu, la maladie s'estant iettée sur ces pauvres peuples, tous ceux qui auoient assisté aux instructions que nous leur donasmes, se trouuans saisis de certe epidimie, se sont fait catechiser plus amplement, & pas vn d'eux n'est mort

sans Baptême, s'il a peu auoir accès à quelqu'un de nos Peres.

Mais en fin, celuy dōt ie vay parler estoit de cette escoliade, il fut touché viuement dès lors, quoy qu'il n'en ait rien fait paroistre que cette année, ce feu qui brusloit son ame ne luy donnant aucun repos, il nous vint trouuer, & nous dit que dès les premières instructions que nous donnâmes aux Sauuages, sō cœur auoit creu tout ce que nous disions de la grandeur de Dieu, & que pour cela il enuoioit ses enfans au Catechisme, leur recommandant d'escouter attētiuemēt ce qu'on leur enseignoit: Je n'osois pas, faisoit-il, vous aborder, ny ne scauois cōment vous declarer les pensées de mon ame, ie souhaittois que vous m'appellassiés. En fin Negabamat (c'est le nō d'un Sauuage, son amy) me parlant du dessein que vous auies de nous aider à deuenir sedentaires, ie luy dis que ie desirois estre de la partie, non tant pour le secours temporel que vous promettiés, que pour vous entreprendre parler du salut de nostre ame. Il me semble, disoit-il, que i'ay eu dès ma ieunesse quelque petite cognoissance des choses que vous enseignés, ie pensois ainsi à part moy, il y en a vn qui a tout fait, de qui nous dependons, qui nous a donné la vie, & nous fait trouuer de quoy la soustenir, & celuy là haït les meschans. I'auois desir de le cognoistre, c'est pourquoy ie me suis beaucoup resioüy quād ie vous en ay oüy parler. En fin il nous promit de venir passer l'hier aupres de nous pour estre plus particulieremēt instruit. A peine estoit-il Catechumene, que Dieu le mit dans de fortes espreunes: il auoit vne belle & grosse famille, la

8 *Relation de la Nouu. France,*

maladie se iette là dedās, & en liure vne bōne partie à la mort: vne femme âgée sa parente, qui gou- uernoit son mesnage, est enleuée en peu de iours: sa propre femme & deux de ses enfans meurent deuant ses yeux, quelques vns de ses parens & al- liez demeurans avec luy, sont emportez en mesme temps, il se cōsoloit sur leurs Baptesmes, car il n'y en eut pas vn qui ne prit à sa mort vne nouuelle naissance en I. C. Apres les auoir quasi tous ense- uelis de ses propres mains, luy-mesme est terrassé, le voila dans la mesme contagion que les autres: & pour surcroist d'affliction, son fils aîné le croiāt mort, se marie contre sa volonté; c'estoit pour ac- cabler l'esprit d'un Geāt, & pour resueiller les pē- sées que plusieurs Sauvages auoient eu; que vou- loir estre Chrestien, c'estoit vouloir partir de ce monde. Mais Dieu qui tient le fond de l'Ocean en repos durāt la furie des vents, calma son cœur dās ces tempestes. Ce pauvre hōme se iette entre nos bras, qui ne luy estoient que trop ouuerts. Mr le Cheualier de Montmagny, nostre Gouverneur, voiant la bonté de ce Sauvage, n'espargne rien de tout ce qui luy pouuoit donner quelque soulage- ment: il luy enuoye & perdrix & volailles, & au- tres oiseaux qu'on gardoit pour sa table, ou plutōt pour les malades; il n'espargne ny les cōfitures, ny le trauail, ny la boutique de son Medecin & Chi- rurgiē tout ensemble. Veritablemēt ce grād cœur est louable de n'auoir rien pour soy, que les cœurs & l'amour de tous ceux qui sont sous son gouuer- nement, il n'y a famille Françoise qui ne se ressen- te de ses bontez dans son affliction. Au bout du cōte, nostre Catech. alloit toujours s'affoiblissant,

en l'année 1638.

9

en sorte que se voyant à deux doigts de la mort, il fit venir le reste de ses enfans, & leur dit: Mes enfans, croyez en Dieu, imitez en ce point vostre Pere. Je croy en luy avec autant d'assurance que si ie le voyois de mes yeux, ne l'offencez point, & il vous aidera. Je suis desia mort, quand mon corps sera en terre. demeurez aupres des Peres, & leur obeïssiez. Je serois trop long de rapporter tout ce qu'il leur dit. Il tira les larmes des yeux de ceux qui l'entendoient. Les ayant fait retirer, il nous pressa de luy accorder le S. Baptême. Hastez-vous, nous disoit il, ie me meurs, ie suis pressé d'aller au Ciel. Quelquefois pensant estre seul, nous l'escoutions d'un lieu voisin, faisant ses prieres à Dieu avec vne tendresse & vne deuotion toute plaine de confiance. En fin le iour de la feste du glorieux Saint François Xavier, Mr le Gouverneur, Mr le Cheualier de l'Isle, & M. Gand estans presens, nous le fîmes Chrestien. M. de l'Isle le nomma François Xavier. Il tesmoigna tant de cœur & tât de satisfaction de cette faueur, que ces Messieurs s'en retournerent tous consolez. A huit iours de là, M. le Gouverneur & M. de l'Isle m'estans venus prendre pour l'aller visiter dans vne petite Cabane où il s'estoit retiré pour mourir en paix & sans bruit, il nous declara avec vne simplicité toute naïfue vne grande communication qu'il auoit eu avec Dieu. Hier sur le soir, me disoit-il, pensant en Dieu, ie me suis veu entouré d'une grande lumiere, i'ay veu les beautez du Ciel, dont tu nous parles; i'ay veu la maison de ce grand Capitaine qui a tout fait. I'estois dans vn plaisir qui

10 *Relation de la nouvelle France,*

ne se peut exprimer. Cecy disparoissant tout à coup, ie rabaisse mes yeux vers la terre, & vis vn gouffre épouventable qui m'a transi de peur. Il me semble qu'on me dit, ne va pas là, ie n'auois garde de m'en approcher; car ie tremblois comme la feüille sur l'arbre poussée du vent. Cét horreur s'euanouissant aussi bien que la beauté & la lumiere qui m'auoit enuironné, ie suis demeuré tout esperdu, avec vn desir de croire & d'obeyr à Dieu toute ma vie, assure nostre Capitaine que voila, que ie croy du profond du cœur. Or ie puis assurer V. R. que nous auons fait nostre possible pour descouurir si ce n'estoit point vne fourbe ou vn songe. Nous l'auons sondé plusieurs fois & en diuers temps; iusques là que le croiant auoir l'ame sur les leures, nous le fimes souuenir de cette vision, le menaçant d'un rigoureux chastiment s'il mentoit en chose de telle importance. Ce pauvre homme espouventé, s'efforça de se leuer en son seant, & nous dit d'un ceil constant; ie vous assure en toute verité que la chose est comme ie vous l'ay descrite. Je ne vous ay pas menty à la vie, ie ne vous mentiray pas à la mort. A cela que peut-on dire autre chose sinon que le Dieu du Paradis respand ses benedictions aussi bien sur les Barbares, que sur les Grecs. M. le Gouverneur & M. de l'Isle le retournans encore voir vne autre fois avec le sieur Marfolet, qui entend fort bien la langue des Sauvages, furent si satisfaits, que le sieur Marfolet m'assura puis apres qu'il luy auoit pensé tirer les larmes des yeux, luy demandant s'il n'auoit point besoin d'aucune chose qui fust en son pouuoir.

en l'année 1638.

11

Non, repart-il, sinon que tu prie Dieu pour moy tous les iours & tous les matins : Combien de fois s'adressant à Dieu, luy a-il dit, vous estes mon Seigneur & mon maistre, ordonnez de ma vie & de ma mort, ie souhaitte la mort pour vous voir, & ie voudrois viure pour le bien de mes enfans. Sa famille l'affligeant, il disoit. Que tout le monde me quitte, ie ne vous quitteray pas. Estrené Barbare & parler en ces termes, c'est publier les bontez du Dieu des Scythes, & des Chrestiens.

Sa maladie tirant en longueur. Car il fut plus de trois mois, tantost dans vn peu de vie, maintenant quasi dans la mort, il appelloit ceux qui restoient de sa famille, & leur donnoit des conseils admirables. En fin on fit tant de prieres pour luy, nos Peres s'adressans à Dieu par quelques vœux & par quelques mortifications, qu'au mesme temps qu'on l'auoit abandonné, & qu'on luy donnoit comme à vn mort tout ce qu'il desiroit, Dieu luy renuoye sa santé, le voila sorty du tombeau avec l'estonnement des François & des Sauvages. Il s'en va chercher sa prouision de chair d'Eslan dans les bois, il part en Mars apres tous les Sauvages, & reuiet en Aueil, & cependant il en rapporte plus que six autres ensemble. Au retour il est accueilly d'vne tempeste dans les glaces, il a recours à Dieu, fait prier sa famille, il sort du peril qui l'alloit engloutir, & qui abyfma l'vn de ses canots chargé de viande. Comme il vit que quelques-vns de ses gens ne prioient pas de bon cœur, il leur dit, voicy que nous abordons la maison des François, où on a promis de me

loger. Je ne veux personne avec moy qui ne croye en Dieu. Si quelqu'un de vous autres n'a le cœur ferme, qu'il prenne sa part de nostre provision, & qu'il se retire ailleurs. Il auoit deux femmes auant son baptisme, la plus forte & la plus ieune mourut Chrestienne. L'autre qui n'a guiere d'esprit se monstroït froide en la foy. C'est à celle-là qu'il parloit tacitement & à sa sœur; celle-cy respondit tout haut, qu'elle croïoit desia dans son cœur; En effet elle fût baptizée peu de iours apres. Pour la femme, voyant qu'elle se rengé vn petit, il ne l'a pas voulu repudier, quoy qu'elle ne le soulage quasi point en son mesnage. Nostre nouveau Chrestien professant hautement la foy, & publiant par tout que Dieu luy auoit rendu la santé du corps & de l'ame, desira de s'approcher de la Sainte Table, il s'y prepara avec vne grande pureté, il fit vne bonne Confession depuis son Baptisme, ieusna la veille du Saint Sacrement, iour destiné pour sa premiere communion. Monsieur nostre Gouverneur nous parla de luy donner l'vn des bastons du Poële, sous lequel on portoit le Saint Sacrement, en prenant vn luy-mesme par vne humilité vraymēt genereuse. C'estoit vn spectacle agreable au Ciel & à la terre, de voir ce Neophite couuert d'vne modestie vrayment Chrestienne sous vne belle robe de Sauvage, porter le dais à la procession avec la premiere personne du pays. Les Mousquetades & les canons venant à bruire & à tonner, les Autels & reposoirs estant bien parez, donnoient ie ne sçay quelle deuotion que nostre nouveau soldat goustoit avec vne douceur in-

croyable. En fin il receut celuy qui le venoit d'honorer publiquement, ne se pouuant faouler de le benir. Il dit par apres à l'un de nos Peres, Je ne me soucie plus des choses de la terre; Il importe peu que ie sois pauvre ou riche, sain ou malade, puis-que le Ciel m'est ouuert, & que mon vray Capitaine m'est venu visiter. Quand vous me chasseriez, quand vostre Gouverneur me rebuterait, quand vous sortiriez tous de nostre pais, ie ne quitterois iamais Dieu. Quel changement! cét homme qui a mangé plusieurs fois la chair de ses ennemis, reçoit maintenant I E S U S- C H R I S T. avec un cœur plein de deuotion! le confesse avec vne candeur toute naïfue! bref, il est dans l'exercice de la Religion, se comportant en vray Chrestien. Dieu luy face la grace de perseverer iusques à sa mort. Disons deux mots de ses enfans, il auoit trois garçons & trois filles; Dieu prit l'un de ses garçons dans la contagion, & l'une de ses filles dotée d'une grace non commune aux Sauvages. Pour marque que la foy estoit dedans son cœur, voyant un Pere de nostre Compagnie qui la visitoit à la mort, elle s'escria en resuant, car elle auoit vne violente fièvre. Ah mon Pere! ie m'en vay dans les feux, ie suis damnée. Cela fit voir que la crainte estoit dans son ame, le Pere luy parlant de Dieu elle reuint à foy, se rassura, & mourut dans l'innocence de son Baptême.

Sa sœur iumelle née à mesme iour, & quasi dans les mesmes perfections naturelles, se presentant aux saintes Ceremonies du Baptême, Monsieur nostre Gouverneur la voyant si gentille, voulut estre son parrain: & ayant appris que no-

stre grande Reine iettoit par fois quelques regards vers le Ciel pour le salut de nos pauvres Barbares, qu'elle auoit mesme souhaitté qu'on esleuast quelque ieune fille Sauvage en la Foy en sa consideration, il luy fit porter son nom, l'appellant Anne. Cette nouuelle plante croist tous les iours en la foy, frequentant les Sacremens à l'imitation de son pere: Il arriua certain iour que celuy qui la deuoit entendre de confession, l'instruisant auparavant, & luy recommandant la candeur, elle le regarda comme estonnée, & luy dit; Ne m'auez-vous pas enseigné que c'est à Dieu à qui on declare ses pechez en la presence du Prestre! le moyen donc de luy mentir, & de luy cacher quelque chose, puis qu'il sçait tout?

Entre cestrois enfans baptisez, l'un des Peres que V. R. nous a enuoyés cette année, mettant pied à terre, a receu à mesme temps en l'Eglise de Dieu le plus petit fils de nostre Neophyte: reste en core à baptizer son fils aîné, & vne autre fille plus ieune, que Dieu benira s'il luy plaist en son temps.

Cette femme qui gouvernoit sa famille se disposant au Baptesme, vit entrer la nuit en sa petite Cabane vn animal gros cōme vn Ours. Croyāt que ce fust vn demon, elle eust recours à Dieu, & cette beste ou fantosme disparut, le lendemain elle fut receuë dans l'Eglise militante, & peu de temps apres dans la triomphante.

CHAPITRE III.

De quelques autres Sauvages baptisés.

VN ieune Sauvage se voyant malade, demanda le Baptême avec instance, mais comme on le tenoit dans les épreuves; Ne voyés-vous pas, nous fit-il, qu'on me va mener à la mort? car mes parens me trainans apres eux dans les bois, ne manqueront iamais pour se deliurer de la peine que ie leur donneray de m'assommer, ou de m'abandonner seul dans ces grandes forests. Oüy, mais si tu gueris, luy dit on, perseuereras-tu dans la foy que tu professe maintenant? comme il est d'un naturel violent & assez orgueilleux, nous craignons en luy l'Apostasie; Ne me parlés pas de guerison, respond-il, ie vous demande le Baptême comme vn homme qui s'en va à la mort. Là dessus il se leue en son seant, prie qu'on le face Chrestien; sa demande accomplie, on le voulut faire recoucher, car il estoit debile, attendés, dit-il, que i'aye vn petit remercié Dieu du grand present que ie viens de recevoir. Apres son Baptême il fust traîné en mille endroits, on ne l'assomma pas, mais on le fit bien souffrir; il fut quelquefois delaisé tout seul au coin d'un bois avec vn peu de viures qu'on mettoit aupres de luy. Iamais ie ne vy homme tant endurer, ie ne croy pas que Iob fust plus pauvre; car il n'auoit plus

que la peau colée sur ses os, & vne meschante escorce d'arbre qui luy seruoit de liét, de robe, & de maison, il s'escrioit par fois, ie hay mon corps, ie ne crains point la mort, puis en pinçant sa peau toute noire & affreuse à voir, ce n'est pas cette pourriture que j'aime, c'est le Ciel où mon ame doit aller. Les Sauvages s'en voulans deffaire firent courre vn bruit qu'il estoit deuenu loup garou, & qu'il vouloit manger tous ceux qui l'approchoient; comme nous eusmes appris toutes ces belles nouvelles, nous le fismes apporter, & le secourusmes si bien, que cette carcasse reprit corps, ce mort resuscita; & ce pauvre muet delia si bien sa langue, que c'est vn plaisir de l'entendre maintenant benir Dieu; il presche ses gens, leur reproche leurs vices & leur ingratitude avec vne liberté qui nous console, & le bon est qu'il s'accuse le premier tout publiquement, d'auoir autrefois commis les pechez qu'il reprend en eux: il conçoit si bien nos mysteres, que ie ne croy pas que beaucoup de vieux Chrestiens procedent plus sincerement & plus nettement au Sacrement de Penitence que ce Neophyte.

Vn autre plus ieune que luy fut aussi delaisé dans sa maladie, le Sauvage qui l'abandonna vint trouuer vn de nos Peres, & luy dit, Vas-t'en trouuer vn ieune garçon que j'ay laissé en tel endroit, pource que ie m'en vay à la chasse dans les bois, & ie ne le scaurois traifner apres moy; Cela dit, mon homme s'en va sans autre ceremonie. Nous prismes ce pauvre enfant desia fait Chrestien par le Baptisme, nous luy rendons toute l'assistance possible l'espace de plus de trois mois qu'il fust en nostre

nostre petite maison; Dieu le voulut appeller à foy, il se confessa & receut le Sacrement de l'Extreme Onction. Un peu deuant sa mort, il nous demanda qui estoient ceux qu'il auoit oüy chanter fort mélodieusement toute la nuit, ce qui l'auoit recreé au possible, il pensoit que nous les auions entendu, comme il disoit cela; il se monstra estonné, & nous dit, Ne voyez-vous pas ces gens là fort épouuentables qui me regardent d'un mauuais œil? on le rassura aussi-tost. Le soir dont il mourut la nuit, il appella fort un de nos Peres, qui accourut incontinent; mais on ne pût sçauoir ce qu'il vouloit dire, il s'escrioit seulement. Le Pere le sçaura, le Pere le sçaura; quelque temps apres il rendit son ame bien heureuse à nostre Seigneur.

J'ay parlé dans les Relations precedentes d'un certain surnommé des François, le grand Oliuier, lequel fit baptiser il y a deux ans sa fille, & puis apres sa femme, se promettant bien de mourir Chrestien aussi bien que les autres: Ce bõ-heur luy est arriué non sans vne faueur particuliere de Dieu, car il estoit fort superstitieux, & ne manquoit pas d'esprit pour deffendre ces niaiseries; Il se méloit de deuiner. Or soit que le diable se communiquast à luy par leur fremissement de mamelle, soit qu'il le rencontrast quelquefois par hazard, iel'ay veu asseurer qu'une certaine nouuelle qu'on attendoit arriueroit le lendemain matin, & cela fut trouué veritable. Estant tombé malade, il nous fit appeller, nous y allasmes trois de compagnie; Ce bon homme desia conuaincu sur ses superstitions, nous dit: Ah mes chers amis

vous me faites plaisir, ie n'ay plus de parolles qu'autant qu'il en faut pour vous tesmoigner que ie croy en Dieu; que ie renonce à nos badineries pour embrasser la Foy que vous m'avez enseignée. Là dessus il se voulut mettre à genoux, mais il n'eut pas assez de force, on luy conféra le premier Sacrement de grace, & tout sur l'heure il passa dans la gloire.

Nous verrons quelques exemples bien plus notable que celuy que ie vay deduire, comme il ne faut point desesperer de la bonté de Dieu; nonobstant la barbarie des Sauvages. Vn de nos Peres abordant vne ieune fille malade pour la disposer au Baptisme, cette pauvre creature l'apperceuant, luy dit; fors d'icy, ie ne te veux pas voir. Le Pere faisant semblant de ne la pas entendre, luy dit, ma fille, ie voudrois bien sçauoir où est ta plus grande douleur, pour y apporter quelque remede. La malade incitée par l'esprit malin, se tourne de l'autre costé toute en colere, ce que sa sœur qui la gardoit ayant apperceu, dit au Pere; n'entends-tu pas qu'elle te dit que tu t'en aille, & que tu luy romps la teste. Les deux Peres qui estoient là, recognoissant la tentation du diable, ont recours à Dieu, & le demon s'enfuit. Ma fille, dit l'un de ses Peres, nous te voudrions donner vn bon conseil, & tu le mesprise; quoy donc, sortirons-nous sans que tu nous parle? à ces parolles elle se tourne la face, & s'escrie: Ah mon Pere, ie me meurs! ie n'en puis plus, c'est fait de ma vie! Non ma fille, vous ne mourez pas tout à fait, luy dit le Pere, si vous croiez en Dieu; car vostre ame iouïra d'un plaisir eternal. Je croy respond-

elle, ie croy, ie suis marrie de l'auoir offensé. On l'interroge sur les principaux articles de nostre creance, comme elle auoit assisté au Cathechisme, elle répondit, fort bien: On luy demanda si elle voudroit bien receuoir le S. Baptisme, elle répondit, non de paroles, mais par effet; car encore qu'elle fust aux abois de la mort, elle se souleue doucement, met vn plat d'écorce sous sa teste, faisant signe qu'on versast dessus ces eaux sanctifiantes pour guerir les playes de son ame, on luy obeyt, on la fait Chrestienne; & à mesme temps citoyenne du Paradis; Car en rabbaissant son corps vers la terre, son ame s'enuola dans les Cieux. C'est vne sainte pensée de mediter par fois quels sont les estonnemens & les saintes épouuentes, pour ainsi dire, qu'a l'ame d'un Sauvage, passant en vn moment de l'extremité de la barbarie, & de la bassesse dans le sein de la gloire. Quelle action de grace ne fait-elle point à ceux qui luy ont procuré cette grandeur, quelle benediction du Ciel ne demande elle point à Dieu pour ceux qui n'ont point épargné les biens de la terre, afin qu'on luy appliquast le sang de IESVS-CHRIST. Passons outre; i'ay peur d'estre long.

CHAPITTE IV.

*D'autres personnes adultes baptizées
solemnellement.*

LE seminaire des Hurons nous a donné cette année deux ieunes hommes, aussi constans en la Foy, que leur nation est variable & changeante. Je n'ay pas connoissance du futur, mais ie sçay bien que le sejour qu'ils ont fait parmy nous, les a fait iuger tres-disposez pour receuoir le caractere du Chrestien. Mr le Cheualier de Montmagny en nomma vn Armand Iean, du nom de Monseigneur le Cardinal, iugeant qu'il estoit à propos qu'un Prince de l'Eglise qui fauorise cette Eglise naissante, en recueillit les premiers fruits. Son compagnon est celuy qui se sauua l'an passé des mains des Hiroquois par vne espece de miracle. Monsieur Gand & Mademoiselle de Repantigny, ses parain & maraine, l'appellerent Ioseph, au nom de Messieurs de la Nouvelle France. Le Chapitte du Seminaire des Hurons nous fera voir les bonnes dispositions & les vertus de ces deux ieunes hommes vrayment touchez de Dieu. I'ay parlé dans les Relations precedentes d'une ieune fille donnée à vne famille Françoisse pour deux ans, à condition que cetemps expiré, elle se pourroit retirer aupres de ses parens, si elle en auoit la volonté; Le terme approchant, son pere la pressa fort de le suiure:

elle fit la sourde oreille. Il enuoye vn ieune homme pour luy parler de mariage : Et afin de gagner plus fortement son amitié, & la diuertir des François, il luy fait present de brasselets & de pendans d'oreille, & d'un colier de pourcelaine, ce sont les perles & les diamans du pays. Cette bonne Cathecumeneagée de 12 à 14 ans, répondit en fuyant, laissa là ses presens, & celuy qui les offroit sans luy dire vn seul mot. Ayans donc reconnu sa constance, nous la disposâmes au Baptême. Le diable s'y voulut opposer, car elle fut saisie d'une espee d'obsession si violente, qu'en vn moment elle tournoit la teste avec vne deformité fort horrible, son estomac s'esleuoit demesurement : On la voyoit toute épouuencée sans pouuoir dire autre parole, sinon ; i'ay peur, i'ay peur. Cecy luy arriua par trois fois, & tousiours en des temps que pas vn de nous ne pouuoit estre appelé pour la voir en cet estat. On pressa fort de luy faire prendre quelque medecine, pour luy purger le cerueau, disoit-on. Nous en auions la volonté, mais l'oubly nous faisoit incontinent. Le Baptême la deuoit guerir ; car depuis que les eaux sacrées l'eurent faite enfant de Dieu, iamais plus le diable ne luy donna cette épouuente ; Elle fut appelée Magdelaine de S. Ioseph. J'espere qu'une ame chérie de Dieu luy trouuera son mariage.

Le sorcier Pigarouch, avec lequel nous eufmes tant de prises l'an passé, comme i'ay desia dit, a instruit & fait baptizer sa femme, & trois de ses enfans à la mort. Vn sien frere se rendant opiniastre, & se mocquant des feux d'Enfer, il le pres-

22 *Relation de la Nouu. France,*

sa si fortement qu'il le fléchit. Comment, luy faisoit-il, tu crois que ton ame n'aura aucune connoissance apres ta mort? Est-ce toy qui l'a créé pour en parler avec cette opiniastreté? Tu mets toute ton assurance en tes apprehensions remplies d'erreur, & moy qui croy en Dieu, ie m'appuye sur sa parole; c'est luy qui a tiré les ames du neant, & par consequent qui en peut parler avec toute verité. La raison t'apprend que celuy qui t'a donné l'estre en demande quelque reconnoissance sur peine de chastiment. Il fit si bien, que ce bon homme se rendit, & fut nommé Chrysostome.

Ayans baptisé vne bonne femme dans vne grosse maladie, en sorte qu'elle répondoit avec vne entiere connoissance à toutes les demandes qu'on luy fit, sans que iamais elle parut extranguée, arrive qu'elle retourne en santé, nous luy demandasmes si elle se souuenoit bien du nom qu'on luy auoit donné. Non, dit-elle, ie ne sçay pas seulement si on m'a baptisée. Mais ne te souuiens-tu pas, luy dismes nous, des réponses que tu nous a faites touchant nostre creance. Non, répondit-elle, ie ne sçay ce que vous m'avez demandé, ny ce que ie vous ay répondu, mais ie me souuiens bien qu'il me sembloit quand vous me parliez que le Diable me vouloit tuer, & que ie disois en mon cœur; c'est bien à luy à m'offencer, puisque ie crois en Dieu, il n'en sçauroit venir à bout. Je me senty par apres déliurée de ce danger, ce fut sans doute par ce Baptisme. Cette pauvre femme se comporte bien maintenant, fort ioyeuse d'auoir esté malade, pour auoir

receu vne faueur qu'on ne luy eut pas si tost accordée. Je ne sçauois me laisser de dire que ceux qui desesperent de la conuersion des Sauvages, font vne iniure à la bonté de Dieu ; Nous auons secouru cét hyuer vn ieune homme avec vne grande patience, car sa maladie a duré plus de cinq mois : Apres toute la charité qu'on luy eut fait, & l'instruction qu'on luy eut donnée, le diable luy renuersa quasi la ceruelle. Ce pauvre miserable entre en fureur, blaspheme contre Dieu, proteste qu'il ne croit plus en luy. Tout l'hyuer, faisoit-il, ie l'ay prié, & ie m'attendois qu'il me gueriroit, & me voila plus mal que iamais, qu'il me damne s'il veut, ie ne m'en soucie pas. Ceux qui entendent ces blasphemes creurent incontinent que les Sauvages ne croient que par interest. C'est chose estrange que le mal est mieux receu que le bien. Tout le monde croit au premier recit toutes les simplicités que nous escriuons de ces peuples, mais si on remarque quelque trait d'esprit, de bon sens, en vn mot, quelque faueur de la nature, ou de la grace, cela est comme reuoqué en doute. Qui eust iamais crû que nostre blasphemateur deust chanter les loüanges de Dieu. Nous le fismes porter dans la Cabane de quelques Sauvages ses parens ; & au mesme temps que nous ne luy donnions plus aucun secours, sinon de luy remontrer doucement son peché, il fut si contrit, qu'il nous tira les larmes des yeux. Il demanda le Baptisme, protesta qu'il estoit marry d'auoir offensé son Seigneur, luy donne sa vie sans le prier de la prolonger d'vn moment. Dit tout haut qu'il croit & qu'il veut

24 *Relation de la Nouu. France,*

croire à iamais en celuy qui luy a touché le cœur : on le baptize dans cette ferveur : le Diable survient à la trauersé ; vn sien frere songe que si on mettoit vn baston aupres de luy qui ressembloit à vne couleuvre, qu'il gueriroit : On en fait vn aussi-tost, on le place aupres de sa teste. Ayant eu aduis de ceste superstition, nous l'allasmes visiter ; comme nous luy demandions si ce baston n'auoit point fait son corps, puis qu'on le mettoit aupres de luy pour le refaire, il le prit, & nous le donna. Emportez-le, fit-il, afin qu'il n'en soit plus de nouvelle, ils l'ont mis aupres de moy sans que i'y aye aucune creance. Je l'enuoyé à V. R. encore qu'il n'ait autre rareté sinon qu'il fera vn long voyage. Ayant suruescu quelque temps apres son baptême, il se confessa, & receut l'extreme Onction avec vn tel sentiment de deuotion, que sa face en estoit toute épanouie. Nous luy demandasmes, s'il ne craignoit point la mort. Non, ie ne la crains plus depuis mon baptême, au contraire, ie desire fort d'aller voir mon Pere & mon Dieu. Nous luy remismes en memoire quelques offences qu'il pourroit auoir faites depuis qu'il estoit Chrestien, afin d'en demander pardon à Dieu : Il pensa vn petit à part soy, puis il nous dit. Non, ie ne suis pas tombé dans ces pechez. Car me presentant au Baptême, ie fis mon compte qu'estans enfant de Dieu ie ne le deuois plus offencer ; & puis il me semble que ceux qui sont baptizés ne tombent point dans ces offences. Sa mort estonna ceux qui auoient desesperé de sa conuersion.

CHAPITRE V.

De la conuersion & du baptesme d'un ieune homme, & de quelques autres Sauvages.

NOn est *abbreniata manus Domini ut saluare nequeat: neque aggranata est auris eius ut non exaudiat.* Dieu n'a pas les mains plus foibles, ny les oreilles plus fermées qu'il auoit il y a mille ans. Ces paroles nous seruiron de garend contre ceux qui prendroient les faueurs que sa bonté commence à faire aux Sauvages pour des exagerations. Nous verrons en ce ieune homme vn triomphe de la prouidence & de la misericorde du grād Dieu. Il y a tantost deux ans que Mr Gand, homme fort charitable enuers les pauvres Sauvages, recueillit ce miserable à demy mort de faim, de froid, & de maladie, quoy qu'il fust tres-biē apparété parmy les siēs, il l'habille, le loge, luy procure des viures, & nous le met entre les mains pour l'instruire: on le presse par diuerses raisons; on le fait prier Dieu soir & matin, il sçait la pluspart de nos mysteres, mais il ne les croit qu'en apparence: en vn mot, il cherchoit la vie du corps, & nō de l'ame. L'hyuer passé, le froid cōtinuē dās son cœur, dequoy nous apperceuās, nous le chassāmes cōme vne persōne qui nous suiuit à la façō des chiēs, pour auoir du pain, il passe l'Esté avec ses compatriotes, parlant tousiours honorablement de nous; sur l'Automne il luy arriue vne disgrace, faisant vne suērie, il tom-

ba sur les pierres ardentes qui eschauffoient ces estuues, il se grilla & brusta vne grande partie du corps; c'estoit chose affreuse de le voir. Le voila donc aussi près de la mort que de l'hyuer, car il connoit bien qu'il ne le passera iamais, s'il n'est fortement secouru : ce qu'il n'attendoit point de ses gens, qui ne scauent non plus que c'est de charité que de chirurgie : il nous iette plusieurs œillades, nous parle de retourner avec nous : mais nous n'auions plus d'oreilles pour luy, croians qu'il n'en auoit point pour Dieu. En ce mesme temps nous receusmes lettres de nos Peres des Trois riuieres, lesquels nous demandoient quelque ieune Sauuage pour passer l'hyuer avec eux, afin qu'en l'instruisans ils se formassent tousiours en la cognoissance de leur langue. Nous ne pensions guere à ce pauvre corps tout rosty : mais en fin apres en auoir trouué d'autres qui nous manquerent de parole, nous fusmes contrains de leur enuoier ce pauvre miserable, qui n'auoit plus que la moitié de son corps. O mon Dieu, quelle prouidence ! ils le font penser, ils le traittent avec toute sorte d'amour & de cœur; estant guery, cét homme de pierre demeura tousiours froid cōme vne glace. En fin nos Peres ne pouuans souffrir cette langueur, ont recours à Dieu, luy font quelques vœux par l'intercession du glorieux Apostre S. Paul; presentent le saint Sacrifice de la Messe le iour de sa conuersion pour la conuersion de cette statuë insensible. Chose estrange ! le voila changé en vn moment, son cœur est plain de regrets d'auoir si lōg temps resisté à Dieu, il presse qu'on le baptize pour estre deschargé du fardeau de ses pechez, il ieusne de

foy-mesme, faisant semblant de manger, & remettant dextrement à l'écart ce qu'on luy donnoit pour son viure: il passe dans la rigueur de l'hyuer les heures entieres dans la Chappelle, attiré par vne vertu secrette qu'il adore sans la connoître. Son esprit qui iusques alors auoit paru massif, & pesant comme du plomb, se subtilise en sorte qu'il conçoit sans peine tout ce qu'on luy enseigne de nos mysteres. Nos Peres s'en étonnans, il répondit: C'est vne faueur de mon bon Ange, auquel ie demande secours autant de fois que vous m'appellez pour estre instruit. Comme on luy vint à parler de la presence de Iesus-Christ au Sainct Sacrement, il fit vn geste comme d'un homme plein de ioye. Ie ne m'étonne plus, fit-il, si ie prenois tant de plaisir d'approcher de l'Autel quand ie faisois mes prieres en la Chappelle: plus i'en estois proche, plus ie ressentois de contentement dans mon ame, sans pouuoir comprendre d'où cela procedoit.

Ses parens ayant rapporté force chair fresche de leur chasse pendant le Careme, on luy dit qu'il en pouuoit manger, puis qu'il n'étoit pas encore baptisé. Il repartit, vous vous en abstenez pour vn bien, ie desire me procurer ce bien à moy-mesme. Pour le sonder, on luy fit entendre que le Baptisme luy seroit peut-estre occasion de mort. Dieu punissant la feintise de son cœur par ce supplice. Il répondit en ces termes. Si le baptisme ne me doit faire mourir qu'en cas de feintise, ie ne la dois pas craindre: mais quand il tueroit absolument mon corps, ie le demanderois pour faire reuiure ma pauvre ame. Dieu est admirable dans

28 *Relation de la Nouvelle France,*

ses procedures : à mesme temps qu'on promet le Sacrement de lumiere à ce pauvre Catechumene, il luy oste les yeux du corps, vne defluxion luy tombe en vn moment sur la veüe, & le rend auetigle, ou peu s'en faut : car il ne voit pas assez pour se conduire. Ce coup ne l'estonna point, il tint ferme dans sa resolution, le diable n'eust pas la force de réueiller dans son ame l'erreur des Sauvages, qui s'imaginoient il n'y a pas long temps qu'ils ne pouuoient procurer la vie de leur ame qu'en perdant celle du corps. Comme on le veit constant dans cette tentatiõ, & dans cette épreuve que Dieu luy donna, on le mit au nombre des enfans de Dieu, il fut nommé Paul, suiuant la promesse qu'on en auoit fait à ce grand Apostre.

Quelque temps apres son Baptisme, nos Peres des Trois Riuieres nous l'enuoyerent à Kebec avec vn mot de lettre, dont voicy la teneur. Le peu de viures que nous auons, & le grand nombre de Sauvages qui ont besoin de nôtre secours, nous ont fait resoudre de vous enuoyer ce nouveau soldat de Iesus-Christ, peut-estre encore luy pourra-on trouuer là bas quelque remede à ses yeux. Au reste, il est vrayement touché, il a vne humilité vraiment Chrestienne, vne grande resignation à la volõté de Dieu. Nous luy auons souuent demandé s'il ne s'affligeoit point d'auoir perdu les yeux: il a tousiours respondu que n'estant pas maistre de soy-même, il falloit laisser agir Dieu, lequel estant nostre Pere, cognoissoit bien ce qui nous estoit le meilleur. Tout de mesme, disoit-il, que si mon corps n'eust esté bruslé cét Automne, mon ame fust tombée cét hyuer dans les feux; car i'eusse

fuiuy les Sauvages, & perdu la vie avec eux dans la foiblesse en laquelle ie me trouuois : de mesme, peut-estre que ie perdrois la veüe du Ciel, si Dieu ne m'ostoit la veüe de la terre. La Foy luy a fait perdre la honte de parler de Dieu deuant ses compatriotes, i'espere qu'il vous donnera de la consolation.

Aussi-tost qu'il fut arriué, il se confessa & communia, & le iour mesme il tomba malade, mais si brusquement & si fortement, qu'on me vint viste appeller pour le voir mourir. Estans aupres de luy, nous luy demadâsmes en la presence des Sauvages s'il craignoit la mort, il souffrit doucement, quoy qu'il fut extremement abatu. Je suis baptisé, repliqua-il, ie ne crains plus ny la mort, ny le diable: Si ie ne croiois pas en Dieu, i'aurois peur: mais Dieu estant avec moy, ie ne crains plus rien sinon de l'offencer. N'estes vous point triste de mourir si tôt, luy fîmes nous, demandez moy plutost, si ie ne suis pas bien ioyeux d'aller au Ciel, que ceux-là s'attristent de la mort, qui n'ont point d'esperance en Dieu, pour moy ie croy en sa parole, i'espere en sa bonté, c'est pourquoy ie ne suis point triste, ces paroles nous touchèrent d'autant plus, qu'elles furent profitables à ses gens qui admiroient ce grand changement en vn ieune homme de leur nation. Ils furent encor plus estonnez, quand à peu de iours de là ils le virent en santé contre leur esperance: il frequente maintenant les Sacremens, voire mesme il gouste Dieu dans l'Oraison, voila où la grace peut porter vn Sauvage, Dieu luy donne la perseuerance, car si les estoilles tombent du Ciel, personne ne vit en assurance.

30 *Relation de la Nouv. France,*

Nous adiouterons à ce ieune homme la conuersion d'une famille plus heureuse pour le Ciel, que fortunée sur la terre. Vn grand homme bien fait & bien renommé parmy les Sauvages, apres nous auoir vn assés lōg temps presté l'oreille, nous aborda, pour nous témoigner les sentimens de son cœur: il nous dit, venant d'inhumer l'un de ses enfans, j'ay l'ame remplie de tristesse, non de la mort de mon fils, mais de ce qu'il est mort sans baptême. Or comme il eut appris que son enfant estant mort en bas âge ne ressentoit point la peine du feu, pour n'auoir commis aucun peché actuel, il nous remercia fort de luy auoir enseigné vne doctrine si fauorable, disoit-il. Puis il adiousta, il court vn bruit là haut que vous auez écrit à vn grand Capitaine de France pour nous ayder à logger à la Frāçoise, & à défricher la terre, cela est-il vray? Luy ayant répondu que cela estoit veritable. Souuenez-vous, dit-il, que ie suis des premiers qui me veux ranger sous vos drapeaux, ie ne seray pas seul, ie vous en ameneray plusieurs avec moy: mais vn poinct, faisoit-il, me tiēt en haleine, si ce Capitaine auquel vous auez récrit vous enuoye vn méchant papier, desisterez-vous de nous enseigner. A Dieu ne plaise, luy dismes nous, iamais nous ne vous abandonnerons. Voila, repart-il, le meilleur de vos discours, car ie ne veux m'arrester aupres de vous que pour le salut de mon ame. Sur ces entrefaites, se preparant pour faire vn voyage à Tadoussac, il nous dit plusieurs fois, Visitez souuēt ma famille, si quelqu'un meurt sans baptême, vous en répondrez, car nous voulons tous croire en Dieu. Vn autre mien fils est

malade, faites-le Chrestien au plustost, de peur de surprise. Les ingemens de Dieu sont des abysses, ce bon homme lequel nous resioüissoit iufques au fond du cœur, non pour sa seule conuersion, mais pour l'esperance que nous auions que plusieurs imiteroient son exemple, tomba malade le iour qu'il se deuoit embarquer, & dans quatre iours apres, il est baptisé & mis au tombeau. Trois iours apres sa femme est saisie de mesme mal, se sentant frappée à mort, elle nous appelle, & nous dit: L'amour que vous nous portez me fait croire que ie ne peux mieux laisser mes deux petits fils qu'entre vos mains, puisque vous avez chery le pere, cherissez les enfans; ie vous les donne, esleuez-les en vostre creanee, & me baptisez, car ie suis morte. Comme on les transportoit, cette pauvre mere les regardant, leur dit d'une voix dolente. Adieu mes enfans, c'est pour la derniere fois que ie vous verray ça bas en terre. Cela dit, on la fait Chrestienne, & du Baptisme on la porte au tombeau, ses deux enfans sont deux petits germes du Seminaire. Sur ces entrefaites, la sœur arriue toute malade, c'estoit l'une des meschantes femmes du pais, elle se mesloit de leur sorcellerie, en quoy elle reüssissoit mieux que les homes. L'affliction ouure les yeux de l'entendement, cette miserable demande le Baptisme, crie mercy à Dieu, proteste qu'elle croit, elle nous estonne par vn changement subit, nous luy accordons ce qu'on ne luy pouuoit refuser sans impieté. A peine est-elle purgée de ses offences qu'on la met en terre, son mary se voiant chargé de son enfant encor fort ieune, nous le donne pour estre mis avec ses cou-

ains. La mort de ces deux pauvres creatures n'empesche pas que leur troisieme sœur ne se face maintenant instruire pour viure à Iesus-Christ. En mesme temps vn ieue homme bien instruit, frappé de la mesme contagion, recherchant le salut de son ame dans les eaux du Baptisme, y trouua encor celuy du corps : car il guerit à mesme temps qu'il fut Chrestien. Cette guerison bien soudaine nous estonna, d'autant qu'il estoit aux abois quand on le baptisa. Reuenue à foy, il nous donna son petit frere pour le ietter au port de salut, tant pour le corps que pour l'ame. Vn Pere passant aupres d'une cabane sans entrer dedans, vne femme Sauvage luy dit en se plaignant. Je croy que tu ne nous aime plus, puis que tu passe sans nous visiter: le Pere soufrit à cette plainte, entre dans la cabane, y trouue vne pauvre femme fort malade, qui luy dit, sied toy vn petit aupres de moy, car ie me meurs, puis en luy monstrant son petit fils, elle luy demande la larme à l'œil, s'il ne ne voudroit pas bien seruir de pere au pauvre petit enfant qu'elle alloit laisser, le Pere la consola bien-tost, il fit emporter ce petit innocent pour estre esleué avec les autres, puis comme cette femme estoit baptisée, il l'enquist si elle ne seroit pas bien aise de se confesser des pechés qu'elle auroit commis depuis son baptisme, elle le fit avec tant de preparation, & tant de candeur, que le Pere demeura quelques iours comme estonné, voyant comme la Foy iettoit de profondes racines dans les ames de ces pauvres Barbares.

Quelque temps apres, vn Capitaine estant tombé malade, & ayant receu le saint Baptisme, nous
donna

donna sa propre fille âgée d'environ trois ou quatre ans, nous la faisons esleuer chés vne famille Françoisse, la mere de cét enfant ne la pouuoit quitter qu'avec peine, mais ce bon Neophyte la pressa tant qu'elle nous l'apporta elle mesme, cognoissant bien qu'elle seroit mieux dans nos maisons Françoises, que sous l'vne de leurs cabanes. I'obmets vn grand nombre de baptêmes, pour ne passer les limites que ie me suis proposé, encor qu'on y peut remarquer quelque chose de notable, quand ce ne seroit qu'vne prouidence de Dieu tres-particuliere. Par exemple, quelqu'vn de nous entre par cas fortuit dans vne cabane, voit vn petit mouuement sous vne peau d'Eslan, trouue vn enfant mourant, le baptize, & l'enuoye au Ciel à mesme temps.

Vn Sauuage vient querir vn de nos Peres pour aller baptizer vn malade dans sa cabane, le Pere le suit, tous deux passent sur le fleuve glacé: à peine sont-ils à l'autre bord que la glace se creue, & s'en va à vaux l'eau, s'ils eussent encor vn peu attendu, ils estoient morts. Entrés qu'ils sont en la cabane, le P. rencôtre vn enfât qui n'a plus que ce qu'il faut de vie pour receuoir le S. Baptême: estant fait enfant de Dieu, il s'enuole au Ciel, & le P. retournât sur ses pas, trouue le pont sur lequel il auoit passé mis en pieces: il restoit encor vne grosse glace eschoüée sur les bords du grand fleuve, il môte dessus, appelle tant qu'il peut, afin qu'on le vienne querir avec vn canot: on l'apperçoit, on y court, il s'embarque, & la glace qui le portoit flotte aussi-tost qu'il l'a quittée, & s'en va dans le courant de la riuere, vous eussies dit qu'elle n'attendoit sinon

34 *Relation de la Nouu. France,*

que le P. fut en lieu de sauueté. Toutes ces rencontres font vn prodige de la prouidence de Dieu.

Vn Pere descendant à Kebec, arriue en mesme tēps que ceux qui alloient visiter les Sauvages qui estoient malades: il s'en va donc luy-mesme en leurs cabanes, en baptize trois ou quatre à l'article de la mort, s'en retourne d'où il estoit venu, sans qu'on ait quasi peu cognoistre ce qui l'auroit peu appeller au lieu où Dieu le conduisoit pour le salut de ces ames. Quant sa majesté veut sauuer vne ame, tous les demions ne la sçauroient perdre. Vne autre fois les Sauvages vindrent encor querir vn de nous pour aller visiter leurs malades à quelques lieux de nos demeures, le P. s'embarque avec eux, le diable preuoiant le bien qu'il deuoit faire, ramassé tant de glaces à l'entour de leur canot, qu'ils furent contraints de se desembarquer sur vne isle noyée, & couuerte d'une seule glace. Les Sauvages trouuerent l'inuention de faire du feu sur ce foyer sans le fondre, ils coupent vn grand arbre de bois blanc, lequel ne brûsse guere au feu, ils en font leur atre, allument du feu dessus, & pour maison & liēt tout ensemble, prennent des morceaux de bois sur lesquels ils se couchent avec le P. & y passent la nuit. Le matin ils se r'embarquent: les glaces les enuironent derechef, ils criēt au secours: les Sauvages du lieu où ils alloient les entendans, accourent, leur tendent de longues perches, & les tirent des portes de la mort. Le P. ayāt remercié Dieu de cette faueur, instruit les sains & les malades, en baptize quelques-vns, entre autres vn enfant qui perdit la vie aussi-tost: cela fait, il s'en retourne avec facilité, admirant dans son ame les voyes que Dieu tient pour sauuer ses esleus.

CHAPITRE VI.

*Des grandes dispositions d'un Catechumene
Algonquin.*

IE ne sçay pas bon gré à ceux qui ont crû qu'on ne remarquoit dans l'esprit des Sauvages aucun petit rayon de lumiere, ny de connoissance touchant la Diuinité. I'ay autrefois escrit contre cét erreur. Voicy deux exemples qui combattent. Vne femme, nous disoit-il, n'y a pas long-temps qu'estant bien malade, elle eut vne pensée qu'il falloit qu'il y eust quelque vn qui la peust guerir, elle l'inuoque, recouure sa santé: à quelque temps de là, disoit-elle, ie descendis vers Kebec, ie vous entendis parler de Dieu & de sa Toute-puissance, aussi-tost ie commençay à dire en mon cœur, voy-la celuy que i'ay prié, & qui m'a guery, ie ne sçavois pas son nom, ie ne le cognoissois pas, il faut que i'escoute ce qu'on en dit pour croire en luy.

Ce ieune homme dont ie vay parler estant deliuré d'une maladie qui en auoit enleué plusieurs autres, philosophoit en cette sorte: Il faut bien qu'il y ait dans l'Vniuers quelque puissant genie qui m'ait conserué: car ie n'ay rien apporté à ma guerison, non plus que les autres, & si mon corps n'est point d'une autre temps, ie voudrois bien cognoistre ce bien-faicteur.

Vne autre fois estant seul, & contemplant sa main, il disoit: Ce n'est pas moy qui ay composé cette main, ny est-ce de ces doigts, cela ne peut estre

non plus attribué à mon pere ny à ma mere ; car outre qu'ils n'auoient point de cognoissance qu'à ma main se formoit, ils ne sçauoient donner aucun mouuement à leur ouurage : ils ne sçauoient faire ny airon, ny canot, ny autre manufacture qui s'ouure & se ferme par vn mouuement secret comme font mes doigts: sans doute il y a quelque grand ouurier qui fait ces merueilles : fust-il ainsi que quelqu'un m'en donnast la cognoissance. Je prie V. R. de croire que ie n'adiouste rien aux pensées de ce Sauvage. Nous sommes dignes de reproche d'en auoir perdu plusieurs semblables, pour ne les auoir marquées sur le papier.

Ce bon ieune homme estant dans cette disposition, descēdit par cas fortuit vers nos demeures : car il est de l'Isle, nation fort esloignée des François. Nous ayant entendu parler du grand Architecte de l'Vniuers, son cœur prend feu, il nous vient aussi-tost trouuer en particulier ; le voila touché, plus on luy parle de Dieu, & plus il en veut oïr parler, il goustē à longs traicts cette eau sacrée qui altere en rassasiant, il deuient importun, mais d'une importunité qui nous estoit fort agreable, on l'enseigne tous les iours deux fois, & apres vne grosse heure d'instruction, il demandoit permission d'aller à la Chappelle, pour demander à Dieu la grace de retenir ce qu'on luy auoit enseigné; au sortir de là, il se retiroit pour l'ordinaire à l'escart dans le bois pour ruminer à part soy ce qu'il auoit appris : retournant en sa cabane, il en faisoit part aux siens avec vne ardente affection, accompagnée d'une ancienne modestie.

Quand il se sentit fortifié dans la Foy, il fit vn

festin à tous les Sauvages qui estoient dans les cabanes voisines, pour leur décharger son cœur: estant assés, il leur dit: Mes chers cōpatriotes, ie vous ay fait venir pour vous declarer publiquemēt que dès ce moment ie quitte toutes les sottes coustumes de nostre nation, & pour preune de mon dire, ie ne chanteray point, ie ne feray point les cris & les bruits que nous faisons à nos banquets, mais ie prieray Dieu & le beniray de ce qu'il nous a donné ce que ie vous presēte à māger de bō cœur; Voiés si vous le voulés prier avec moy. A ces paroles les voila bien estōnés, ils baissent les yeux, le suivent mot à mot dans les prieres qu'il presenta à Dieu.

Voici vne autre preune de sa foy; cōme nous luy faisons quelque present pour gagner plus fortement son amitié, il le refusa, disant, qu'il ne croioit point pour tirer aucune vtilité des François; tous vos biens ne sauueront pas mon ame; c'est la Foy seule que i'attends de vous; si ie prenois quelque autre chose, ceux de ma nation s'imagineroiēt que ie ne croirois pas en Dieu, mais en vous autres. Ie souhaitteroie vne seule faueur, c'est qu'on m'aidast à deuenir sedentaire, afin d'estre aupres de vous pour entendre la parole de Dieu. On parle icy qu'on a desia bāty vne maisō pres de Kebec pour ce sujet. Mādés, s'il vous plaist, au Pere qui en a la conduite, qu'il me fera plaisir de m'accorder la mesme courtoisie qu'il pretend faire aux autres: mais faites luy bien entēdre, qu'encore qu'il m'esconduise, ie ne laisseray pas de croire en Dieu. Ce n'est pas luy qui a fait mon ame, & qui luy doit pardonner mes pechés: quād il n'y auroit plus aucun de vous autres sur le pais, ie ne pourrois pas

quitter Dieu. Il nous a dit iusques là, quand tous les François me traitteroient avec rigueur, iusques à me frapper, & me mettre en pieces, ie n'abandonerois point la Foy, car ce n'est pas en eux que ie croy, mais en Dieu. Cette foy est accompagnée d'un grand zele qu'il a du salut de ses compatriotes, il les presse incessamment par viues raisons, il nous les amene pour entendre la doctrine de I. C. Quelques-vns faisant la sourde oreille, il dit vn iour au P. qui les enseignoit. Allons, mon Pere, quittons ces opiniastrés; allons parler de Dieu aux nations plus éloignées, ie m'assure que si elles entendoient ce que vous nous enseignés ça bas, qu'elle receuroient la Foy à bras ouverts, & nous faisons les retifs. Sacōfiance en Dieu est d'autant plus digne d'admiration, qu'elle a commencé lors qu'il n'estoit encore que Catechumene. Estât biē esloigné dans les bois où il estoit allé à la chasse, vne fēme de son estoūade tomba malade: cela les incōmodoit fort dedans leurs courses d'abandonner cette pauvre creature, c'est ce qu'il ne pouuoit plus goûster, il s'adresse à son mary, & luy dit; Tu as appris ce qu'on nous enseigne de la bonté & de la puissance de Dieu, il est maistre de nostre vie, il nous l'a donnée, il nous la peut rendre quand nous l'aurons perduë: priōs-le qu'il guerisse ta femme, mais prions-le de bon cœur, & nous confions en luy. Ce bon homme & toute la cabane y estant accordée, il fait mettre tout le monde à genoux, il inuoque la bonté de Dieu, & tous les autres prient mot pour mot apres luy. Ce n'est pas tout, desirant d'estre exaucé, il passa luy seul vne partie de la nuit en prieres. Nostre Seigneur soit beny à iamais.

Deuant que le iour ſuiuant fut paſſé, cette femme trauailloit auſſi gaiement, & avec autant de ſanté que toutes les autres.

Il experimēta le ſecours de Dieu dans ſa chafſe, tous les matins & tous les ſoirs il faiſoit prier Dieu à tous ſes gens, & luy meſme luy adreſſoit ces paroles. C'eſt vous, ô mō Dieu, qui m'avez fait, & par conſequent ie ſuis à vous, vous pouuez diſpoſer de moy cōme ie diſpoſe des petits meubles que i'ay fait. Regardez moy dōc cōme vne choſe qui vous appartient: cōme l'vſage d'un auron que i'ay fait eſt à moy, auſſi faut-il que l'vſage de mon corps & de mon ame, & de toutes mes puiſſances que vous avez baſties, ſoit à vous. Ie vous offre tout, & le corps & l'ame, & toutes mes actions, ie mē reſoſe ſur vous de ma chafſe, me ſouuenāt que vous eſtes mon Père, Il ſ'en alloit avec cette cōfiance, & faiſoit merueille, iamais il ne diſoit, i'ay pris, i'ay tué, mais Dieu m'a donné telle choſe. Retournant certain iour de la chafſe, il ſōgeoit à part ſoy aux prieres qu'on luy auoit enſeignée. Sur ces entrefaites, il apperçoit vn Ours, le pourſuit & le tué, eſtant mort, il ſ'arreſte tout court, cēt animal n'eſt pas à moy, faiſoit-il, car Dieu me l'a fait tuer, non par mes merites, mais en vertu des prieres que font les François. C'eſt donc à eux qu'il appartient, & non à moy: il l'apporte, nous le preſente pour le diſtribuer, diſoit-il, à ceux qui faiſoiēt biē leurs prieres.

Ie ne ſçay pas ſ'il a la charité, mais ie ſçay bien qu'il en donne de grands indices. Entēdāt vn iour vn de nos Peres parler de Dieu, il le deuoroit des yeux; & pour conſclusion luy dit. Que ne ſuis-ie eternellement avec toy: c'eſt la verité que ce Cate-

40 *Relation de la Nouu. France,*

chumene ne se lasse iamais de semblables discours, y ayant passé les trois heures entieres, cōme on le reuoioit de peur qu'il nes'ennuiast, vous eussiez dit qu'on ostoit le morceau de la bouche à vn affamé. Ne craignez pas, disoit-il, de me lasser, i'ay prou de regret d'auoir passé ma vie sans cognoistre Dieu. Le plus grand plaisir que i'aye au monde, c'est d'en ouir parler. Il alla bien iusques dans cet excès, qu'ayant consommé toutes ses provisions, il s'abstenoit d'aller à la pesche, ou à la chasse, de peur d'estre priué de nous venir voir, pour parler de Dieu & de nostre créance, passant quelquefois quasi les deux iours sans manger. Nous en estans apperceu, nous le reprismes de cette ardeur déreglée, le secourant selon nostre pouuoir. Je sçay bien qu'à peine me croira-on, mais ie ne sçauois cacher les merueilles de Dieu.

Il n'y a pas long temps que regardant vn Huron fort âgé il nous dit: Helas, que Dieu est bon! qu'il est bon! il y a peut-estre soixante & dix ans qu'il nourrit & qu'il cōserue ce vieillard, & ie m'assüre qu'il ne luy a iamais rendu vne parole d'action de grace! Si i'auois donné dix fois à manger à vn homme sans qu'il en fit aucune recognoissance, ie ne le voudrois plus voir, nous dependons de Dieu en toutes nos actions, & nous pēsons si peu à luy.

Il n'entrepréd iamais aucun voiage qu'il ne viēne demander secours à N. Seig. dans la Chapelle, & se recommander à nos prieres. Que vous estes heureux, dit-il par fois, d'auoir cogneu Dieu dès vōtre ieunesse, & de le sçauoir prier. Pour moy depuis que i'en ay la cognoissance, ie pēse incessamment en luy. C'est vne chose bien remarquable,

que les Sauvages fortement touchés, sont ordinairement deuots à leurs bons Anges. Relisant les memoires de nos Peres, dispersés en diuers endroits, i'ay esté estonné, considerant comme le saint Esprit va donnant les mesmes sentimens à ces Neophites. Car sans se rien communiquer les vns aux autres, ils demandent lumiere à leur bon Ange quand ils viennent pour estre instruits : ils ont les mesmes estonnemens de la grandeur & de la bonté de Dieu, quoy qu'ils les expliquent diuersement. Nostre Cathecumene en a des sentimens fort doux; Ouy, mais dira quelqu'un, pourquoy retient-on encore au nombre des Catechumenes vn homme si bien disposé? Je responds qu'il ne se faut pas trop haster dans les affaires d'importance. L'empressement qu'apportent les vaisseaux, nous a fait differer son baptesme iusques apres leur depart, deuant qu'ils ayent ietté l'Anchre dans vos haures, ce bon Catechumene fera Chrestien.

CHAPITRE VII.

De quelques Sauvages errans deuenus sedentaires.

CE Chapitre donnera de la consolation à V. R. & à toutes les personnes qui prennent plaisir de voir regner **IESVS-CHRIST** dans nos grands bois; car il nous met dans vne grande esperance de la conuersion des Sauvages, si tant est qu'on les puisse secourir à la façon que ie le vay deduire.

L'un des plus puissans moyens que nous puissions auoir pour les amener à **IESVS-CHRIST**,

42 *Relation de la Nouvelle France,*

c'est de les reduire dans vne espece de Bourgades, en vn mot de les aider à defricher & cultiver la terre, & à se bastir. Comme nous cherchions tousiours quelque secours pour faire cette entreprise, arriue qu'une personne de vertu de vostre France bien cogneuë au Ciel & en la terre, & dont le nom ne peut sortir de ma plume sans luy deplaire, me donna aduis d'un dessein qu'il auoit de seruir Nostre Seigneur en ces contrées. Il gage à cet effet quelques artisans & quelques hommes de travail pour commencer vn bastiment, & pour defricher quelques terres, m'as-
seurant dans ses lettres qu'il n'auoit point d'autre but en ce travail que la plus grande gloire de Dieu: Nous mismes ses ouuriers dans vn bel endroit nommé à present la Residence de S. Ioseph, vne bonne lieuë au dessus de Kebec sur le grand fleuve. Monsieur Gand auoit pris ce lieu pour soy, mais il le consacra volontiers à vn si bon dessein. Les affaires estant en cette disposition, nous mandasmes à ce bon Seigneur, qu'il feroit vn grand sacrifice à Dieu s'il vouloit appliquer le travail de ses hommes à secourir les Sauvages. Il falloit attendre vne année pour auoir response. Cependant il arriue que demandans à vn Sauvage ses enfans pour les mettre au Seminaire, il nous respondit; c'est trop peu de vous donner mes enfans, prenez le pere & la mere, & toute la famille, & logez nous aupres de vostre demeure, afin que nous puissions entendre vostre doctrine, & croire en celuy qui a tout fait. Nous luy demandasmes s'il parloit sans feintise. Il vous parle nettement, respond-il, selon les pensées de

mon cœur. Cécly nous fit refoudre de luy offrir tout sur l'heure la maison qu'on bastissoit en la residence de S. Ioseph, à condition neantmoins que celuy à qui nous en auions reserit n'en estoit pas content, qu'il en sortiroit. Ce bon Sauvage nommé des liens Negabamat, nous dit qu'il nous viendront voir pour parler de cette affaire, & qu'il prendroit avec luy vn sien amy de mesme volonté. Il s'alla d'vn nommé Nenaskoumat. C'est nostre François Xavier dont j'ay parlé cy-dessus. Ils nous vindrent trouuer tous deux en vn soir, & nous dirent que les bonnes affaires se faisoient bien mieux dans le silence de la nuit, que dans le bruit du iour; Et par consequent que nous leur donnassions le couvert pour traiter avec nous de ce que nous leur auions parlé.

Le Soleil estant couché, & tout le monde en repos, Negabamat me fit cette harangue Pere le Jeune, tu es desia aagé, & partant il ne t'est plus permis de mentir; Sus donc, prends courage, dis hardiment la verité. Est-il pas vray que tu m'as promis de nous loger en cette maison qu'on bastit, & de nous ayder à défricher, moy & vn autre famille? Voicy Nenaskoumat avec lequel ie me suis associé, C'est vn homme paisible, tu le cognois bien. Nous venons voir si tu persiste en tes parolles, tous les Sauvages à qui nous auons parlé de ce dessein l'admirent, mais ils ne croient pas que tu le mettes iamais en execution; prends garde à ce que tu feras. Si tu veux mentir, ments de bonne-heure, deuant que de nous engager dans vne maison pour nous en faire sortir. Nous sommes en quelque credit par-

my ceux de nostre nation, s'ils nous voyoient de-
 ceus par vous autres, ils se moqueroient de nous,
 ce qui nous facherait. Cette harangue si naïve
 nous fit souffrir. Le leur reparty que cette maison
 n'estoit point à nous, que les hommes qui la ba-
 tissoient n'estoient point à nos gages, mais que
 l'anois rescrit en France à celuy qui auoit entre-
 pris ce dessein de l'appliquer pour le bien de leur
 nation, & qu'eux se presentans les premiers pour
 estre secourus, on les aideroit aussi les premiers, si
 nous auions de fauorables respōces, qu'au reste ie
 me promettois tant de la bonté de cet homme de
 Dieu, qu'il leur accorderoit aisément cette gran-
 de & singuliere faueur.

Ils nous firent là dessus mille questions. Ce
 grand homme à qui tu as rescrit, n'est-il pas bien
 aussi bon que vous autres? Bien meilleur; luy dis-
 mes-nous. Voila qui va bien, repliquent-ils; car
 puisque vous nous voulez du bien, & que vous
 nous en faites, si ce Capitaine est meilleur que
 vous, il nous en fera encore dauantage. Mais
 est il bien âgé. Il l'est en effet, leur fismes-
 nous. Ne mourra-il point bien tost? nous n'en
 scauons rien. Prie-il bien Dieu? grandement
 bien. S'en est fait, dirent-ils, nous serons secou-
 rus; car s'il prie bien Dieu, Dieu l'aimera, si Dieu
 l'aime, il le conseruera, & s'il vit long temps, il
 nous aidera, puis qu'il est bon. Vous pouuez pen-
 ser si ce raisonnement si naïf nous consolait. Voi-
 cy, firent-ils poursuuant leur discours, encore
 un autre point d'importance: comme nous
 tirons desia sur l'aage, si nous venons à mourir,
 ne chasserez vous point nos enfans de cette mai-

son, ne leur refuserez vous point le secours que vous nous aurez donné. Leur ayant expliqué comme parmy nous les biens des parens appartiennent aux enfans apres leur mort, ils s'escrierent. Ho, Ho, que tu dis de bonnes choses, si tu ne ments point, mais pourquoy mentirois-tu, n'estant plus enfant.

Voila donc mes gens les plus contens du monde: ils vont voir la maison qu'on bastissoit, ils ne se scauroient saouler de la regarder, ils demandent d'y loger au Printemps, si tost qu'elle sera acheuée & meublée; cependant, disoit Negabamat, nous irons faire nostre chasse durant l'hyuer. Nenaskoumat qui pensoit autant aux biens du Ciel, qu'au secours de la terre, nous dit tout bas, pour moy ie viendray passer l'hyuer aupres de vous pour estre instruit.

Les voila donc separez, l'un traaverse le grand fleuve pour aller chercher des Castors, l'autre se vient cabaner tout pres de Kebec. Les affaires de Dieu ne s'establissent que dans les difficultés, ils tombent tous deux fort malades à mesme temps. Qui n'eust pensé que tout ce dessein estoit renuersé? Nenaskoumat trouua la vie de l'ame dans la maladie du corps; il fut fait Chrestien, & nommé François Xavier, comme i'ay desia remarqué. Pour Negabamat, nous ne luy pouuions donner aucun secours, estant trop esloigné de nous.

La bonté de Dieu qui a commencé cet ouura-ge, & qui le mettra en son dernier poinct, comme nous esperons, nous rendit nos deux profelytes en bonne santé, non sans crainte, & sans beau-

coup de vœux & de mortifications qu'on luy presenta. Le Printemps venu, mes gens se presentent à la maison qui les attendoient, on les reçoit à bras ouuerts. Leurs cœur est tout plein de ioye, les autres Sauvages d'étonnement, & nous de consolation, voyant les premiers fondemens iettés d'une bourgade, & en suite d'une Eglise qui produit desia des fleurs & des fructs tres-agreables aux yeux des Anges & des hommes. Ces deux familles sont composées d'environ vingt personnes, dont la pluspart sont desia baptisés, le reste le sera bien-tost s'il plaist à Dieu. De l'heure que j'escriis cecy, il y a desia plusieurs mois qu'ils sont ensemble dans une chambre assez petite, & cependant ie puis dire avec verité que ie suis encore à remarquer la moindre querelle ou la moindre dispute qu'ils ayent eu par entr'eux.

Les autres Sauvages circonuoisins se vinrent Cabaner à l'entour de cette maison; demandans la mesme faueur, mais ils voyent bien qu'on ne les peut pas si tost secourir, nos maisons ne se dressent pas en deux heures comme leurs Cabanes.

Le bruit de cette assistance qu'on vouloit donner aux Sauvages se respendit incontinent dans toutes les nations circonuoisines: cela les a tellement touchées, que si nous auions les forces de leur donner les mesmes secours, on les reduiroit toutes en fort peu de temps. Et remaqués s'il vous plaist une grande benediction en cette affaire, pas vn n'espere estre logé ny secouru qui ne se resolue d'estre homme de bien, & de se faire Chrestien, si bien que c'est une mesme chose en

vn Sauvage de vouloir estre sedentaire, & de vouloir croire en Dieu.

Dans ces ioyes communes & publiques, vn poinct tenoit nos deux profelytes en haleine. Le doute qu'ils auoient tousiours que cét homme de bien qui faisoit bastir cette maison à ses despens, ne nous enuoiaist point de bon papier comme ils parloient, c'est à dire, ne respondit pas fauorablement à leur dessein; ils souhaittoient avec passion la venue des vaisseaux. En fin en ayant eu nouuelles, ils nous vindrent trouuer, & nous demanderent si le papier venu de France estoit bon. Ils auoient belle peur qu'un mot de lettre ne les fit sortir de leur demeure, qu'ils cherissent extrêmement; Nous leur respondismes que les Peres qui apportoint ce papier estoient en chemin, de Tadoussac à Kebec dans vne barque qui les amenoit. Comme ils virent que le vent les pouuoit retarder, ils me demandent vn mot de lettre pour les aller querir dans leur canot; ie leur donne aussitost, & s'embarquent encore plus viste: ils vont comme le vent, abbordent la barque, enleuent les deux Peres, & nous les amènent: Nostre ioye fut double, & de voir nos Peres en bonne santé, & d'apprendre les saintes volontés de cét homme vraiment de Dieu, lequel accordoit ce secours aux pauvres Sauvages avec vn cœur si deuot & plein d'amour que nous en restions tous estonnés. Si tost que i'en eus ouuert la bouche à nos deux sedentaires, ils triomphent de ioye, font mille actions de grace à leur mode, & me disent cent fois, que ie n'estois point menteur, que ce braue homme estoit vraiment Capitaine,

qu'ils connoissent bien que i'estois maintenant de leur nation, qu'ils alloient dire par tout qu'ils estoient aussi de la nostre, & que ie ne manquasse point d'escrire vn bon papier en France pour asseurer ce bon Capitaine qu'ils ne mentiroient iamais en ce qu'ils nous auoient promis de seruir **I E S V S- C H R I S T** toute leur vie. Negabamat tenoit ce discours. Pour François desia Chrestien, il me dit que sa grande ioye estoit de se voir aupres de nous pour pouuoir apprendre à mieux prier Dieu.

Au sortir de là ils publient par tout que nous estions veritables, que nous estions leurs peres, que nous voulions resusciter leur nation qui s'en alloit mourant. C'est merueille, combien la charité de cét homme de bien a de puissans effets sur ces Barbares; Ils nous pressent maintenant, & nous ne pouuons subuenir à tous. La difficulté de bastir en ce pays-cy, pour la longueur de l'Hyuer, & pour les frais qu'il faut faire, estant extreme. S'ils voient iamais vn hospital dressé, & leurs malades bien logez & bien secourus, c'est vn autre estonnement qui les raura tous. La pauvreté du pays soulage peu ou point les grandes despeses qu'il faut faire pour ces entreprises vraiment heroïques; mais pleust à Dieu que ceux qui peuent fauoriser ces entreprises vissent du moins vne seule fois les exercices de deuotion qui se font tous les iours en la maison de ces nouveaux sedentaires. Si ie n'auois peur d'ennuyer, ie raconterois icy les grands desirs qu'ils ont de bien cognoistre Dieu, leur naiueté, leur bonté naturelle, leurs questions gentilles, le contentement

tement qu'ils ont de se voir logez non seulement à la Françoisse, mais encore instruits en la Foy. Nostre Seigneur les veilles tenir sous la sainte protection. Ainsi soit-il.

CHAPITRE VIII.

De l'Estat present des Sauvages touchant la Foy.

Pour faire concevoir à V. R. la disposition dans laquelle Dieu a mis nos Sauvages, ie luy diray ce qui se passa au desembarquement des quatre Peres qu'elle nous a enuoies de renfort, lesquels sont tous arriuez en bonne santé par la grace de Nostre Seigneur. Mettant pied à terre, ils baptizerent tous quelques Sauvages. Mais ce qui les toucha plus viuement; fut que les ayant menez à diuerfes reprises en la residence de S. Ioseph, où demeurent ces deux familles dont ie viens de parler, où s'estoit encore retiré quelque nombre de nos Sauvages, nous les fismes assister aux prieres & à l'instruction que nous donnons à ces pauvres brebis égarées, qui ne demandent sinon qu'on leur ouure la porte du bercail; Le signal donné pour les assembler, ils viennent tous, hommes, femmes & enfans, excepté fort peu, dont la pluspart sont malades, ou gardent les Cabanes. Ils quittent souuent leur souper, ou leur jeu, ou quelque autre action que ce soit pour venir aux prieres. Entrant en la Chapel-

le, ils saluent l'Autel, puis se vont retirer aupres des bancs qu'on leur a preparé à cet effet. Estans assemblés, le Pere qui les instruit se met à genoux, fait les prieres propre du matin & du soir, car ils s'assemblent deux fois le iour, ils suivent tous le Pere mot apres mot, print avec luy les genoux en terre, & les mains jointes: apres les prieres ils s'asseoient, & le Pere leur explique quelque point de la doctrine de IESVS CHRIST, où refute quelqu'vnes de leurs superstitions, eux demeurans fort attentifs, & faisans par fois quelques interrogations pour estre mieux éclaircis. Apres ce discours, ils chantent tous, ou le Symbole des Apostres, ou l'Oraison Dominicale, ou les Commandemens de Dieu, ou quelque autre hymne en leur langage, avec vn accord bien agreable; En suite, ils se remettent à genoux, demandent à Dieu la grace de retenir ce qu'on leur a enseigné, font la reuerence à l'Autel, & s'en retournent en leurs Cabanes. Les Peres nouvellement arriués estans dās la Chapelle, & voyans cet agreable spectacle, parlerent du cœur, des yeux, & de la bouche, & nous dirent; On ne croit pas en Frāce ce que nous voions. Quoy que vous nous en ayez rescrit quād nous estions encore à Tadoussac, il falloit se seruir de nos yeux pour voir vne si grande benediction. Nous voions bien maintenant que les miracles necessaires pour conuertir ces pauvres peuples, c'est de les aider à demeurer & viure par ensemble, & qu'en leur faisant tirer leur nourriture de la terre, vous leur ferez iouir des biens du Ciel.

Or ce n'est pas seulement en la residence de S. Ioseph qu'on fait prier les Sauvages, & qu'on les

en l'année 1638.

51

instruit, le mesme se fait aux trois Riuieres où ils se montrent également affectionnés à nostre creance: *Hec est mutati dextera excelsi*, c'est vn changement de Dieu bien soudain: Car l'année passée ils n'estoient point en cet estat. Voicy vn exemple qui fait voir le respect qu'ils portent à nos prieres. Vne femme estant tombée en phrenesie par la violence de la fièvre, renuerçoit tout dans sa Cabane; vn Pere y arriuant pour les faire prier Dieu, cette pauvre incensée se mit à genoux auprès du Pere, sans donner aucune marque de sa folie; & autant de fois qu'on alloit faire les prieres, autant de fois paroissoit elle en son bon sens, hors de là elle estoit phrenetique. Je ne cognois plus aucun Sauvage qui ait demeuré quelque tēps auprès de nos habitations, qui ose publiquement resister à nostre Foy. Je ne dis pas que tous la suivent ou en ayent enuie, mais I E S U S-CH R I S T est maintenant si cogneu parmy eux, que pas vn n'en oseroit parler mal à propos deuant nous. Il n'y a plus que ceux qui ne nous ont point encore entendu qui fassent difficulté de nous presenter leurs enfans & leurs malades au Baptisme. Ces eaux sacrées aiāt sauué la vie par fois à quelques familles entieres, sont maintenant en grand credit parmy eux.

Si plusieurs ne demandent pas le Baptisme, c'est qu'ils s'en iūgent indignes; d'autres ne voulāt pas quitter leur vices, approuuent nostre creāce, mais ils la croient facheuse & difficile. C'est vne marque que le S. Esprit est l'Esprit de l'Eglise, puisque pas vn Sauvage n'a pas plustost la volonté d'y entrer, que d'estre homme de bien. Ils s'imaginent que ceux qui sont baptisez doiuent quitter leurs

pechez & leurs vices, pour mener vne vie nouvelle, ce qui est veritable.

Les Sorciers & les Iongleurs ont tellement perdu leur credit, qu'ils ne soufflent plus aucun malade, & ne font plus iouer leur tambour, sinon peut-estre la nuit, ou en des lieux écartez; mais iamais plus en nostre presence. On ne voit plus de festins à tout manger, plus de consultes de demons: Tout cela est banny de deuant nos yeux, les autres superstitions s'estoufferont petit à petit. Quand quelqu'un d'eux s'en sert, il afit ce qu'il peut, afin que nous n'en soyons point aduertis, de peur d'estre tãcez. Si tous les Sauuages estoient arrestés cōme ces deux familles sedentaires dont i'ay parlé cy-dessus, nous ne ferions point difficulté de les baptiser bien-tost. Car vous les entendriez demãder à Dieu la grace de croire en luy, de luy obeyr, & de iamais plus ne l'offencer. En vn mot, c'est tout de bon que plusieurs de ces pauvres Sauuages pēsent à leur salut. Il n'est pas iusques aux enfãs même qui ne prēnēt plaisir d'estre instruits. Vn Pere leur faisant vn iour le Catechisme à l'air, la pluye, suruenant, cinq ou six petits garçons prirent vne grande escorce, qu'ils taschoient d'esleuer sur la teste du Pere pour le mettre à couuert. Cette actiō pleine d'innocence, monstre que nostre Seigneur prend encore plaisir qu'on luy amene des enfans. Quelques Sauuages des Attikamegues, de la natiō des Porcs-epics, & de l'Isle, ont demandé le mesme secours qu'on donnoit aux autres, notamment pour estre instruits. Helas, si le pays estoit plus facile à faire reüssir, ou si plusieurs mains s'ouuroiēt à ces pauvres Barbares, qu'ō feroit vne belle

Eglise ! Ce que fait ce grand homme dont j'ay parlé cy-dessus, en la residence de S. Ioseph, proche de Kebec, il le faudroit faire encore aux trois Riuieres, à la riuere des prairies, & aux nations plus hautes; Ce seroit le moien d'amener des ames à Iesus-Christ, peut-estre que nous enuioierons à ce Printemps vn de nos Peres à l'Isle, où on dit que la petite nation des Algonquins s'est retirée. Voila en general l'estat de cette Eglise naissante. Les chastimens arriués à quelque mécreans, & les faueurs accordées à ceux qui ont eu recours à Dieu, n'ont pas peu seruir pour en reduire quelqu'vns à leur deuoir. Vn miserable Sauvage se gaussant fort de nostre creance, deuint phrenetique au milieu de ses gaufferies. Comme il estoit sale & impudent dans ses folies, les Sauvages pour s'en défaire luy attachèrent vne corde au col & au pied, qu'ils ramenant contre sa cuisse, afin que venant à s'estendre & à bander cette corde, il s'estranglast soy-mesme. Là dessus ils font sa fosse, & disent qu'il est mort: Nos Peres suruenans, le voyent remuer sous vn bout de couuerture, l'ayant descouuert, couppent viste la corde qu'il auoit au col, mais trop tard, il estoit déjà estouffé: il mourut incontinent apres. Vn autre resistant publiquement à la Foy, donna vn coup de pied à vn de nos Peres qui baptisoit vn enfant dans sa cabane; à quelque temps de là il est emporté par vne maladie aussi fâcheuse cōme elle estoit estrange. Les Sauvages ont mesme reconnu en quelques vns que Dieu leur dénioit le baptisme à la mort, dont ils s'estoient mocqués pendant leur vie. Laissons ces tristes discours,

voicy quelque chose de meilleur.

Deux ieunes Sauvages s'estans embarqués cet hyuer dans vn canot pour porter des viures à quelqu'vns de leurs gens au delà du grand fleuve, furent tellement assaillis des glaces, qu'en vn moment leur canot & tout ce qui estoit dedans fut froissé & mis en pieces. Eux se iettent sur vne grande glace portée avec impetuosité par le courât de la marée. Ils s'attendoient à tous coups que cette glace venant à se briser, ou à se culbuter contre les autres, ils couleroiēt à fond. De secours, ils n'en pouuoient esperer; car outre qu'il estoit nuit, la riuere estoit si chargée de glaces, qu'homme du monde n'en eust osé aborder. Se voyant donc pourmenez plus d'une grande lieue loin, plus près de la mort que de la vie, l'un des deux dit à son compagnon qui se mesloit de leurs forcelleries, ou de leurs iongleries, fers toy maintenant de ton art pour nous sauuer la vie. L'autre respondit, il n'est pas temps de penser à cela, mais bien à ce que les Peres nous enseignent. Ils disent que nous auons vn Pere au Ciel qui peut tout, & qui voit tout, quet'en semble, si nous le prions, seroit-ce pas bien fait? Son camarade s'y accordant, celui cy fit la priere tout haut, & à mesme instant la glace qui les portoit au milieu du grand fleuve, tire à bord au trauers de quantité d'autres, ils quittent d'un plein saut ce pont flottant; à peine estoient-ils à bord, que cette glace qui les auoit amené au port de salut, s'alla briser entre mille autres en vne pointe qui leur eust seruy de sepulchre. Ces pauvres gens bien estonnés, publierent par apres comme ils auoient esté sauués: L'un d'eux est desia baptisé, & sa femme & son enfant; le sorcier a quitté

toutes ses badineries, & nous a promis de se faire instruire.

Dans la grande contagion qui a massacré quasi tous ces peuples, sans s'attacher, aux François, quelques-vns ayans eu recours à Dieu tout de bon, sont rechappez des portes de la mort. Le Baptisme a sauvé la vie à plusieurs: Car en verité il n'y auoit ailleurs aucune esperance de guerison pour eux selon toutes les raisons humaines; Tout cela joint au secours qu'on donne à ces pauvres Sauvages, a faict brèche dās leurs cœurs. I'obmets vne infinité de bons sentimens que Dieu leurs donne pour trouuer la fin de ce Chapitre.

CHAPITRE IX.

Du Seminaire des Hurons.

ON a tousiours bien iugé que les puissances d'Enfer banderoient toutes leurs forces contre le dessein de ce Seminaire, & de leur semblables: & que s'il auoit à reüssir comme on a beaucoup de sujet de l'esperer, ce ne seroit qu'apres auoir soustenu plusieurs batailles, & essay tout plein de disgraces, Nous vismes l'an passé comme il pensa estre estouffé dans son berceau: Voicy la suite des efforts de ces malheureux esprits, qui veillent continuellement à la ruine des hommes.

Les jeunes Sauvages Hurons qui auoient passé l'année d' auparauant avec nous au Seminaire de Nostre-Dame des Anges, en auoient dit tant de bien à leurs compatriotes, descendus l'année d'apres pour la retraite, qu'ils firent venir l'enuie à plusieurs de se presenter pour y estre receus; mais il ne fut pas possible de donner satisfaction à tous,

on se contenta du nombre de six, l'un desquels fut bien-tost apres desbauché par vn de ses parens qui le ramena au pays, de sorte qu'il n'en resta que cinq, les deux qui nous estoient demeurez del'an passé, & trois nouueaux. Mais comme les deux anciens faisoient iugement du bon-heur de leur demeure en ce lieu, plus par le succès & par le profit de l'esprit, que par l'agrémēt de la nature corrompue; Les nouueaux venus au contraire, n'y pretendans que la satisfaction de leurs plaisirs & sensualités, l'issuë des vns & des autres a esté bien differente. Car ces nouueaux hostes s'emportans selon leur coustume au larcin, à la gourmandise, au ieu, à la faineātise, aux mensonges, & à semblables desordres, ne purent souffrir les aduertissemens paternels qui leur furent donnés de commencer à chāger de vie, & sur tout les reproches tacites des exemples de leurs compagnons, qui estoient autāt dans la retenuë, que ceux-cy estoient dās le desordre & dans le dereglemēt. Ce fut lors que le malin esprit prit son temps, & leur fit enfin prēdre la resolution de s'ēfuir; Pour cela il falloit vn canot des viures, & dequoy en auoir par les chemins: ils font si bien par leurs larcins, par leurs feintes, & par leurs dissimulations, qu'ils se trouuent fort bien equipés, & vn beau matin ils s'en vont à la dérobee, enleuāt tout ce qu'ils peurent sans qu'on en ait eu depuis aucune nouuelle.

Voila donc derechef le Seminaire reduit au petit pied; & au nombre de deux: ce qui n'est pas arriué sans vne speciale prouidence de Dieu: Car d'un costé les Sauuages du pais ayant esté malades extraordinairement, on a eu le moien d'en assister dauantage qu'on n'eust fait, & de

ſauuer les corps & les ames de pluſieurs, reduits à l'extreme neceſſité: De l'autre les anciens Semina-
riſtes demeurans ſeuls, n'ont receu aucune altera-
tion dans leur bonne diſpoſition, par le mauuais
exemple & par les mauuais diſcours des autres;
ce qui eſtoit quaſi neceſſaire pour les eſtablir dans
l'eſtât auquel en fin par la grace de Dieu, on les a
veu apres leur Baptême avec edification, & ſatis-
faction d'un chacun: tout le monde aduoüant
qu'on ne pouuoir deſirer plus de pieté, plus de
douceur, & plus de retenuë dans des Chreſtiens
de naiſſance: voicy ce qu'eſcrit leur inſtructeur.

Armand-Jean qui a eſté baptiſé le premier, a
l'eſprit bon & le iugement aſſés ferme: ie ne l'ay
point veu chanceler depuis qu'il a conceu ce qui
eſt de noſtre creance, il eſt porté à ſe vaincre dans
ſon naturel vn peu bruſque, enquoy il n'a pas peu
profiter.

Parlant vn iour avec ſon compagnon de l'indif-
ſolubilité du mariage, comme il voioit de grandes
difficultés parmy ceux de ſa nation touchant ce
point, il monſtra d'eſtre fort en peine. Car ou
nous nous marierons, ou non, diſoit-il, ſi nous pre-
nons femme, la premiere quinte qui la prendra, el-
le nous quittera là, & partant nous voila reduit à
vne vie miſerable, attendu que ce ſont les femmes
en noſtre païs qui ſement, qui plantent, & qui cul-
tiuent la terre, & qui nourriſſent leurs maris. De
refuſir le mariage parmy les Hurons, c'eſt ce qui
demande vne chaſteté que noſtre païs n'a iamais
cogneu. Que ferons-nous donc? Pour moy, dit
ce braue ieune homme, ie ne prendray iamais de
Huronne, ſi ie n'y voy vne conſtance extraordi-

58 *Relation de la Nouu. France,*

naire, ie rechercheray vne Françoisse, si ie suis écœduit, ie suis en resolution de viure & mourir chaste. Remarqués qu'il n'estoit pas encore baptisé. Pendant l'hyuer il a bien le courage de se faire quelquefois violence, par le motif d'une patiēce vraiment Chrestienne, soit à tenir les mains dans l'eau glacée, soit à y entrer par fois iusqu'à la ceinture, sous pretexte de quelque nécessité qui s'en presente, soit travaillant teste nue quand il pleut, lors mesme que tous les autres se mettent à couuert. Ce n'est pas là l'humeur des Sauvages qui ne cognoissent pas Iesus-Christ.

Il est de si bon exemple parmy les ouuriers, que jamais il ne mettra la main à l'œuure, qu'auparuant il n'ait leuē le cœur & les mains à Dieu pour luy dedier son action. Au reste, il s'applique si bien à tout ce qu'on luy commande, qu'il n'y a travail auquel il ne reüssisse passablement.

Depuis son baptesme il se confesse & se communie tous les huit iours avec vne deuotion & vne modestie qui nous fait recognoistre en luy la presence de la grace. Sur tout il a vne auersion grande du peché, nommément de l'impureté. Il ne faut que se figurer les debordemens d'un Sauvage lubrique pour admirer ce que ie vay dire: Se sentant attaqué la nuit en songe de quelque pensée messeante, il se leue en sursaut, se met à genoux pour prier Dieu iusqu'au son de quatre heures pour le leuer: Alors il me vient trouuer avec tant de confusion & d'humilité, qu'il me fut aisé de cognoistre que le Prince des superbes auoit quitté la place. Il s'accusoit comme coupable d'un grād acte de vertu qu'il auoit exercé. Il desiroit fort ieusner

les Védredis & les Samedis de l'année, pour la deuotion sensible que Dieu luy communique à la passion du Fils, & aux douleurs de la Mere; mais nous le contentasmes sur ce que nostre Seigneur auroit esgard à sa bonne volonté dans son travail, voicy vn trait de sa grande resignation. Il auoit vne iambe gelée, son compagnon voulāt aller à la chasse, & ne scachant rien de son incommodité, le presse de luy tenir compagnie, luy de peur de luy déplaire, se leue de grand matin, & se dispose comme s'il eust deu partir quant & luy, durant la Messe il prie Dieu à ce qu'il inspire son instructeur ce qui seroit de sa volonté, estant tout prest de partir, si on le iugeoit à propos, Dieu y pourueut, car de bōne rencontre, ie l'arrestay, aiant veu la mauuaise disposition de sa iambe.

Son compagnon semble vn peu plus morne, c'est ce pauvre fugitif que Sainct Ignace nous ramena l'an passé, apres vn vœu que nous luy fismes pour son retour: le changement & la constance d'Armand luy a beaucoup seruy. Depuis qu'il le vit Chrestien, il se rangea de soy-mesme aux ieusnes de l'Eglise: il a monsté vn desir extraordinaire du Baptisme, il entend volontiers quand on l'aduerit de ses manquemens, il est d'une humeur assez affable & complaisante. N'estant encore que Cathecumene, il s'abstint de manger d'un Eslan qu'il auoit pris à la chasse, pendant le Careme, nonobstant les fatigues de ses courses.

Il se prepara au sainct Baptisme 1. par vn ieusne extraordinaire, 2. par le retranchement des plaisirs de la chasse, où il est fort enclin, 3. par vn recueillement interieur, s'entretenant quelques sep-

60 *Relation de la Nouu. France,*
maines sur les Commandemens de Dieu.

Depuis qu'il a esté fait enfant de l'Eglise, on a remarqué en luy toute vne autre docilité, vne modestie, & vne honnesteté extérieure, qui part d'une pureté intérieure de l'ame, avec vne soubmission de sa volonté à la conduite du saint Esprit, & à la direction de ses maistres.

Je ferme ce Chapitre, disant vn mot de l'union & de la concorde qui se retreuve entre ces deux ieunes Sauvages, si qu'on ne les a iamais veu se quereler l'un l'autre : Je sçay bien qu'il y a de la nature, & qu'une mesme langue, & les mesmes exercices leur lient naturellement les cœurs, mais aussi s'apperçoit-on bien de la grace qui agit là dedans, en sorte qu'ils se preuiennent l'un l'autre avec des motifs d'une veritable charité. Le Chapitre suivant fera voir comme ils ont bien reüssy en leur pays.

C H A P I T R E X.

Continuation du Seminaire.

A Pres le depart de la flotte de l'année passée, les nouvelles que nous receuiôs des Hurons alloient tousiours de mal en pis, si bien que nous n'attendions qu'un massacre general de nos Peres & de nos François en ce pais-là, ou quelque effect extraordinaire de la douce prouidence du grand Dieu en leur endroit. Nous auons passé l'hyuer dans ces craintes & dans ces esperances, sollicitans le Ciel de respendre ses benedictions sur ceux

qui nous chargeoient de mille maledictions. En fin le printemps venu, Mr le Cheualier de Montmagny nostre Gouverneur, homme vraiment sage & prudent, voulant conseruer la Religion en ces contrées, & le commerce de ces peuples avec nos François, se delibera d'y enuoyer quelques-vns de ses hommes, pour sçauoir en quel estat estoient les affaires: mais comme on auoit peur qu'un petit nombre de François ne fussent massacrés des Hurons au cas qu'ils nous eussent déclaré la guerre, nos Seminaristes se presenterent pour rendre ce seruice à Dieu, à Mr nostre Gouverneur, & à tous ces Messieurs de la Nouvelle France. On les fit promptement équiper avec vn ieune François bien courageux: & pour conseruer ces deux ieunes Neophytes, nous enuoiâmes avec eux le P. qui les auoit instruit au Seminaire, afin de nous les ramener, au cas que tous nos Peres & nos François fussent mis à mort par vne conspiration generale de tout le pais. Que si ce meurtre prouenoit seulement de quelques particuliers, ils auoient ordre d'asseurer les innocens de l'amitié des François. Les voila donc embarqués avec des Algonquins qui vont comme le vent malgré le courant des eaux merueilleusement grosses & rapides au Printemps, à raison d'une infinité de neiges fonduës qui se viennent ietter dans les grands fleuves. Je serois trop long si ie voulois rapporter toutes les particularités de ce voiage, ie me contenteray d'en toucher quelques-vnes en passant.

Comme nous auons fait publiquement prier Dieu nos Sauvages, soit à Kebec, soit aux trois Riuieres, soit en la Riuere des prairies; le bruit de

cette bonne action s'estant respandu par tout, les Algonquins voulurent estre de la partie, ils prirent le Pere de les instruire: mais cōme il ne scauoit pas la langue, il prit quelques Litanies que nous auōs dressées des attributs de Dieu, & leur fit chanter tous les soirs, & tous les matins, faisant le mesme dans les nations qu'ils rencontroient. Ces peuples publians volontiers en leur lāgue les grādeurs du maistre qu'ils ne cognoissent pas encor. Ils n'estoient pas trop auancés dans leurs voyages, qu'une disgrace arriua à l'un de nos deux Seminartistes nommé Armand: doublant vne pointe, les bouillons d'eau comme d'une grosse marée, venant à choquer son canot, le renuerferent, & tout ce qui estoit dedans, en sorte qu'on croioit que tout fust perdu. Le ieune Algonquin qui n'auoit rien que son corps dans le canot, ne pensa qu'à se sauuer; il fut bien-tost à bord hors du danger: mais Armand voulant sauuer vne Chapelle que le Pere portoit pour dire la sainte Messe, & quantité de pourcelaine, & autre bagage renfermé dās vne caisse, s'engagea si auant qu'on le perdit de veüe: voila la caisse & le calice, & l'aube, & la chasuble, & tout son equipage abysmé d'un costé, & luy de l'autre. Le P. ne le voiant plus en terre ny sur les eaux, le cherche au Ciel, se iettant à genoux au coing d'un bois. Ce pauvre ieune Chrestien aiant combattu contre la mort iusques à auoir les mains toutes écorchées, & le corps tout brisé, se trouue assis au fond de l'eau sur vne roche: il en fait vne Chapelle plus fauorable que celle qu'il venoit de perdre: ie veux dire qu'il s'adresse à Dieu du fond des abysses, non de la bouche qu'il

tenoit bien fermée, mais du cœur, qu'il respandit deuant sa bonté. Vous estes le Maître de la vie, luy disoit-il, la mienne n'est plus à moy, car ie ne la scaurois conseruer, vous pouués tout, laissez-moy mourir, faites-moy reuiure, vous estes mon Dieu. A peine son ame auoit-elle poussé ces affectiōs, que sō corps se vit esleué sur l'eau, où il rencontre des brossailles qu'il attrappe en telle sorte, qu'il trouua tousiours de quoy se retirer iusques au bord du torrent malgré sa rapidité: ses cōpagnons l'ayant veu disparoistre, regardoient si les ondes ne ietteroiēt point vn corps mort; quand ils en virent vn viuant, ils s'escrierent de ioye, le P. accourt pour voir son pauvre nourrisson ressusité. La perte que ce ieune homme venoit de faire des ornemens Ecclesiastiques, le rendoit confus, & le iettoit dans des excuses, quand le P. l'embrassant, luy dit; C'est assés, mon fils, c'est assés que vous soies viuant, ne parlons point de nostre perte, mais benissons Dieu de ce qu'il vous a retiré de la mort.

A peine ce ieune homme estoit-il retiré de ce danger, que le P. tombe dans vn autre. Les canots s'estans leparés, celui qui menoit le P. demeura le dernier: comme ils arriuerent à vne iournée de l'isle, il fallut aller à pied, le pauvre P. pensa mourir en ce chemin; voicy comme il m'en rescrit. Nous partismes dès le grand matin sans boire ny manger, nous cheminions à grand pas par vn tres-mauuais chemin, & dans de grandes chaleurs; i'estois chargé de mō petit bagage, ie croiois que mes gens s'arresteroient sur le Midy pour manger: mais ils me laisserent derriere, gagnant tousiours pais: ma foiblesse croissant avec

la chaleur du iour, ie demeure là comme tout euanouïy, ie me iette à terre n'en pouuant plus; puis aiant pris vn peu de repos, ie trouue trois ou quatre groseilles qui ne me soulagerent pas beaucoup, car voulant reprendre mon chemin, ie fus contraint de me coucher vne autre-fois, tant i'auois de mal à la teste, & de foiblesse par tout le corps. Ie me souuenois assez de la pauvre Agar, & du Prophete Elie, que Dieu auoit secourus dans leurs necessités, mais mes pechés me defendoient d'esperer cette faueur temporelle: mon ame neâtmoins se consoloit se voiant partir de ce monde par obeïssance, au cas qu'on ne me vint point secourir, ie demeuray vne heure ou deux en cét état, quand mes gens s'estans apperceu que ie tardois trop, me vindrent chercher, ie leur demanday vn peu à manger, mais ils me respondirent qu'ils n'auoient rien: ils prennent mon petit bagage, & m'excitent à prendre cœur: nous trouuasmes vn ruisseau qui me rafraischit, & qui me donna quelques forces pour arriuer sur le soir à l'isle, où ie trouuay mes Seminaristes, & nostre François biē en peine; car ils m'attendoient depuis deux iours: Ie fis rencontre de quelques Hurons, parens de nostre Armand, avec lesquels ie me retiray. Les Algonquins m'enuoierent querir sur le soir pour les faire prier Dieu, & pour chanter les Litanies en leur langue dans leurs cabanes. Ma debilité ne me pût empescher de leur donner ce contentement, qui m'estoit plus doux qu'à eux mesme. En fin nous apprismes icy que nos Peres & nos François se portoient bien aux Hurons, & qu'ils nous raconteroient à nostre arriuée les dangers qu'ils auoient

en l'année 1638.

65

auoient encourus pendant l'hyuer. Apres nous
estre rafraichis quelque temps dās cette isle, nous
nous embarquāmes avec les Hurons, quittans les
Algonquins en leur païs : à deux iours delà nous
trouuāsmes les amis & les alliés de Ioseph Thera-
thiron qui descendoient vers les François : ie fus
d'aduis qu'il se mit en leur cōpagnie, pour passer
encor vn hyuer à Kébec, afin de s'y fortifier da-
uantage en la Foy. Bref, continuant nostre route,
nous arriuāsmes aux Hurons le 9. de Iuillet, estāt
partis de la Riuiere aux prairies le 11. Iuin, feste
de S. Barnabé. Voila vne partie des choses que le
Pere m'escriuoit, Dieu sçait quel contentement
receurent nos Peres à cette entreueuē, ils se con-
soloient tous comme des gens retirés du tōbeau,
quoy qu'en diuerses façons; ie ne racōteray point
les persecutions qu'ils auoient souffertes pendāt
tout l'hyuer. La Relatiō qu'ils m'ont enuoyée, &
que i'adresse à V. R. rapporte tout cela; ie diray
seulement qu'ils furent bien estonnez de voir les
deportemens de nostre Seminariste : ce ieune hō-
me s'estant retiré dans sa bourgade, deuiant Pre-
dicateur, il loüe nostre foy, dit mille biens de la li-
beralité des François, crie par tout que nous som-
mes les Peres de tous ces peuples, que nous leur
venons annoncer des paroles de vie, il ne peut
souffrir qu'on nous soupçōne d'auoir causé leurs
maladies: la honte naturelle aux ieunes Sauvages
deuant les vieillards, est bānie de son cœur, la foy
le rend hardy comme vn lion, ses gens l'escou-
tent, admirent ses discours, quittent petit à petit
les pensées noires qu'ils auoient pris de nous. La
vertu & la chasteté de ce nouveau Predicateur les,

E

rauit; voicy ce qu'en mande vn de nos Peres. Priez Dieu pour nostre pauvre Armand, il fait merueille, mais il est au milieu des perils; il couche dans les cabanes des Hurons ses parens, où les filles fônt gloire de rechercher les ieunes hommes, il a rendu de grands cōbats & remporté de signalées victoires, il tesmoigne hautement qu'il est Chrestien, & qu'il se veut comporter comme tel en toutes ses actions; il se vient confesser & communier tous les Dimanches en la bourgade où nous sommes, esloignée d'une bonne lieue de la sienne: nous estions si décriés dans cette bourgade, que plusieurs personnes sont mortes cét hyuer sans Baptême, pource que nous n'en osions approcher, les enfans mesmes nous regardoient cōme des sorciers, & comme des empoisonneurs, si bien qu'un Pere se trouuant avec ce Neophyte, vn petit enfant voyant qu'on luy faisoit bon visage, demanda à ses parens si les François ne faisoient plus mourir les Hurons. Que le Ciel donne à iamais des benedictions à ceux qui ont soustenu & qui soustiennent les Seminaires des Sauvages. Dites moy, ie vous prie, toutes les grandes despêses qu'on a faites iusques à present pour establir & pour conseruer ce Seminaire, & les autres, peuuent-elles estre mises en parangon avec le fruit que ce ieune homme a commencé de faire? En verité nous sommes dans l'estonnement & dans les benedictions de Dieu, voyans ce que nous n'osions attēdre d'une plante née au milieu de la Barbarie, & si nouuellement entée en l'Eglise de Dieu.

Nos Peres des Hurons voyans le fruit que fai-

soit ce ieune homme, & cōme dès cēt hyuer prochain, peut-estre deux de nos Peres iront demeurer avec luy en sa bourgade, nous rescriuent que nous leur renuoyassions au plustost Ioseph Thexathiron, pour auoir vn autre Predicateur en la ville ou bourgade bien belle, & biē peuplée, nous coniuans de faire nos efforts, d'arrester autant que nous pourrions de ieunes Hurons qui voudroient rester au Seminaire, qu'ils n'auoient osé en demāder sur le pais dans la difficulté du tēps, & pour les dangers qui sont sur la riuere qui les doit apporter: nous y ferons nos efforts, on nous en a desia donné quelques-vns; mais comme ce peuple descend cette année à la debandade, ie ne scay pas le nombre que nous pourrons auoir. Il s'en presente assez de grands, & de fort aagez, mais nous craignons qu'ils n'enleuent les plus ieunes. Entre ceux que nous auons rebutez, il s'est trouué vn homme aagé de plus de 40. ans, lequel a voulu demeurer à toute force: voiant que nous luy fermions l'oreille, il est allé prier nos Frāçois de le receuoir avec eux, s'adressant tantost à l'vn, tantost à l'autre. Si on craint que ie ne dérobe, disoit il, tenez voyla mon bagage que ie ne renuoye point au pais, ie ne scaurois commettre larcin qui vaille cela, Thexathiron que i'ay rencontré en chemin (c'est nostre Seminariste Ioseph) m'a tant dit de bien des Frāçois & de leur creance, que ie veux croire en Dieu, & demeurer avec eux pour estre instruit. Il tira vn Chapelet en nostre presence que ce ieune Seminariste luy auoit donné pour tesmoignage qu'il vouloit estre Chretien, neantmoins comme cōs peuples sont assez

diffimulez, nous l'auons laissé aux trois Riuieres pour l'esprouuer dauantage. Ce pauvre homme nous faisoit compassion, car il pressoit la larme à l'œil. Si ces compatriotes qui doiuent encor descendre ne l'esbranlent point, nous le receurons: nous n'auons que trop de cœur pour luy, mais comme il est aagé, & par consequent plus attaché à ses volontez que les ieunes gens, nous auons peur qu'il ne se iette dans quelque débauche.

Au reste, ie voy bien que si Dieu nous en donne beaucoup, nous serons accablez; car au lieu d'un Seminaire, en voyla trois sur pied dans peu de temps, l'un d'Algonquins, l'autre de Montagnets, & le troisieme des Hurons. On m'a donné sept petits enfans, tant Montagnets qu'Algonquins, il les faut pouruoir: on m'en presente encor 4. ou 5. autres pour mettre au Seminaire, & on m'a promis d'en amener encor au Printemps: ie ne sçay comment satisfaire à tout cela, ie me trompe, la main de Dieu est grande, son cœur est plus grand que le nostre, tous les ans il me semble que nous allons manquer de forces, & tous les ans ie voy croistre à proportion que les occasions d'exercer la charité se presentent. *Confide in Domino, & dabit tibi petitiones cordis tui* Nous luy demandons le salut de ces pauvres Sauvages, dont nous en auons quinze sur les bras, qu'il faut nourrir & secourir plus particulierement que les autres, auxquels il faut faire l'aumosne de temps en temps, iusques à ce qu'ils soient en estat de tirer leur vie de la terre. Outre ceux-cy, on auoit donné deux enfans à Monsieur Gand, l'un desquels est monté au Ciel apres son Baptisme, il

fait esleuer l'autre avec vn grand amour, il rend bien d'autres secours à ces pauvres peuples. Le sieur Oliuier a aussi deux petites filles Sauvages, & vn petit garçon, comme il est icy Commis au Magazin de Messieurs de la Nouvelle France, ie ne doute point que ces Messieurs ne seruent de bras droit à la charité qu'ils exercent enuers ces ieunes plantes de l'Eglise de Dieu.

CHAPITRE XI.

Ramas de diuerses choses.

LE iour de S. Barnabé nous auons eu vn tremble-terre en quelques endroits, il se fit si bien sentir, que les Sauvages estoient bien estonnez de voir leurs plats d'escorces se choquer les vns les autres, & l'eau sortir de leurs chaudieres. Cela leur fit ietter vn grand cry plein d'estonnement.

Voicy vne façon gentille de terminer vn procès. Vn Sauvage s'estant esloigné du pais pour ie ne sçay quel sujet, sa femme se voyât recherchée dans son absence, en espouse vn autre : quelques mois apres ce secondes nopces, le premier mary retourne & veut rauoir sa femme : l'autre ne la voulant pas rendre, les voyla en procès, le pere de cette femme iugea ce differét en dernier ressort : il préd vn baston, le porte vn peu loin, le fiche en terre, puis s'adressât aux plaideurs, leur dit. Celuy qui rapportera le premier ce baston aura ma fille, eux de courre. La femme fut adiugée à celuy qui auoit meilleures jambes, & le procès fut tellemēt

esteint, qu'il n'en fut plus parlé que pour rire. Ce trait est aussi gaillard que l'inconstance dans leurs mariages nous causera de tristesse. Le lien si serré qui tient l'homme & la femme sous vn mesme joug, aura bien de la peine d'y arrester les Sauvages. Messieurs de la Nouvelle France me semblēt auoir apporté quelque cōmencement de remede à ce malheur: veritablement ils sont loüables pour l'affection qu'ils portent au salut de ces pauvres peuples. J'apprend qu'ils ont donné cette année quatre arpens de terre defrichée à deux ieunes filles Sauvages qui se marieroient à quelques Chrestiens, sans preiudice du secours qu'ils pourrōnt dōner aux autres à l'aduenir. Je les remercie de tout mō cœur de cette charité au nō de deux Neophytes à qui cette aumosne est desia destinée. Ce sont deux ieunes filles baptisées, dont les bons Anges ne seront pas ingrats enuers ces Messieurs. Vne honneste Dame dont on ne m'a point escrit le nom, a fait present d'vne bonne piece d'argent pour marier aussi quelque fille Sauvage baptisée. Tout cela est desia appliqué. Dieu qui pouruoit aux petits oiseaux du Ciel, benira ces ames d'eslite, puis qu'elles prennent les interests de Iesus Christ son Fils en la personne de ces nouveaux enfans. Voila iustement les moiens de rendre les mariages des Sauvages stables & indissolubles. Car vn mary ne quittera pas si aisément vne femme qui lui apporte vn honeste dot, & vne femme ayant ses biens aupres de nos habitations Françoises, ne s'en esloignera pas facilement non plus que de son mary. Adioustez que s'estas donnez parole prez de nos Autels, la crainte des loix

es retiendra dans le deuoir. Les biens qu'on fait & qu'on procure à ces pauvres Neophytes, donne vn puissant empire sur eux à ceux qui les gouvernent, & vne grande autorité à la foy Chrestienne pour se faire rendre obeïssance : En voicy vn exemple.

Quatre cabanes affligées de maladies, se voyant vn peu secouruës par nostre entremise, se sont assemblées en cōseil, où ceux qui sōt encor en santé, ont cōclud qu'il falloit croire en Dieu, & auoir recours à sa bonté. Voila la premiere assemblée qu'ils ont faite entre eux purement pour la Foy, l'autāt plus remarquable, qu'en même temps Mr nostre Gouverneur nous parloit de les secourir forttement, & pour la foy & pour leur maladie; si bien qu'eux & nous sans sçauoir rien l'vn de l'autre, estions assemblés pour le mesme sujet. Depuis ce temps-là ils n'ont point māqué, tant qu'ils ont esté proches de nos demeures, de venir tous les iours soir & matin à la Chapelle pour prier Dieu, & pour estre instruits en sa doctrine. I'apprend que Makheabichtichis parla le premier en ce conseil, & dit; Mes compatriottes, i'ay presté l'oreille vn lōg temps aux Peres, ce qu'ils m'ont enseigné est tres-bon: ie leur auois promis de croire en Dieu, i'ay manqué de parole, i'en suis marry: cest à ce coup qu'ils feront preuue de ma constance. Sus, rangeons nous tous sous la protection de celui qui a tout fait; ne perdōs point courage, quelqu'vn de vous luy promet de croire en luy, qu'il tienne sa parole, & n'imite pas mon inconstance. En suite de ces bōnes resolutions, les Sauvages de ces quatre cabanes se trouuerent tous en

nostre maison le iour de la glorieuse Assomption de la Vierge, afin d'assister à la processio que nous fismes pour recognoistre cette grande Princeesse comme Superieure & protectrice de l'un & l'autre France, selon les saintes affections de nostre bon Roy, & encor pour benir Dieu de ce qu'il a pleu à sa bonté de luy dōner vn enfant de miracle & de benedictio. Mr nostre Gouverneur n'oublia rien de toute la magnificēce possible pour honorer cette processio. Il faisoit beau voir vne escoüade de Sauvages marcher après les François avec leurs robes peintes, & figurées, tous deux à deux, & fort modestement. Les hayes de soldats en diuers endroits les saluent de mousquetades, les canons qui estoient sur la terre & sur l'eau, ioüans vn bel ordre, causoient ie ne sçay qu'elle resiouissance, accompagnée d'une sainte deuotio que tous offroient à Dieu pour l'accomplissement des desseins de nostre grand Roy, & pour le salut de ces peuples. En ce mesme tēps trois iongleurs ou sorciers, nous apportèrent cinq tambours, dont ils s'estoient seruis dans leurs Sabbats, protestans par cette action qu'ils abandonnoient le party de Belial pour suiure Iesus Christ. Comme ce Chapitre n'est qu'un ramas de diuerses choses qui n'ont point de liaison, il contiendra quelques articles bien differens les vns des autres: voicy vne nouuelle assez fascheuse.

Le Pere Hierosme Lalemant nous ayant quitté pour aller aux Hurons, fit rencōtre en chemin de quatre cabanes d'Algonquins de l'Isle, les Hurons qui les menaient mettans pied à terre, entrèrent dans l'une de ces cabanes, & le Pere se
retira

se retira à part pour prier Dieu; mais on le fit bien-tost appeller, & on luy fit signe qu'il mit au pres d'un certain Sauvage de mauuaise façon. Celuy-cy voyant le Pere, entrer en cholere, & se plaint de ce qu'un François passé par là depuis peu de iours, auoit saigné l'un de ses malades, dont la mort s'en estoit ensuiuie: Là dessus se mettant en humeur & en furie, il me monstre vn licol, & vne hache (dit le P. qui m'a rescrit toute cette tragicomédie) me faisant signe qu'il failloit mourir! En suite il dispose ce cordeau par vn nœud courant, & avec vne action de furieux & d'enragé, il me prend la teste avec les deux mains pour me la faire passer dans ce licol; ie l'arreste avec la main, luy faisant entendre mon innocēce le mieux qu'il m'estoit possible. Luy se mocquant de tout cela, deuenoit tousiours plus furieux, & leuant la hache, me donne à entendre que si ie ne finissois par l'un, ie finirois par l'autre. Voyant que le colet de ma sotanne l'empeschoit de m'estrangler, il s'efforça de la degraffer. Dans cette contraste nos Hurons petunoiet sans dire vn seul mot; deux de nos François qui estoient hors la cabane coururent aux armes, mais ie les arrestay de peur de plus grand mal-heur, les aduertissant qu'ils agissent plustost avec les Hurons qui nous auoient pris en leur protection & sauuegarde. Enfin ce barbare fit sortir nos Hurons de la cabane, & me tirant par vn pied, me retint prisonnier pour m'expedier. Les Hurons venoient par fois regarder dans la cabane ce qu'on y faisoit, disans qu'ils demureroiet là toute la nuit, pour auiser à ce qu'ils auoient à faire, se portans pour respondant de ma

personne, au cas qu'on me voulut deliurer; ce qui fit que ce barbare me lascha. Je m'en retournay dire mon breuiare, & nos Hurons s'en vont au conseil, dans lequel ils arrestét de faire des presens à cét homme forcené; Ils le font venir en leur cabane, pour luy donner des haches & vne lame d'espee: Le plus âgé de nos Hurons leuant ces haches l'une apres l'autre, s'escrioit à chacune; Voila pour deliurer les François qui sont avec nous. Ce barbare ayant regardé toutes ces haches, dit; La pensee de tuer les François commence à sortir de mon esprit; mais à ce que ie sois content, & qu'elle sorte toute à fait, il me faut encore vne chaudiere: ne s'en trouuant point, il demande en la place vne chemise; on la luy donne, alors il tesmoigna d'estre parfaitement content; & se faisant apporter vn plat d'écorce plain d'eau, il en laue sa face & ses yeux, puis auant le reste; voila; dit-il, pour essuyer mes larmes & changer mon visage; voila pour aualer toute l'amertume & le fiel de ma cholere: ie ne suis plus fasché. Là dessus s'en va emportant les presens. Estant de retour en sa cabane, il enuoya la chair d'un Castor à nos gens pour tesmoignage de reconciliation. Nos Hurons m'ont fort pressé decrire cette histoire à Monsieur le Gouverneur; Le desplaisir qu'ils ont de ce qui s'est passé en a tellement irrité l'un d'eux, qu'il pensa tuer ce barbare d'un coup de hache le lendemain matin. Il ne m'est pas possible d'escrire dauantage, les Maringuoins ou cousins me massacrent à milliasse, ne me donnant pas la permission d'escrire vne seule syllabe sans douleur. C'est bien à ce coup qu'il me faut par-

donner si i'escris mal, & m'excuser aupres de Monsieur le Gouverneur, dont ie ne vous puis dire la charité pendant que i'ay eu l'honneur d'estre avec luy. C'est l'invariable, & tousiours luy-mesme, & tousiours l'incomparable. Dieu le benisse à jamais. Tout cecy est tiré des lettres du Pere. Je me promets bien que Monsieur le Cheualier de Montmagny ne manquera pas d'arrester l'orgueil de cet Insulaire.

Le Pere Le Moine que nous enuoyons aussi aux Hurons a couru vne autre fortune nō moins dangereuse. Ses gens ayāt gaspillé les viures qu'o leur auoit donné, voire meisme en ayant védu vne partie aux Algonquins, desembarquerent le Pere & deux Francois qui estoient avec luy. D'autres Francois descendans des Hurons se trouuerent à ce beau rencontre; & comme ils tãçoient ces barbares de n'auoir pas conserué leurs viures, ils repartirent qu'ils estoient courageux, & qu'ils passeroient bien huit iours sans manger. Ces Francois fierent donner au Pere vn peu de bled & de farine d'Inde pour viure dans le grand desert où il estoit abandonné, en attédant que l'vn des canots qui descendoient le prit en repassant. Le pauvre Pere m'escruiuit son desastre en peu de mots.

Ie ne scay si mes pechez me ferment la porte au pays que i'ay tant désiré; mais quoy que s'en soit, me voila dégradé & delaisné à vne pointe de sable au delà de la petite nation des Algonquins, n'ayāt point d'autre maison que le grand monde: Il n'y a que trois iours que l'vn des canots qui portoit nostre petit bagage tourna dans l'eau; Nos paquets furent emportees par le courāt, nous en re-

76 *Relation de la Nouu. France,*

pechafme vn avec grande peine, l'autre fut perdu; Dieu soit beny de tout.

J'ay desia dit cōme le Pere qui remenoit les Seminaristes. Hurōs, auoit aussi perdu sō equipage dans le mesme chemin. Si les Sauvages se riēt dedās leurs pertes, nous ne de deuōs pas pleurer dedās les nostres, puisq; Dieu les sçaura biē reparer.

Le Pere du Perron qui monte aussi là haut aura peut-estre vn plus heureux succes que ces trois premiers, sa gayeté à son depart, & l'honneur que luy fit Monsieur nostre Gouverneur aussi-bien qu'aux autres, ietta les Sauvages dās vne allegresse qui nous promet quelque chose de bon; celuy qui le mene nous dit en s'embarquant: Je suis Capitaine, il ne peut arriuer aucun mal au Pere en ma presenee, ils nous promirent de prendre en passant le Pere le Moine, & les François qui estoient avec luy.

Voicy vn bout de lettre du Pere que j'ay laissé à la residence de S. Ioseph, où les Sauvages se rendent sedentaires. Apprenant qu'une barque mōtoit aux trois Riuieres; ie dy aux Sauvages, que voulez-vous que i'escriue au Pere le Jeune par la barque qui doit monter là haut: Tu luy manderas, me respondirent-ils vniuersellement, que nous desirons tous croire en Dieu, que nous voulons tous estre baptisez, & que nous le prions qu'il retourne au plustost çà bas pour nous donner le Baptisme. Ayant receu cette responce, ie me retiray plein de consolation; n'en auois-je pas bien suiet? Ce sont les propres mots du Pere. Si tost que ie suis descendu à Kébec, ces bon Sauvages me vindrent voir, les Chrestiens se confesse-

rent & cōmunierent ceux qui ne sont pas encore baptisez me presserent de leur dōner le Baptisme; Le mesme Pere m'escriuit vne autrefois en ces termes Makheabichtichou, Pigarouich, Oucheskouetou, & plusieurs autres Sauuages sont arriues à S. Ioseph: mettant pied à terre, ils sont venus droit en ma chambre pour les conduire en la Chapelle, afin de remercier Dieu de ce qu'il les auoit conseruez dans leur voyages; ne m'ayant point trouué, ils ont esté prier vn autre de nos Peres qui estoit icy, lequel s'excusant sur le peu de connoissance qu'il a de la langue, ils ont pris Paul le bon aueugle, l'ont mené à la Chapelle, & l'on fait prier Dieu. Ce bon Neophyte leur a fait faire les prieres qu'il recite soir & matin. Que pouuez-vous esperer dauantage des Sauuages? On croyoit que ces pauvres errans seroient les derniers à se ranger, & ils se presentent des premiers, aidez-les à cultiuer la terre, & à se loger, & vous les aurez tous.

Le Pere Charles Lalement qui passe en France pour nos petites affaires au lieu du Pere Quentin, qui a esté enuoyé à Miskou, dira de bouche ce que ie ne puis coucher sur le papier sans lōgueur.

Il est temps de tirer à la fin; Je croy que ie n'ay point contreuenu à la resolution que i'auois prise d'estre court, puisque i'obmets quantité de choses de peur d'estre long. J'auray cette consolation cette année que disant pen, il se glissera peu de fautes sous le rouleau de la presse.

La Relation de l'année passée en est remplie: il faut que i'écotte vne pour inuiter l'Imprimeur à prendre quelque jalousie de son ouurage. Au

Chapitre 8. page 145. où il s'agit de quelque prise que j'eus avec un sorcier; au lieu de me servir d'exorcismes contre le diable, l'Imprimeur me fait servir d'une espee. Voicy ce que j'auois couché dans l'original. En effet j'auois dessein de me servir d'une espee d'exorcismes, l'Imprimeur a mis; En effet j'auois dessein de me servir d'une espee désormais. Je vous confesse que ce beau rencontre m'a fait rire. Quand on parle de si loing, on ne fait pas si bien entendre ses pensées, l'écriture est une parole muette, qui se change aussi facilement, qu'il est aisé de prendre un Caractere pour un autre: on fait dire à un enfant ce qu'on veut quand son pere est absent. C'est assez pour ce coup.

Cependant nous demanderons à Dieu sa grande benediction pour ces ames d'élite, qui par leurs mains & par leurs vœux attirent nos pauvres Sauvages à Iesus-Christ. Nous coniurons tous V. R. & tous nos Peres & nos Freres de la Prouince, de joindre vos prieres avec les nostres, afin que nostre recognoissance aupres de Dieu attire les graces & les faueurs du Ciel, & sur nostre Colonie, & sur nos Neophytes, & sur ces pauvres peuples, & sur ses enfans, lesquels se professent tous en general, & moy en particulier; ce que ie suis de tout mon cœur.

DE V. R,

Tres-humble & tres-obligé seruiteur
selon Dieu PAVL LE IEVNE.

*Aux trois Riuieres en la Residence
de la Conception, ce 25. d'Aoust 1638.*

*Mont. This is in the way
Huron. - It is the same as the
2^d part of the Relation printed
in 1640*

RELATION

DE CE QUI S'EST PASSE'

dans le pays

DES HVRONS

és années 1637. & 1638.

RELATION

DE CH. G. WEST

1847

DES HARORS

ES. 1847. 1848.



RELATION

DE CE QVI S'EST PASSE'
en la Mission de la Compagnie
de IESVS dans le

PAYS DES HVRONS

EN L'ANNEE 1637. & 38.

*Enuoyée à K'ébec au R. P. Paul le Jeune,
Superieur des Missions de la Compagnie
de IESVS en la nouvelle France.*

MON REVEREND PERE,

PAX CHRISTI.



OSTRE REVERENCE,

Nous à tous extremement
consolez par ses dernieres, de
nous mander qu'elle nous por-
te plus d'enuie que de compas-
sion, nous voyant de tous co-
stez chargez de horribles calomnies ; & enten-
dant que nous sommes dans des perils de mort

A

2 *Relation de la Nouu. France,*

presque continuels. Ce qu'elle en apprist l'an passé, n'estoit que des dispositions à ce qui est depuis arriué; ce n'estoit que des bruits qui couroient assez confusement dans le païs; & ces discours qui s'estoient tenus si souuent pendant tout l'hyuer dans les festins, & les conseils des Sauvages, n'auoient esté que de simples paroles, & des menaces de personnes assez peu considerables. Mais depuis le depart des canots pour la traite de Kébec; la maladie qui n'auoit encor accueilly que quelques bourgades, s'estant répandue vniuersellement par tout, toutes ces Nations se sont declarées ouuertement dans des assemblées generales faites à ce dessein, nous y auons comparu en personne, nous y auons ouy les depositions faites contre nous de la bouche des chefs du païs: nos Amis ne nous auoient point dissimulé leur sentiment touchant les dangers auxquels nous estions; ils nous auoient mesme demandé des lettres de confiance pour pouoir par apres en toute seureté descendre à Kébec, & y porter la nouuelle de nostre mort, nous auons desia fait nostre testament, & couché nos dernieres paroles, pour faire entendre que nous nous estimions trop heureux de mourir enfans de la Compagnie, & de répandre nostre sang pour la conuersion de ces pauures peuples.

Le Diable se sentoit pressé de près, il ne pouoit supporter le Baptisme sonnel de quelques Sauvages des plus signalez. Mais Dieu luy a enfin lié les bras, pour donner cours à ses misericordes, & nous faire voir vn autre Ioseph dans cet Egypte, qui est desia si auant dans ses bonnes

en l'année 1637. & 38.

3

graces, qu'il semble luy avoir mis entre les mains la disposition de ses thresors, pour les ouvrir à ses freres, les tirer de la misere, & leur donner entrée dans la cour du Roy du ciel & de la terre. Son exemple en a desia touché plusieurs, & des meilleurs esprits, qui pensent à l'imiter. On sera consolé de voir que ces peuples sont non seulement capables de nos Saints mysteres, mais mesme d'une vertu non commune.

Ie m'en vay ramasser ce qui est de plus memorable sous quelques Chapitres, que i'estendray selon le temps que Dieu me donnera.

CHAPITRE PREMIER.

*Des Persecutions que nous auons souffert
en l'année 1637.*

IE dis vn mot l'an passé de nostre nouvelle Residence en la bourgade qui est comme le cœur du païs. Nostre cabane n'estoit pas encore demy-faite qu'elle attiroit ces peuples de toutes parts pour nous venir voir : la foule y estoit si grande, que c'estoit vn plus que suffisant employ que de prendre garde à leurs mains, outre le grand nombre de malades qu'il falloit continuellement visiter.

Nos Peres auoient dressé comme vne maniere d'Autel, où ils auoient placé quelques petits tableaux, pour prendre de là sujet de leur faire entendre quel estoit le principal motif qui nous amenoit icy, & nous auoit attiré dans leur bourg.

A ij

4 *Relation de la Nouu. France,*

Toute la Cabane retentist de voix d'admiration à la veüe de ces objects extraordinaires ; sur tout ils ne pouuoient se lasser de regarder deux tableaux ; l'un de Nostre Seigneur, & l'autre de Nostre Dame, nous auions de la peine à leur faire croire, que ce ne fust que des plates peintures, aussi les pieces sont-elles de grandeur naturelle, car les petites figures ne font que fort peu d'impression sur leurs esprits. Il nous les fallut laisser exposées tout le iour, pour contenter tout le monde.

Ceste premiere veüe nous cousta bien cher ; car sans parler de l'importunité que nous ont depuis causé les curieux, c'est à dire, tout autant de personnes qui arriuent des autres bourgades, si nous en auons tiré quelque aduantage pour leur parler de nos Saints mysteres, & les disposer à la cognoissance du vray Dieu, plusieurs en ont pris sujet de semer de nouveaux bruits, & authentifier les premieres calomnies, sçauoir est que nous faisons mourir ces peuples par nos Images.

Dans peu de iours le pais se trouua tout à fait imbu de ceste opinion, qu'infailiblement nous estions les auteurs de ceste contagion si vniuerselle. Il y a bien de l'apparence que ceux qui trouuoient ces calomnies n'en croyoient rien ; neantmoins ils parloient en termes si exprez, que la pluspart n'en doutoit plus. Les femmes & les enfans nous regardoient comme des personnes qui leur portions malheur. Dieu soit beny à iamais, qui a voulu que l'espace de trois ou quatre mois qu'a duré le fort de ceste persecu-

en l'année 1637. & 38.

S

tions, nous ayons esté priuez quasi de toute consolation humaine. Ceux de nostre bourgade sembloient nous espargner plus que les autres; neantmoins ces mauuais bruits estoient si constants, & seruoient d'entretien si ordinaire dans les assemblées, qu'ils entrèrent bien fort dans le soupçon: & les plus notables qui nous auoient aymez, & auoient cōstume de parler en nostre faueur, en perdirent tout à fait la parole, & quand on les obligeoit de parler, ils auoient recours aux excuses, & se iustifioient le mieux qu'ils pouuoient de ce qu'ils nous auoient basti vne cabane.

Le 26. Iuin, la niepce de Pierre nostre premier Chrestien mourut, nonobstant les vœux & les prieres que nous auions fait pour sa guerison, ce fut la premiere secousse de cette famille, qui fut suiue quelque temps apres de la mort de la femme; & depuis son retour de la traite, la maladie luy enleua vne sienne fille, & son beau-frere. Plusieurs langues mesdisantes qui estoient desia d'elles-mesmes assez secondes en fourbes & calomnies, pensoient auoir vn nouueau sujet de nous ietter le chat aux jambes: alleguants pour raison, Que l'affliction n'auoit accueilly cette cabane, que depuis le Baptisme solennel de Pierre. En effect, ils auoient passé l'hyuer fort doucement, la pluspart des autres cabanes ayant esté fort mal traitez de la maladie.

Cette opinion entra si auant dans l'esprit de quelques-vns, qu'une bourgade entiere, selon le rapport qu'on nous en fist, prit resolution de ne se plus seruir des chaudieres de France, s'ima-

6 *Relation de la Nouu. France,*

ginant que tout ce qui venoit en quelque façon de nous, estoit capable de leur communiquer le mal.

Il vint vne autre nouvelle de la Nation du Petun (car ces bruits alloient croissans, mesme dans les Nations circouoises) on assura qu'un Sauvage frappé de cette maladie pestilentielle auoit vomy dans du sang vne dragée de plomb, d'où ils concludoient qu'un François l'auoit enforcé. Nous auions tous les iours à répondre à des porteurs de semblables nouvelles, & s'en trouuoit fort peu de capables des raisons que nous leur apportions, pour leur faire voir combien nous estions esloignez de ces pensées noires. Leur réponse ordinaire estoit, que cela se disoit constamment par tout, & qu'au reste toute l'Isle ou ces peuples habitent auoit la ceruelle renuersée, que la mort d'un si grand nombre de leurs parents leur auoit troublé l'esprit; & ainsi qu'il ne falloit pas s'estonner, si comme des insensés ils s'en prenoient à la volée, à tout ce qui se presentoit. Pour nostre regard, nous nous estimions trop honorez de porter les livrées de Nostre Seigneur; vne seule chose nous affligeoit, de voir l'Enfer triompher pour vn temps, & enleuer vn si grand nombre d'Ames, dont nous entendions le danger sans leur pouuoir rendre la main, & les mettre en voye de salut. Nous ne desistâmes neantmoins iamais de faire nos courses ordinaires, qu'à toute extremité, lors que nous vismes que nos saints Mysteres n'estoient plus receus avec le respect qu'ils meritent, & que nous iugeâmes que ces visites pourroient estre

preiudiciables au progrez du Saint Euan-
gile.

La mortalité estoit partout, mais sur tout au
bourg d'Angarenc qui n'estoit qu'à trois quarts
de lieuë de nous. On y fit deux voyages, mais
sans effect : nous y retournâmes le 3. de Juillet,
nous trouuâmes vn assez bon nombre de mala-
des, mais les vns s'enueloppoient dans leurs ro-
be, & se couuroient le visage de peur de nous
parler, d'autres nous voyant couroient fermer
la porte de leur cabane : nous auions desia le
pied sur la porte de deux autres, qu'on nous en
chassat, apportant pour raison qu'il y auoit des
malades. Helas c'estoit iustement ce que nous
cherchions! nous ne perdîmes pas courage pour
cela; & d'autant plus que le diable joüoit des
siennes, nous nous sentions d'autant plus inspi-
rez à ne point abandonner ce pauvre bourg.
Tout bien considéré, nous iugeâmes que ce
mauuais visage ne venoit que de ce qu'ils n'e-
stoient pas encore bien informez de ce que nous
pretendions par ces visites, car ils n'ont pas cou-
stume de s'entre-visiter ainsi les vns les autres
dâs leurs maladies, sinon entre proches parents.
Et ce leur estoit vne grande nouueauté de voir
des personnes qui ne cherchoient que des mala-
des, & encore les plus miserables & les plus
abandonnez; c'est pourquoy nous y retournâ-
mes le 8. du mesme, non tant pour les malades,
que pour voir quelques anciens, & ceux qui
auoient le maniment des affaires pour tâcher de
les rendre capables de nostre dessein. Nous
fîmes rencontre fort heureusement d'un Capi-

tain plein d'esprit, on luy fit entendre combien nos visites leur deuroient estre precieuses; il nous escouta volontiers, nous donnant parole qu'il en communiqueroit avec les Anciens, Que pour luy il nous assëuroit de sia qu'il nous verroit tous-jours de bon œil. De ce pas nous fumes voir les plus malades, mais nous n'y fumes pas mieux receus qu'au premier voyage. Vn certain Capitaine de guerre ne nous vist pas plustost à la porte de sa cabane, qu'il nous menaça de nous fendre la teste si nous passions outre.

Sur l'apresdisnée Ondesson, vn des premiers chefs de guerre de tout le pais nous vint voir avec vn autre notable d'Angotenc. Sur le sujet de nos courtes ils nous aduoüerent que plusieurs auoient peur de nous, & que pour leuer ces craintes, il seroit fort à propos de tenir conseil là dessus, où nous nous trouuerions en personne, nous ne souhaitions autre chose.

De plus, vne des grosses testes de nostre bourg nous vint tirer à l'escart, Mes nepueux (nous dit-il) i'ay vne chose d'importance à vous dire, c'est qu'Antoine (il parloit du P. Daniel) a lasché vne parole inconsiderément, qui donne bien à parler au monde. L'Esté passé vn ieune homme se faisant prier pour demeurer à Kébec, & estant sur le point de mettre le pied dans le canot, Que pense-tu faire, luy dit-il, tu vas à la mort, la peste s'en va ruiner ton pais, croy moy, passe l'hyuer avec nous, si tu veux te tirer de ce danger. Voyla ce que ie viens d'apprendre à Onnentisari, où on parle de vous autres en fort mauuais termes; on tiët tout assëuré que vous estes la cause de nostre

en l'année 1637. & 38.

9

malheur : à toutes nos raisons il n'eust autre chose à nous repliquer, sinon que cela se disoit, ce qui laissoit tousiours de fortes impressions dans leurs esprits.

Estant retournez à Angartenc pour le conseil, nous y trouuons tous les Capitaines (car il y en a plusieurs dans vn mesme bourg, selon la diuersité des affaires) qui nous firent vn assez bon accueil : le plus qualifié inuite les autres à l'assemblée, criant à pleine teste autour de la bourgade. Les Anciens, les femmes, la ieunesse, & les enfans y accourent à nostre sollicitation. L'ouuerture du conseil se fist par vn pain de Petun que nous leur presentasmes dās vn plat à la mode du païs ; vn des Capitaines le rompt, pour le distribuer aux plus considerables de la troupe ; iamais ils ne parlent d'affaires & ne tirent aucune conclusion que le calumer à la bouche, ceste fumée qui leur monte au cerueau leur donne, disent-ils, de l'esclaircissement dans les difficultez qui se presentent. Cela fait le President hausse la voix à peu prez du mesme ton que nos crieurs publics font par les carefours de France ; faisant entendre que ses Nepueux les François alloient parler, qu'on les escoutast bien, & qu'on ne s'ennuyast pas de la longueur de leur discours ; que la chose estoit d'importance, & meritoit d'estre bien conceuë. Nous leur exposasmes ce qui nous auoit amené en leur païs, & particulièrement ce que nous pretendions dans les visites de leurs malades. Ils nous escouterent avec assez d'attention ; mais lors que nous estions sur le point de conclure, on vint inuiter ces Messieurs à vn festin : & par co

que le temps pressoit, il nous fallut briser; car il n'y a affaire d'importance qu'ils ne quittét pour vn festin. Ayant donc acheué, ils se regardent quelque temps, à qui parleroit, par deferance. Enfin celuy qui presidoit prenant la parole, repeta à la haste le principal de nostre discours, & insista particulièrement sur ce que nous les ay-mions, & que ce n'estoit que par affection que nous les allions visiter, avec dessein de viure & mourir dans leur país. Vn des plus aagez adiousta qu'il seroit à propos que ceste parole retentist par toute la terre; qu'au reste nous les obligions grandement de les consoler dans leurs larmes: Que nos personnes leur estoient cheres: Que la ieunesse prist bien garde à ne pas faire vn coup dont tout le país gémiroit. Tous enfin conclurent, avec des termes pleins de bien-veillance, nous inuitant à les visiter doresnauant. Voyla le naturel du país, pour des paroles tant que vous en voudrez: nous iugeâmes pourtant que nous auions pour lors tout sujet de satisfaction.

Depuis, dans nos visites nous fîmes rencontre d'un vieillard fort malade. Nos Nepueux (nous dit-il d'abord) soyez les bien venus; il changea bien-tost de compliment quand il sceut ce qui nous amenoit, car la colere luy montant au visage, C'est vous autres, dit-il, qui me faites mourir; depuis six iours que vous mistes le pied ceans ie n'ay pas mangé, & ie vous ay veu en songe comme des personnes qui nous portez malheur, c'est vous qui me faites mourir. Notez que parmy ces peuples il n'en faut pas dire dauantage pour faire fendre la teste à vn homme. En

en l'année 1637. 38. . II

effect, nonobstant les belles promesses que ie viens de dire, nous remarquâmes par apres tant de froideur par tout, & vne si grande défiance de nous autres, que nous iugeâmes à propos de desister tout à fait de nos visites. Ioint que sur l'aduis que nous enuoya N. Pere Superieur, nous demeurâmes quelque temps à l'anchre pendant la tempeste. Il nous escriuoit de plus, qu'à l'issuë de ce festin qui auoit interrompu nostre conseil, ils s'estoient rassemblez, & auoient resolu entr'eux de tuer vn François, qui que ce fust.

Ils ne laissoient pas pourtant de nous consoler par leurs visites; Dieu ce semble nous enuoyoit les Principaux pour estre informez de nostre procedé les vns apres les autres. Ce dernier mesme qui nous chassa si rudement de sa cabane, ne feignit pas de nous dire chez nous qu'en verité il nous croyoit les auteurs de leur maladie. Vn autre se plaignit à nous qu'un sien parent auoit expiré incontinent apres nostre visite.

Si nous estions aux prises en cette habitation de la Conception, nos autres Peres ne l'estoient pas moins en celle de S. Ioseph: car cette pointe de terre se refroidissoit de plus en plus en nostre endroit, à l'occasion des calomnies que quelques mauuais esprits alloiét forgeants de iour en iour. Voicy bien d'autres bruits: quatre barques, ce dit-on, de ceux qui ne sont pas de nos parents (ils vouloient dire les Anglois) sont montez malgré tous les François, iusques à la riuiera des prairies: & ceux qui les conduisent maintiennent que les

robes noires sont la cause de toutes les maladies. Nous auions beau leur remontrer par fortes raisons comme quoy la chose sembloit incroyable, ils perseueroient dans leurs pensées.

Nostre premier Chrestien nous aduisa d'un autre bruit semblable à celuy dont nous escriuismes l'an passé, qui certes a eu vn grand cours. Sçauoir que nous auions apporté de France vn cadaure, & qu'il y auoit sans doute dans nostre tabernacle quelque chose qui les faisoit mourir. Ces pauvres gens s'en prennent à vn sort qu'ils cherchent par tout; possible que ce bon homme, ou quelqu'un de nos Neophytes aura parlé trop cruëment de ce precieux depost; car pour nous nous ne leur en parlons qu'apres vne longue espreuue de leur foy.

Ce bruit icy n'estoit pas encore estouffé, qu'il s'en esleue vn autre. Nostre crime estoit, ce disoient-ils, que nous nous estions logé au cœur du pais pour en procurer plus aisément la ruine totale; pourquoy faire nous aurions tué dans les bois vn petit enfant à coups d'alesnes, ce qui auroit causé la mort à tout plein d'enfans. Le diable enrageoit peut-estre de ce que nous auions placé dans le ciel quantité de ces petits innocents. Bref nous voyla rebutez par tout; si que taschant vn iour d'entrer dans l'esprit d'un de leurs malades, qui est icy des plus considerables, & luy & ses parens nous chanterent pouilles. Ils s'ombragent de la moindre de nos actions: qui se plaint de ce que les matins nous tenons nostre porte fermée; possible, disent-ils pour quelque sort. Qui nous soupçonne de quelque sinistre dessein, lors que

sur le soir nous chantons nos Litanies. En vn mot ils concourent tous en ce point ; que pour mettre fin à leurs miseres il falloit se desfaire de nous au plustost, ou bien nous renvoyer en France. Ny eust pas iusqu'à vne floïette que nous auions fait mettre au haut d'vn sapin qui ne leur donna matiere de parler. Car, où auez-vous l'esprit, ce dit vn des plus qualifiez, vous autres mes Ne-pueux, Que veut dire ce morceau de toile que ie voy là si haut monté ? mais ceste plainte se termina plaisamment, quand apres auoir sçeu qu'on la plaçoit-là, pour sçauoir de quel costé souffloit le vent ; il nous reprist d'y auoir espargné la toile. à ce qu'on la vist de plus loing.

Nostre horloge ne paroïssoit plus, à raison qu'ils le croyoient le Demon qui tuë ; & nos images enluminées ne leur representoient plus que ce qui arriuoit à leurs malades. A nous voir pourmener sans plus, on croyoit qu'il y eust de la forcellerie.

Voicy la nouuelle qui nous effraya le plus ; le bruit est que N. Pere Superieur auoit esté massacré. Vn Sauvage tout effaré nous la vint apporter le premier. Deux Capitaines de consideration en dirent les particularitez aux autres de nos Peres, iusques à leur nommer le meurtrier. Nous voyla enfin comme de miserables excommuniez, car pour lorstout le monde nous quitte, & on ne nous regarde plus qu'avec effroy. Cét assassinat pretendu se respandoit par tout le Païs, lors que le Pere pour nous consoler se hasta de nous venir mettre hors de peine. Il alla d'abord visiter nostre Capitaine qui l'accueillist comme vn

14 *Relation de la Nouu. France,*

homme ressuscité. Les Anciens du bourg le vinrent bienueigner les vns apres les autres: nous ne pûmes faire sçauoir de la santé du Pere, à l'habitation de saint Ioseph qu'apres la huitaine, faute de messager. Les lettres qu'ils nous escriuirent montrent euidemment que la chose passoit pour veritable parmy ceux de leur bourgade. De fait, & le peu d'estat que ces peuples font de la vie d'un homme, & la reputation de sorcier qui entraîne infailliblement la mort apres soy, nous font toucher au doigt les obligations sensibles que nous auons à celuy qui est le Maistre de nos vies.

C H A P I T R E II.

Assemblée generale de tout le pais, où on delibere de nostre mort.

IL a plu à Dieu nous exaucer, en ce qu'en fin il a fait naistre l'occasion d'une assemblée generale, pour informer les Chefs du pais de ce que nous pretendons chez eux.

Il fut question de deliberer meurement sur vne guerre, les Anciens de chaque bourg en concerterent auparauant par ensemble dans leurs conseils particuliers. Y estant inuitez nous leur fîmes vn present de trois à quatre cent grains de pourcelaine, (ce sont les pistoles du pais) c'estoit pour leur donner quelque tesmoignage comme nous prenions part aux interets du public. Or comme nous sçauions bien qu'on deuoit parler

de nous en ceste assemblée generale, le Pere Superieur tâchoit de nous purger aupres des vns & des autres en particulier sur les calomnies qu'on nous auoit imposées, mais ils estoient déjà si aigris que les Capitaines qui nous estoient les plus fauorables, luy disoient nettement que la plus grande faueur que nous pouuions esperer estoit d'estre chassés du pais, & renuoyez à Kébec.

Enfin l'ouuerture de la grande assemblée se fist sur le soir du 4. d'Aoust, où apres les complimens ordinaires on ne toucha pour ce coup que les affaires de la paix avec leurs alliez, d'où ils consulterent quasi toute la nuit, avec la prudence qu'on ne se pourroit imaginer.

Le bon fust que sur la fin du conseil N. Pere Superieur prenant sujet de respondre, tantost à l'un, tantost à l'autre de ces Conseillers sur les poincts indifferents du Ciel, du Soleil & des Astres, il tomba insensiblement sur ceux de nostre foy, & toucha puissamment ces esprits assez indifferents d'ailleurs, par la consideration des flammes eternelles.

L'autre assemblée s'ouurit sur les huit heures du soir; ce conseil estoit composé de trois Nations, sçauoir de celle dite des Ours, nos premiers hostes, qui font en tout quatorze, tant bourgs que villages; ceux-cy tenoient vn des costez de la cabane, on nous plaça au milieu du mesme costé. A l'opposite estoient les deux autres Nations, au nombre chacun de quatre bourgades bien peuplées. C'est icy qu'il s'agist du fait des robes noires, que l'on croit par tout estre

la cause de tous les malheurs du païs. Ils deferent tous la qualité de President à vn certain vieillard aueugle, vn des plus recommandables de nostre bourg, & le plus aagé de la compagnie, respecté parmy les siens, par la reputation qu'il s'estoit acquise d'homme d'esprit & de conduite. Voicy à peu près comme tout se passa.

Le premier des Capitaines met comme en la bouche d'Ontitarac (c'est ce President aueugle) les termes dont il se deuoit seruir pour faire l'ouverture du conseil. Alors ce vieillard d'yne voix tremblante, & neantmoins assez forte salua ces Nations en general, & chacun des Chefs en particulier, se conioüissant avec eux de ce qu'ils s'estoient heureusement assemblez pour deliberer sur vne affaire la plus importante qui fust dans le pays. Puis il exhorte toute l'assistance à proceder serieusement en ceste occasion, où il s'agissoit de leur conseruation; car il est question de descouvrir les auteurs de la maladie publique, & de remedier au mal; parlez donc franchement, disoit-il, & que personne ne dissimule ce qu'il sçaura estre de la verité. Là dessus le Maistre de la feste solennelle des Morts, qui est le chef du conseil de tout le païs prit la parole, & exaggera l'estat déplorable de sa nation; il conclud son discours en nous taxant comme personnes qui en auions de longue main quelque cognoissance. Il parloit si peu distinctement, que nous perdions beaucoup de ses paroles; c'est pourquoy N.P. Superieur ayant representé que, puis qu'il s'agissoit de nous, il estoit à propos que nous comprissions bien tout ce qui se diroit, pour y pouuoir respondre;

dre; nous montasmes plus haut, & prîmes place auprès de ceux qui auoient les pieces les plus sanglantes à produire contre nous.

Ie ne sçache auoir rien veu iamais de plus lugubre que ceste assemblée; du commencement ils se regardoient les vns les autres comme des cadavres, ou bien comme des hommes qui ressentent desia les affres de la mort; ils ne parloient que par souspirs, chacun se mettant à faire le denombrement des morts & des malades de sa famille. Tout cela n'estoit que pour s'animer à vomir cõtre nous avec plus d'aigreur le venin qu'ils cachotent au dedans. Il ne se trouua personne qui prist ouuertement nostre defense; & tel pensoit nous auoir grandement obligé de s'estre teû tout à fait. Ils estoient tous comme autant d'accusateurs qui pressoient viuement l'Arrest de nostre condamnation. Ils firent leur possible par leur dites & redites de surprẽdre le Pere en quelque vne de ses paroles. Deux vieillards nommément nous entreprirent, car les autres ne firent que rabattre viuement ce que ceux-cy auoient dit: l'vn d'eux parla quasi en ces termes.

Mes Freres, vous sçauetz bien que ie ne parle quasi iamais que dans nos conseils de guerre, & que ie ne me melle que des armes: neantmoins il faut que ie parle icy, puis que tous les autres Capitaines sont morts. Auant donc que ie les suiue au tombeau, il faut que ie me descharge, & peut-estre que ce sera le bien du païs qui s'en va perdu; tous les iours c'est pis que iamais, ceste cruelle maladie à tantost couru routes les cabanes de nostre bourg, & a fait vn tel rauage dans nostre fa-

mille, que nous voyla reduits à deux personnes, & encore ne scay-ie si nous eschaperons la furie de ce Demon. L'ay veu autrefois des maladies dans le país, mais ie n'ay iamais rien veu de semblable, deux ou trois Lunes nous en faisoient voir la fin; & en peu d'années nos familles s'estant restablies, nous en perdions quasi la memoire: mais maintenant nous comptons desia vne Année depuis que nous sommes affligez, & ne voyons encore aucune apparence de voir bien-tost le terme de nostre misere. Ce qui nous a mis iusques à present le plus en peine, est que nous ne voyons goutte en ceste maladie, & que nous n'auons peu encore en descouurir la source. Je vous diray ce que i'en ay appris depuis peu de iours; mais auparauant il faut que vous scachiez que ie parle sans passion, & que ie ne fais estat que de dire la pure verité. Je ne hays ny n'ayme les François, iamais ie n'ay rien eu à demesler avec eux, & c'est d'aujourd'huy que nous nous entre-voyons; ie ne pretens point leur faire aucun tort, seulement ie rapporteray fidelement le discours d'un de nostre nation reuenu fraichement de la traite de Kébec.

Je serois trop long de rapporter icy les chefs de son accusation, qui consistoient en ie ne scay quels sortileges pretendus, desquels nous aurions la cognoissance. Au reste il enrichit le tout de tant de belles paroles, & le deduisit avec tant de passion, que toute la compagnie receût ces fourbes comme des veritez. Notez que cét esprit malicieux, pour donner plus de couleur à ses contes, faisoit difficulté de receuoir le tesmoignage de

ceux qu'il sçauoit estre descriez pour leur mensonges : mais s'il en reiettoit vn, il en rapportoit cinquante autres prests, ce disoit-il, à soustenir son dire.

N. P. Superieur voulant parler, laissa quelque temps ietter son feu à ce Capitaine, puis ayāt demandé audience, luy ferma la bouche en peu de mots, par des raisons auxquelles il n'eut point de responce; la confusion de cet accusateur n'empescha pas qu'un autre vieillard ne nous prit à partie avec autant de subtilité, que ce qu'il nous obiectoit estoit esloigné de la verité. Apres tout, les Conseillers pressent importunement le Pere de produire ie ne sçay quelle piece d'estoffe enforcelée qu'il gardoit à la ruine du pais; avec assurance de vie sauue, au cas qu'il voulut aduoier qu'elle estoit chez nous. Le Pere insistant toujours sur la negatiue; il n'importe, dit le President, lasche seulement le mot mon Nepueu, ne crains point, il ne te fera fait aucun tort. En fin le Pere se voyant importuné & pressé si opiniaistrement; Si vous ne me croyez, leur dit-il, enuoyez chez nous, qu'on y visite par tout, & si vous craignez de vous tromper, comme nous auons diuerses sortes d'habits & d'estoffes, iettez tout dans le lac. Voyla iustement comme parlent les coupables & les forciers, reliqua-il. Comment donc veux-tu que ie parle? dit le Pere. Encore si tu nous disois ce qui nous fait mourir, dit vn autre; c'est ce que ie ne sçay pas, & ce que ie ne vous puis dire; mais neantmoins puis que vous me pressez si fort il faut que ie parle.

Je vous ay desia dit souuent, mes Freres, que

nous n'auions aucune cognoissance de ceste maladie: & veritablemēt ie ne croy pas que vous en puissiez descouurir la source, cela vous est caché: mais ie m'en vay vous exposer des veritez infailibles. Apres leur auoir parlé hautement de la grâdeur de nostre bon Dieu, de ses récompenses pour les bōs, & des chastiments pour les meschants; il tombe sur le sujet de la contagion, les causes de laquelle il ne déduisit qu'avec peine, pour les interruptions que ces Barbares luy faisoient. Le pis fut, que le President rompit tout le discours; en ce que, disoit-il, nous sommes apres pour recognoistre les autheurs de nos maladies: & comme si le Pere n'eust encbre rien dit, il se met à le presser plus que iamais de monstrier ceste piece enforclee: mais voyans qu'ils n'auançoient rien de ce costé-là, quelques-vns s'endorment, d'autres ennuyant s'en vont sans rien conclure. Vn vieillard entr'autres sortant, salua le Pere ainsi; Si on te fend la teste nous n'en dirons mot. Les principaux demurerent, quoy qu'il fut desia apres minuiet; bref ils remirent la conclusion de tout au retour des Hurons, qui estoient descendus à Kébec; ce fut vn coup de la tres-douce prouidence de Dieu en nostre endroit, veu les bonnes nouuelles que ceux-cy deuoient rapporter des François. Quelques-vns ayans plus particulièrement presté l'oreille aux discours du Pere, le prierent de les instruire des moyens qu'ils deuoient tenir pour appaiser Dieu. Le Pere tâchoit encore de les cōtenter là dessus, quand voyla tout à coup le Capitaine de nostre bourg (lequel iusques alors auoit gardé le silence

par maxime d'estat) qui s'écrie , hé quelles gens sont- ce- cy ! ils disent tousiours le mesme , ils ne se lassent point de nous tenir cent fois vn mesme langage ; ils parlent sans cesse de leur Oxi, c'est à dire, de ce grand Esprit qu'ils adorent, de ce qu'il a commandé, de ce qu'il defend , del'Enfer , & du Paradis.

Voyla toute l'issuë de ce miserable conseil. Plaise à la diuine Bonté le rendre heureux pour quelques- vns, qu'il aura possible touché de sa sainte Parole ; si les effects n'en ont esté plus funestes, selon qu'ils auoient proietté, nous en sommes redeuables apres Dieu à la tres- sainte Vierge , nostre recours ordinaire, ayant fait vœu en ceste occasion d'vne neufuaine de Messes en l'honneur de son immaculée Conception.

Ce Capitaine de guerre qui parut le plus animé contre nous, se voyant si fort trompé de son attente, ne feignit pas de dire qu'il se repentoit de n'auoir pas retenu celuy des Nostres qui est arriué le dernier, & de ne l'auoir pas mis à la question ; pour tirer de luy , disoit-il, toutes les veritez que ses freres nous celent, ie l'eusse sans doute perdu, & pris en quelqu'vne de ses paroles : mais que pouuoit-il tirer d'vn homme qui ne pouuoit encore sçauoir ny entendre ce qu'on luy eût demandé ?

Après tout cela, vn de ces Messieurs nos Iuges fut fort heureux de s'en venir passer chez nous le reste de la nuit, où nous l'accômodasmes comme nous- mesmes, & la pluspart nous vinrent demander, qui vne chose, qui vne autre : mais il n'y a rien de si commun parmy les Sauvages que la

mescognoissance. Par tout le pays on auoit eu fort mauuaise opinion de cette assemblée; plusieurs estoient dans l'attente de la nouvelle de nostre mort: & quelques vns firent courir le bruit qu'un des Chefs du conseil auoit leué la hache sur le Pere.

Les mauuais bruits s'augmenterent encor apres ce conseil. Vn certain de la nation des Arendahronons, disoit on, ressuscité depuis peu, dit auoir rencontré en l'autre monde deux femmes, lesquelles se disoient d'Angleterre, qu'il auiserent qu'il n'iroit pas encore au pais des Ames; mais qu'estant reuenu en vie il eût à brusser sa robe pour remedier à la maladie: qu'au reste les robes noires qui demeuroient avec eux, auoient de mauuais desseins, avec resolution de ne s'en retourner en France, que lors qu'ils auront fait mourir tout le pais.

De fraische date ie ne sçay quel Sauvages a pensé estrangler vn ieune garçon François proche nostre cabane; mais me voyant courir au bruit, le cruel gaigna au pied. Quelques autres ieunes esuentez ont couué de mauuais desseins sur quelques vns des Nostres. Tout cela nous apprend à nous vnir fortement à celuy qui s'appelle la Vie par excellence.

CHAPITRE III.

*Assistance particuliere de Dieu sur nous
dans nostre persecution.*

BIEN que ce Conseil, dont ie viens de parler, ne determinar rien à l'encontre de Nous, si causa-il de grandes alterations dans les esprits: en sorte que ceux qui auoient escouté iusques icy avec assez d'indifference les bruits qu'on semoit de nous, commencerent à entrer dans de grandes deffiances de nos façons de faire. Peu de temps apres vn des Oncles de Louys de sainte Foy nous vint voir, & nous ayant tiré à part nous aduisa; Que plusieurs des Capitaines qui s'estoient trouuez au conseil, & auoient parlé contre nous, estoient tombez malades; qu'il venoit de leur part pour sçauoir sur cela nos sentiments, en ce qu'ils auoient à faire pour recouurer leur santé; ce nous fut vne belle occasion pour l'instruire. Il nous adiousta que les Anciens n'estoient plus en credit, mais biē que la ieunesse gouuernoit tout; tesmoins, disoit-il, les deux forciers qu'ils massacrerent n'y a pas long-temps, nous nous apperceûmes assez où il visoit; mais celuy qui ne craint que Dieu, ne craint plus rien.

Le 3. d'Octobre le feu prit à nostre cabane, nous auions sujet de iuger probablement que c'estoit vn coup de quelque mauuais esprit. Et il y auoit desia lōg-temps qu'on nous auoit menacé de nous bruler tous lors que nous y penserions le moins. Enuiron ce temps-là nostre flotte d'es-

24 *Relation de la Nouv. France,*

corces, j'entend les Hurons descendus aux François arriuerent, ils estoient tous les plus contents du monde ; ils nous consolèrent puissamment, quand ils nous firent entendre comme quoy tant de personnes signalées en vertu & merites s'employent avec tant d'ardeur & de zele pour le salut de ces pauvres abandonnez. Nous vismes des effects admirables de l'accueil qu'on leur fit au conseil que vous tintes aux trois Riuieres. Ils ne croyent plus, ce disent-ils, que nous les fassions mourir, attendu qu'ils n'ont rien veu ny ouy par delà, qui ne les esloignast grandement de ces sinistres soupçons.

Il est vray que c'est vn coup de Dieu qui donne iusques dans vn miracle, que vous leur ayez dit sur le sujet de leur maladie, non seulement la substance des choses que nous leur disons icy, mais aussi dans le mesme ordre, & dans la mesme suite que nous leur inculquons, si qu'ils ont reconnu distinctement, ce que nous auons souuent en la bouche, que la verité est vne par tout. Ce fut sans doute le saint Esprit qui vous inspira de parler avec tant d'aduantage de nos saintes Images ; que plusieurs d'entr'eux auoient prise auparavant pour autant de Demons. Ceste image du Sauueur que vous fistes esleuer en l'air, afin qu'ils la peussent tous voir, leur fit croire qu'un objet que tant de monde respectoit publiquement ne pouuoit seruir à quelque magie noire & cachée. Nous benissons Dieu, de ce que sans nous estre communiqué, rien ne se pouuoit faire de plus à propos dans les necessitez où nous nous trouuions pour lors.

Tant y a que l'affliction & le desespoir auoit si fort trouble l'esprit de ces Barbares, que si par malheur ceux qui retournoient des trois Riuieres eussent parle de nous autres en termes moins fauorables, nous estions en proye à leur fureur : mais vous les auiez tellement satisfaits, qu'ils fermoient la bouche à ceux qui ne nous aymoient pas, faisant cesser pour quelque temps la persecution publique ; ie dis publique, car quelques particuliers ne laisserent pas tousiours de nous donner de l'exercice. Et vn des parens du Capitaine Aénons, qui estoit mort aux trois Riuieres pensa faire vn mauuais coup en la personne d'vn des Nostres, qui auoit fait le voyage dans son canot. Voicy le precis de ce que ce bon Pere nous en manda. Quelques Sauuages, dit-il, vinrent chez nous, avec vne assez mauuaise volonté, ce me sembloit, le plus ieune d'entr'eux tenant son Arc bandé, faisoit mine de le vouloir décocher sur moy, disant à ses compagnons, c'est celuy-là ; cependant vn autre, pour me donner plus à cognoistre m'appella par mon nom, luy donnant assurance que c'estoit moy : en mesme temps vn de la troupe regardant nos Images, les monstroir aux autres par mespris ; & lors il se fit vn petit bruit sourd entr'eux ; comme s'ils se fussent animez à quelque mauuaise action. Je ne scay qui le destourna de me tirer cest heureux coup ; iusques icy le Pere. Mais voicy bien d'autres attaques.

Nous eusmes bien de la peine à nous desfaire de certains Sauuages venus exprés de la Nation du Petun, lesquels apres auoir veu & admiré nostre Chapelle, nous offrirent vne robe de castor,

26 *Relation de la Nouu. France,*

à ce que (disoient ces pauures gens) nous fissions cesser la maladie qui faisoit vn si grand rauage dans leur païs. Ce nous fust vne heureuse rencontre pour leur parler de nostre sainte Foy.

Peu apres vn de nos Amis nous vient dire tout hors d'halene; mes Nepueux vous estes morts, les Attiguenongnahac vous viendrôt fendre la teste, lors que ceux du bourg seront allez à la pèche, ie l'ay appris du Capitaine. Nous iugeasmes cepédant à propos de ne pas mespriser cét aduis, pour la probabilité que nous y voyons. Nous disposons donc nos domestiques à ce qu'ils se conformassent en tout cas aux saintes volontez de Dieu; c'est la verité qu'ils se disposerent saintement, mais en resolution neantmoins, disoient-ils de ne pas mourir les bras croisez, ne se voulans pas laisser massacrer sans se mettre en defense. Pour nous autres nous estions resolus d'attendre paisiblement la mort deuant le saint Autel.

Le party aussi-tost de nostre Residence de la Conception, pour informer de tout ce qui se passoit, nostre P. Superieur qui estoit en la Residence de saint Ioseph, sur le soir de mon départ vn de nos meilleurs amis vint querir en haste les Peres que ie venois de quitter pour comparoistre deuant ceux qui ne nous pouuoient souffrir en vie qu'à regret, il nous parla en ces termes, Sus venez respondre au cōseil, vous estes morts; ils trouuerent tous les Anciens assemblez avec ce Capitaine qui nous auoit si mal traité aux autres conseils. D'abord cét homme leur parle brusquement sur le fait de la contagion, dont il attribué la cause aux robes noires. Sur

tout qu'Echon remôtant au païs, il y a bien quatre ans, auoit dit que ce voyage ne seroit que de cinq ans; que voila le terme prefix tâtost expiré; que ce meschant homme auoit desia trop profité de leur ruine, & que partant on demande vn conseil general pour l'entendre là dessus, & terminer l'affaire. Nos Peres sans s'estonner dirent qu'ils fissent à la bonno heure vn autre conseil quand il leur plairoit, que pour eux ils y assisteroient volontiers. Et certes Dieu les assista bien en ceste rencontre; car s'ils eussent changé de visage, ou chancelé en leur response, on estoit pour vuider sur le champ leur procez, ainsi que depuis ces barbares nous ont conseillé. En effect nous auons sçeu que la conclusion estoit prise de nous faire tous mourir.

N. P. Superieur vint en diligence pour comparoistre en personne en cette nouuelle assemblée, estant bien aduertty par ceux de nos meilleurs Amis, que sans doute il basteroit mal pour luy & pour nous dans cette confusion d'ennemis. A son arriüée il va salüer les plus remarquables du bourg, qui ne firent que baisser la teste, donnans à entédre par cette posture que c'estoit fait de nous. Bref, Dieu voulut qu'un seul Capitaine de nos Amis, à qui nous pouuions auoir recours, fust pour lors esloigné du bourg, peutestre à ce que toute nostre esperance fust en celuy qui nous veut entierement à luy. Le Pere donc prend son temps pour dresser vne forme de testament, qu'il laisseroit entre les mains de quelques Chrestiens affidez, ainsi qu'ils s'y offrirent d'eux mesmes, pour le porter en son temps à Kébec: voicy les termes :

MON REVEREND PERE,

Pax Christi.

NOus sommes peut-estre sur le point de respendre nostre sang, & d'immoler nos vies pour le seruice de nostre bon Maistre Iesus-Christ. Il semble que sa bonté vueille accepter ce sacrifice de moy pour l'expiation de mes grâds & innombrables pechez; & pour couronner dès ceste heure les seruices passez, & les grands & enflammez desirs de tous nos Peres qui sont icy.

Ce qui me donne la pensée que cela ne sera pas, est d'un costé l'excez de mes malices passées, qui me rendent du tout indigne d'une si signalée faueur; & d'autre costé, par ce que ie ne croy pas que sa Bonté permette qu'on fasse mourir ses ouriers, puisque par sa grace il y a déjà quelques bonnes ames, lesquelles reçoient ardemment la semence de l'Euangile, nonobstant les mesdisances & persecutions de tout le monde cōtre nous. Mais d'ailleurs ie crains que la diuine Iustice voyant l'opiniastreté de la pluspart de ces Barbares en leurs folies, ne permette tres-iustement qu'ils viennent à oster la vie du corps à ceux qui de tout leur cœur souhaitent & procurent la vie de leurs ames.

Quoy que c'en soit, ie vous diray que tous nos Peres attendēt le succez de ceste affaire avec vn grand repos & contentemēt d'esprit. Et pour moy ie puis dire à V. R. avec toute sincerité, que ie n'ay pas eu encore la moindre apprehension de la mort pour vn tel sujet. Mais nous sommes

tous marris de ce que ces pauvres Barbares par leur propre malice bouchent la porte à l'Evangile & à la grace. Quelque conclusion qu'on prenne, & quelque traitement qu'on nous fasse, nous rascherôs avec la grace de Nostre Seigneur de l'endurer patiemment pour son service. C'est vne faueur singuliere que sa Bonté nous fait de nous faire endurer quelque chose pour son amour. C'est maintenant que nous nous estimôs vraiment estre de sa Compagnie. Qu'il soit beny à iamais de nous auoir entre plusieurs autres meilleurs que nous destinez en ce païs, pour luy ayder à porter sa Croix. En tout, sa sainte volonté soit faite; s'il veut que dès ceste heure nous mourions, ô la bonne heure pour nous! s'il veut nous reseruer à d'autres traux, qu'il soit beny; si vous entendez que Dieu ait couronné nos petits traux, ou plustost nos desirs, benissez-le; car c'est pour luy que nous desirons viure & mourir, & c'est luy qui nous en donne la grace. Au reste si quelques-vns suruiuent, i'ay donné ordre de tout ce qu'ils doiuent faire. I'ay esté d'aduis que nos Peres & nos domestiques se retirent chez ceux qu'ils croyront estre leurs meilleurs amis: i'ay donné charge qu'on porte chez Pierre nostre premier Chrestien tout ce qui est de la Sacristie, sur tout qu'on ait vn soin particulier de mettre en lieu d'assurance le Dictionnaire; & tout ce que nous auons de la langue. Pour moy, si Dieu me fait la grace d'aller au Ciel, ie prieray Dieu pour eux, pour les pauvres Hurons, & n'oubli-
ray pas Vostre Reuerence.

Après tout, nous supplions V. R. & tous nos

30 *Relation de la Nouv. France,*

Peres de ne nous oublier en leurs saints Sacrifices & prieres, afin qu'en la vie, & apres la mort, il nous fasse misericorde ; nous sommes tous en la vie & à l'Eternité.

DE VOSTRE REVERENCE,

Tres-humbles & tres-affectionnez serviteurs en Nostre Seigneur,

En la Residence
de la Conception,
à Ossossané ce 28.
Octobre.

JEAN DE BREBEVF.
FRANÇOIS JOSEPH
LE MERCIER.
PIERRE CHASTELLAIN.
CHARLES GARNIER.
PAUL RAGVENEAV.

J'ay laissé en la Residence de saint Ioseph les Peres, PIERRE PIART, & ISAAC IOGVES, dans les mesmes sentimens.

VOYLA les pensées que Dieu nous inspiroit alors. Or en ceste extremité d'affaires, nostre recours fust au grand saint Ioseph ; faisants tous vœu à Dieu de dire neuf iours consecutifs la sainte Messe en son honneur ; lesquelles nous commençâmes le iour des Saints Simon & Iudes. De plus, comme il estoit important que ce peuple sceût l'affection que nous auions à leur bien, & le peu d'estat que nous faisons de ceste vie miserable ; le Pere trouua bon de les inviter à son Atsataïon, c'est à dire festin d'Adieu, tel qu'ils ont coustume de faire quand ils approchent de

en l'année 1637. & 38.

31

la mort. Nostre cabane regorgeoit de monde; il eût là vne belle occasion de leur parler de l'autre vie: le morne silence de ces bonnes gens nous attristoit plus que nostre propre danger.

Cependant vn, deux & trois iours s'escoulerent avec l'estonnement de tout nostre bourg, sans que ces Messieurs nous menagent plus de mourir dans leur assemblée. Je ne sçay pas si le diable auoit mutiné ces Barbares contre nous: si puis-ie dire, que nous n'auions pas encor acheué nostre neufuaine, que toutes ces tempestes s'apaiserent; en sorte qu'eux-mesme s'en estoient entr'eux avec raison. Pouuons-nous pas esperer qu'un iour ce grand Patron de nos Infidelles fera paroistre des effects encore plus admirables dans le changement de leurs cœurs? Tant y a que depuis le 6. de Nouembre que nous acheuâmes nos Messes votiuës à son honneur, nous auons ioüy d'un repos incroyable, nous nous en esmerueillons nous-mesmes de iour en iour, quand nous considerons en quel estat estoient nos affaires il n'y a que huit iours.

CHAPITRE IV.

Des Hurons baptisez ceste année 1638.

SI nous auons trouué la porte fermée aux autres bourgades, ou les deux & trois cens mourroient, hélas sans assistance! Dieu nous a disposé en ce bourg des esprits & des oreilles qui ont receu tres-volontiers sa sainte parole. Nous auons

baptisé plus de cent personnes tant hommes faits, que petits enfans, dont quarante-quatre sont maintenant, cōme nous croyons dans le Ciel; au moins sommes-nous bien assurez de vingt-deux petites Ames innocētes que la mort a tiré du berceau, & la grace du S. Baptême a mis au nombre des bien-heureux. La plus grande de nos peines estoit de sçauoir ceux qui estoient malades, tant ceste recherche leur estoit odieuse. Vous n'aymez que les malades & les morts, nous disoit-on: si que sans cesse nous faisons la ronde par les cabanes; car souuent tel estoit pris & emporté en moins de deux iours. Le plus ordinaire de nos mestiers estoit celuy de Medecins, en dessein de decrediter de plus en plus leurs sorciers, avec leurs regimes imaginaires; quoy que pour toute medecine nous n'eussions rien à leur donner qu'un petit morceau d'estorce de citron ou citrouille de France qu'ils appellent, ou quelques grains de raisin dans vn peu d'eau tiede, avec vne pincée de sucre: tout cela pourtant, avec la benediction que Dieu y dōnoit faisoit des merueilles, & à les entendre rendoit la santé à plusieurs. Nous estant trouuez au bout d'un peu de conserue de trois ou quatre ans, il nous falut, pour contenter ces pauvres languissans, lauer & tordre dans vn peu d'eau le papier qui luy auoit seruy d'enveloppe; ceste eau sentoit plus le papier & l'ancre que le sucre: & cependant c'est vne chose incroyable comme ces pauvres gens la trouuoient bonne. Dieu benie ces cœurs charitables qui nous enuoyerent il y a deux ans quelques onguents, ils seront bien consolez d'entendre que

que ce qui n'est ordonné que pour les corps, à seruy pour guerir quantité d'ames abandonnées. Je ne sçay comme cela se fait, mais on n'a icy aucune horreur de ce qui feroit bondir le cœur en France. Aussi nostre plus grand creue-cœur est, qu'après toutes ces assistances pour le corps, la pluspart de ces ames abandonnées se rebutent à l'ouuerture de nostre sainte creance; tant il est mal-aisé de ramener vn pauvre Sauuage à son Createur. C'est pitié de voir icy le domaine que le Diable va exerçant sur vn esprit infidelle! par exemple, si vous leur parlez de l'Enfer, ils vous répondront froidement, qu'ils ne voudroient pas aller ailleurs qu'avec leurs Parents qui y sont desia: ô que ces difficultez nous font cognoistre le peu que nous pouuons: c'est pourquoy nostre refuge ordinaire après Dieu, est en la bien-heureuse Vierge, sa sainte Mere, & à son tres-glorieux Espoux saint Ioseph. Le cœur nous dit, que c'est par ces sacrez canaux que Dieu veut faire couler sur nous & nos Sauuages les torrens de ces graces.

Voicy les choses plus notables dans quelques Baptêmes. Vn des Nostres venoit de baptiser vne fille, qui n'attendoit que la mort, quand quelques-vns des parents de la malade entrent, parmi lesquels vne femme tenoit vn petit enfant d'environ deux mois, il apprend que c'est vn pauvre orfelin qui ne tette quasi plus; il le baptise du consentement de celle qui le portoit. Le lendemain la malade meurt, & ce petit innocent estant pris de la contagion, s'en alla bien-tost tenir son rang parmy ses semblables.

34 *Relation de la Nouu. France,*

N. Pere Superieur pendant son dernier voyage pour le conseil, eût aduis qu'une pauvre femme d'assez bõ naturel luy vouloit parler; il ne fut pas plustost entré dans la cabane, que ceste pauvre malade luy dit assez haut, ô Echon, que j'ay eu ceste nuit vn beau songe! il m'a semblé voir vn ieune homme vestu d'une robe blanche cõme neige, & beau comme vn François, qui alloit baptisant tout nostre bourg; ie prenois grand plaisir à le voir: & maintenant ie te prie de me baptiser. Le Pere l'instruisit pour ce qui estoit du songe, & luy expliqua le Catechisme avec beaucoup de consolation de part & d'autre. La cognoissance qu'elle eût des peines de l'Enfer, & des joyes du Paradis, luy firent souhaiter & demander le S. Baptisme avec plus d'instance; il n'y auoit rien en apparence qui pressast du costé de sa maladie, mais le Pere se sentât inspiré fortemēt, luy accorda sa requeste. Elle ne passa pas deux iours sans aller receuoir dans le Ciel la récompense de sa Foy.

Dans le mesme mois Dieu attira à soy vn ieune enfant de quatre ou cinq ans, par vne faueur bien particuliere. Nous parcourions les cabanes, lors qu'une fille toute espleurée nous vint au deuant: hélas! disoit-elle, le pauvre enfant vient de mourir; nous rentrons (car nous n'en venions que de sortir) nous trouuons le pauvre petit qui tiroit à la fin, nous le baptisons du consentement de son grand Pere, deux heures apres il estoit au Ciel; il auoit esté rapporté le mesme iour du bord de l'eau; où ses parents estoient à la pesche, & n'estoit tombé malade que du iour precedent.

en l'année 1637. & 38. 35

Vn petit innocent de deux mois n'auoit pas la mine de la faire bien longue: vne fille qui le portoit sur son dos, selon leur coustume, s'amusant apres le Chapeltet d'un des Peres, l'autre le baptise lestement; le pauvre petit n'attendoit que ceste faueur du Ciel pour s'y enuoler.

CHAPITRE V.

La Conuersion de Ioseph Chixatenha natif de ce bourg d'Ossossané.

IL faut icy que quelques vns de nos François corrigent l'imagination qu'ils ont eu de nos Sauvages, se les figurant comme des bestes farouches, pour n'auoir rien d'humain que l'Economie extérieure du corps. Voicy vn Neophyte entre les autres à qui Dieu a touché le cœur, qui ne cede en rien au plus zelé Catholique de la France.

Ce Sauvage surnommé Chixatenha estant en danger de mort, receut le 16. d'Aoust le nom de Ioseph au saint Baptême; deslors il ne nous promettoit rien de mediocre, mais depuis, sa foy a esté tellement esprouuée par la persecution, & va tous les iours cooperant avec tant de fidelité aux graces de Dieu, que si ceste infinie misericorde, qu'il a preuë si auantageusement de ses benedictions, luy donne la grace de perseuerer, il est pour seruir de modele à tous les croyants de ceste nouvelle Eglise. Je me persuade assez que tant d'ames saintes; qui par les secours qu'elles

rendent continuellement à ces Missions, & par leurs feruentes prieres ont veritablement engendré en N. Seigneur ces premiers Chrestiens, seront bien aises de sçauoir que leurs enfans spirituels commencent desia à begayer.

Ce braue Neophyte est aagé de trente-cinq ans ou enuiron, & n'a quasi rien de Sauuage que la naissance. Or quoy qu'il ne soit pas des plus accommodez de ce bourg: il est neantmoins d'une famille des plus considerables, & nepueu du chef de ceste Nation. Il a l'esprit excellent, non seulement en comparaison de ses compatriotes, mais mesmes, à nostre iugement, il passeroit pour tel en France. Pour sa memoire nous l'auons souvent admirée, car il n'oublie rien de ce que nous luy enseignons, & c'est vn contentement de l'entendre discourir sur nos Saints Mysteres. Dès sa ieunesse il s'est engagé dans le mariage, & n'a eu iamais qu'une seule femme, contre l'ordinaire des Sauuages, qui ont coustume en cet aage d'en changer quasi en toutes les saisons de l'année: il n'est point joieur, & ne sçait mesme manier les pailles, qui sont les cartes du pais: il n'vse point de Petun, qui est comme le vin & l'yurongnerie du pais: s'il en fait chaque année en vn petit jardin proche sa cabane; ce n'est, dit-il, que par passe-temps, ou pour en donner à ses amis, ou pour en acheter quelques petites commoditez pour sa famille: il ne s'est iamais seruy de sort pour estre heureux, à leur opinion, soit au jeu, soit à la pesche, &c. qui est toute l'ambition de ces pauvres Barbares: & mesme son Pere en ayant laissé vn apres la mort, dont il s'estoit, dit-on seruy heu-

reusement plusieurs années, le pouuant prendre pour luy, il ne s'en est pas mis en peine, se contentant de sa petite fortune : iamais il ne s'est adonné aux festins diaboliques. Adjoustez à tout cela vn beau naturel, docile à merueilles, & contre l'humeur du pais, curieux de sçauoir.

Le premier coup de grace qui l'esbranla, ce fust le premier discours que fit iamais le P. Supérieur en vn de leurs conseils au sujet de leur feste des morts : car il demeura deslors si fort affectionné & à nous & à nos Saints Mysteres, que peu apres il presenta au P. Supérieur vn sien petit fils pour estre baptisé : & en suite, comme il disoit, pour aller au Ciel. Presque en mesme temps le Pere consolant ceux de son bourg, sur la maladie qui rengregeoit de iour en iour, & leur ourant les moyens les plus efficaces pour appaiser Dieu : ce bon Sauuage fust tellement touché, que deslors il se rendit à la raison & au S. Esprit. Il commence donc à prier Dieu de foy-mesme, à rouler en sa pensée ses SS. Commandements, lesquels il iugeoit si raisonnables; à se moquer de ses songes. Bref il passe desia pour Chrestien parmy les siens, *Beatus quem tu erudieris Domine, & de lege tua docueris eum.*

Depuis nostre demeure en la bourgade il nous est tousiours venu visiter, avec vne tres-grande consolation de part & d'autre : son entretien le plus ordinaire n'estoit que de Dieu & de sa loy. Et ce qui est bien rare parmy nos Sauuages, iamais il ne nous demandoit rien, quoy qu'il n'ignorast pas l'affection que nous auions pour luy: il procuroit aux petits enfans le saint Baptême.

& Dieu le luy procura par le danger d'une fièvre pestilentielle, qui sembloit le vouloir estouffer: il ne s'en sentit pas plustost frappé, que tout esmeu qu'il estoit, il accourt chez-nous, nous prie de l'instruire comme quoy il se deuoit comporter pendant sa maladie, au cas qu'il pleür à Dieu, ce disoit-il, l'affliger comme les autres: & de quelle sorte de remedes il luy seroit permis de se servir. Ce fut pour nous vne consolation bien sensible d'entendre les beaux actes de resignation que faisoit ce bon Profelyte dans nostre Chapelle.

Le lendemain nous le trouuâmes assez mal: ô que Dieu luy auoit touché le cœur! doutant si vn certain remede estoit permis, il nous fait chercher par les cabanes. Mes freres, disoit-il, si vous me dites que cette medecine desplaist à Dieu, j'y renonce dès maintenant; & pour rien du monde ie ne m'en veux servir. Il nous obéissoit en tout fort ponctuellement, non seulement pour la conduite de son ame, mais mesme pour le regime de sa santé. Arriuâ que l'ayant conuert pendant l'accez, il demeura ainsi tout le iour avec assez d'incommodité, iusques à nostre retour; & lors il nous fit rougir, nous demandant avec sa candeur naturelle s'il pouuoit se mettre vn peu plus à l'air. Iugeants enfin que le mal pressoit, nous luy parlâmes de son Baptisme. Ce n'est pas à moy, dit-il, à parler là dessus, non ce n'est pas à moy: mais la sincerité de son cœur parut bien-tost, en ce qu'il adjousta incontinent; Je vous ay si souuent témoigné que ie croyois, ie vous ay cent fois demandé le Baptisme: & depuis le temps de ma

maladie vous ne m'estes iamais venu voir, que ie n'aye dit en moy mesme. Hé que ne me baptisent-ils ! c'est à eux à en disposer, car ils sçauent trop bien que i'en seray tres-content. Son Baptisme donc, & le nom de Ioseph luy remplirent le cœur de consolation, se voyant en estat comme il pensoit d'aller au Ciel. Il continuë dans sa Resignation amoureuse à la sainte volonté de Dieu, pour la vie ou pour la mort. Et c'est par ce beau chemin que Dieu l'a tousiours conduit depuis sa conuersion ; ne desirant en ce monde que le bon plaisir de son Createur.

Quel cœur ne se fut attendry de voir vn Sauvage au liët de la mort, parler non seulement en vray Chrestien, mais aussi en bon Religieux. Ce spectacle seul nous effuyoit le peu de ressentimēt que nous pouuions auoir de tout ce qui se brassoit pour lors contre nous. Vn de nos souhaits estoit, que quelques personnes qui sont en France eussent le bien de voir ce que nous ne pouuions voir sans larmes de deuotion. Dans le plus fort de la resuerie on ne luy parloit pas plustost de nostre bon Dieu, qu'il reuenoit à soy avec des actes de vertu, capables de toucher les plus endurcis. Il ne sçauoit quels remerciements nous faire, pour les petits seruices que nous luy rendions, selon nostre petit pouuoir.

Nous attribuions sa santé à son saint Patron ; car il parut hors de danger deux iours apres que nous l'en suppliasmes de bon cœur. Dieu sans doute, disoit-il, aura eu esgard à ma resignation : maintenant donc, puis qu'il luy à pleu me rendre la santé, ie suis resolu de luy estre tres-fidele

toute ma vie ; ie feray en sorte que les autres le cognoissent. Depuis nous auons admiré tous les iours en ce Sauuage les effects de la grace de Dieu : c'est assez de dire que l'escolier va surpassant de beaucoup l'esperance de ses Maistres. Son festin de conjoüissance qu'il fit, selon leur coustume, fut veritablement vn des beaux Auditoires qu'on puisse voir ; là ce nouueau Predicateur fit merueilles, commençant par le *Benedicite* des Chrestiens qu'il dit tout haut en sa langue ; les loix du banquet n'y contribuant pas peu, qui portent que le Maistre du festin se contente d'entretenir les conuiez : tous l'admirent, & disoient entr'eux qu'il auoit vn grand esprit, & s'estonnoient de le voir dans la resolution de viure en Chrestien.

CHAPITRE VI.

La conduite de Dieu sur nostre nouueau Chrestien.

DES LORS que nostre Ioseph eût recouuert ses forces, il vint remercier Dieu en nostre petite Chapelle de la santé qu'il auoit reçu de luy, luy promettant de mieux viure cy-apres, & de faire profession publique de son seruice. La vie qu'il a mené depuis n'a en rien démenty ceste sainte & genereuse resolution. Vn mot de ses vertus plus insignes.

sa Foy.

Il est si bien fondé en la Foy, qu'il fait grand scrupule de faire quoy que ce soit, deuant que

d'auoir offert à Dieu son action; iusques-là qu'il se plaignit vn iour à nous de ce qu'il visitoit par fois ses parents, sans considerer si Dieu agréeroit ses visites. Pendant sa pesche ou sa chasse il s'adresse à Dieu, luy disant de cœur, Vous qui auez tout fait, vous estes le Maistre des animaux, si vous en faites tōber quelqu'un dans mes pieges, soyez beny ; sinon, ie ne veux que ce que vous voulez. Il ne manque pas de venir prier Dieu en nostre Chapelle, le matin & le soir, où il employe chaque fois vn bon quart-d'heure : il fait quantité d'actes d'Adoration, lesquels il termine par celuy de la contrition : il n'a pas de honte de s'agenouïller & prier Dieu en presence des autres, sans s'interrompre pour ceux qui sortent & entrent dans sa cabane.

En moins d'un mois sa cabane & celle de son Frere fut pleine de malades ; il perdit quantité des siens, & sur tout le dernier de ses enfans, qui estoit le cœur de son cœur. Ces afflictions domestiques ne le troublerent aucunement, il ne chancela pas dans l'esperance qu'il auoit en celuy qui l'esprouoit : il apprit à tous ses malades la pratique de l'entiere resignation d'eux-mesmes entre les mains d'un si bon Pere. Iamais il ne permit qu'aucun Sorcier (qui sont icy les Medecins) mit le pied dans sa cabane. Tout son recours estoit à Dieu, qu'il prioit ardemment pour leur santé. Il eût bien de la peine à se roidir contre les reproches de ses parents, qui luy remonstroient le danger manifeste de mort ; ensemble l'experience qu'ils pensent auoir de leurs remedes ou sortileges. Son courage anima mesme son beau-

Son Es.
peran-
ce.

frere à fermer la bouche à sa femme languissante, qui auoit songé ie ne sçay quel festin; N'importe luy dit ce bon homme, que tu meure, pourueu que Dieu soit obey. Son premier soing qu'il prenoit des malades, c'estoit de les faire baptiser sans attendre l'extremité. Nous baptisâmes son aîné aagé de six à sept ans, croyants qu'il n'en eschaperoit pas, il receut le nom de nostre saint Fondateur. Celuy qui nous contenta le plus, ce fut vn sien nepueu à l'aage de dix-neuf à vingt ans, que nous appelâmes Pierre, il est Dieu mercy l'imitateur de son bon Oncle. Il y auoit du plaisir à parler de Dieu aux malades dans cette grande cabane de cinq familles. Trois de ses petites niepces, dont la plus aagée est d'environ de dix à douze ans, & les deux autres de cinq à six, toutes filles d'esprit, furent du nombre, elles receurent au Baptisme les noms des Saintes Agathe, Cecile, & Therese. Il procura le nom d'Anne à sa belle-sœur, laquelle, Dieu mercy, retourna en santé, avec vn petit poupon à la mammelle, qui suruescut au grand estonnement de tout le monde. Voyla bien des malades dans vne cabane, mais aussi voyla de grandes faueurs du Ciel en peu de temps! Or pour reuenir à nostre Pere de famille, il nous creuoit le cœur à tous, en l'offrande heroïque qu'il alloit reïterant de son Benjamin; car pour vaincre le sentiment naturel que luy donnoit le danger de ce cher enfant, il s'offroit cent fois le iour à Dieu, avec des termes d'vne confiance vrayement Chrestienne; par fois il le prenoit entre ses bras, & parloit à ce petit, côme s'il eût eu bien de la raison; Thomas,

mon cher enfant, luy disoit ce bon Pere, nous ne sommes pas les Maistres de ta vie, si Dieu veut que tu ailles au Ciel, nous ne scaurions te retenir sur terre, iugeant enfin qu'il alloit mourir : Vous m'avez (nous dit-il) enseigné ce que ie devois dire à Dieu pour sa santé, dites-moy maintenant comme ie m'adresseray à luy quand il sera mort : ô que ceste demande nous fut sensible ! Ce petit Ange s'estant enuolé au Ciel, nous iugions à propos d'attendre vn peu, & laisser couler les premieres larmes : mais il vint luy-mesme nous en apporter la nouvelle. Nous le menasmes deuant le saint Sacrement, où il parla en vray Abraham. Nous allasmes pour consoler la pauvre Mere, & assister aux funerailles : la saison n'est pas encore d'obtenir de ces peuples que nous ayons vn cimetiere particulier.

Il ayme Dieu avec tant de sincerité, que nous sachassons ravis de l'entendre par fois parler à Dieu rité. dans ses prieres (car nous le faisons encore prier à haute voix) il les fait avec des sentiments qu'il n'a peu apprendre que du saint Esprit. Il ne scait bonnement de quels termes se seruir, pour luy faire les remerciemens de luy auoir donné la foy. Il prie Dieu tous les jours pour toute sa Nation, de si bonne grace, qu'il faudroit estre de bronze pour n'en estre pas esmeu. Il trouue de soy-mesme de iour en iour de nouueaux motifs, pour former des actes de contrition, concluant ainsi d'ordinaire, ouy mon bon Dieu, ie vous honoreray toute ma vie, & vous aimeray de tout mon cœur ! Il nous assura vn iour que les pensées du Ciel & de la bonté de Dieu luy touchoient le

44 *Relation de la Nouu. France,*

cœur, plus que celles de l'Enfer ne luy donoient de crainte. Il fut vne autrefois bien surpris, quand ayant manqué à se trouuer à la Messe le Dimanche, il nous dit tout esperdu qu'il estoit; Comment donc ? aurois-ie bien fait vn peché grief ? ie ne le pense pas ! car vous ne m'auiez pas encore parlé de ce peché. Aussi, luy dismes-nous, il n'y a que ton ignorance quit'excuse. L'estant allé voir sur le soir, nous le trouuâmes tout pensif: Ah, ce dit-il, mes Freres, i'ay fait vne faute ce matin, mais i'en demande pardon à Dieu de tout mon cœur. Dans l'explication du saint Sacrement de Penitence, il fut tout consolé de la bonté de Dieu, qui nous a laissé vn moyen si facile & si efficace pour r'entrer en sa grace. Il auoit fait partie pour aller à quelques lieuës d'icy assister vn sien nepueu en quelque ouurage, où il alloit (à son dire) d'autant plus volontiers que Nostre Seigneur nous commandoit de nous entr'aymer les vns les autres : mais ayant sçeu que le lendemain c'estoit le vray iour (c'est ainsi qu'en leur langue nous exprimons le Dimanche, il voulut differer à vn autre. C'est bien assez, disoit-il d'auoir fait la premiere faute, sans en faire vne seconde : Que si on me demande la cause de mon retardement, ie veux bien qu'on sçache que j'aime Dieu, & que ie fais estat de ses saintes Ordonnances. En vn mot, tout son deduit est de s'entretenir des choses de Dieu; ce qui nous est vn grand aduancement pour la langue, car ils s'enonce brauement, & en bons termes.

Ie serois trop long, si ie voulois raconter par le menu toutes les autres circonstances de ses

vertus ; ie me contenteray de dire ce qui ne se peut assez dire ; 1. Qu'il a vne horreur extreme du peché, ne nous parlant quasi iamais, qu'il ne nous propose quelque cas de conscience, laquelle il a tres delicate. 2. Qu'il presche hautement & à toutes rencontres Iesus Christ, & d'exemple & de paroles ; il le fit bien paroistre dans les conseils dont i'ay parlé cy-dessus. Nommément il est admirable en l'instruction continuelle de sa cabane, leur inculquant à tout propos les Saints Commandements de Dieu. 3. Qu'il a vne particuliere communication avec Dieu, le priant chaque iour la larme à l'œil, à ce qu'il luy plaise regarder en pitié son pauvre pais. Si que c'est vne de nos plus sensibles consolations, de nous trouver auprez de luy quand il fait ses prieres ; sur tout son action de grace apres la Communion. 4. Deuant & apres les instructions qu'on luy fait, il y a du plaisir de le voir à genoux pour demander la grace de l'Esprit diuin ; iusques-là qu'il s'est captivé luy-mesme à apprendre cét hyuer à escrire, pour retenir & repeter ce qu'on luy dit, mais sur tout pour remarquer, disoit-il, plus clairement le nombre de ses pechez. 5. Il s'adonne à vne pureté de conscience incroyable, se iettant souuent à nos pieds pour se cōfesser, faisant scrupule de la moindre chose. 6. Il se tiendra par fois en prieres les trois quarts-d'heure entiers à deux genoux, qui est vne posture tres-difficile à vn Sauvage. 7. Au reste c'est merueille des forces que Dieu luy donne pour combattre à tout propos les grandes difficultez que le Diable luy va fuscitant par ceux de sa Nation : qui a l'inuiter

46 *Relation de la Nouu. France,*

à leurs festins infames & superstitieux, qui à se
mocquer ouuertement de luy. Il nous dit vn iour
auec sa naïfueré ordinaire, Ouy, mes Freres, ie
suis tellement resolu de garder iusques à la mort
la fidelité que i'ay vouë à mon Dieu, que si quel-
qu'une me vouloit faire retourner à mes premie-
res folies, il m'arracheroit plustost la vie. Bref, le
precis de sa deuotion consiste en vne sainte ten-
dresse de cœur que Dieu luy donne pour le
grand & amoureux respect qu'il porte au saint
Sacrement; pour l'honneur qu'il rend à son An-
ge gardien & son grand Patron; pour recom-
mander à la sainte Vierge son païs, & les ames
des fidelles Trespassez.

Du commencement vne seule chose luy faisoit
de la peine, c'estoit quand nous l'assurions que
Dieu a de coustume d'esprouuer ses plus fidelles
seruiteurs par les souffrances & les tribulations:
de fait il nous disoit n'aguères, qu'à propos de
l'histoire de Iob il auoit souuent dit à Dieu, mon
Dieu, ie vous prie ne faictes pas espreuue de ma
foy, vous cognoissez mes plus secrettes pensées,
vous sçauiez que c'est tout de bon que ie croy en
vous, helas ne m'affligez point. Mais ceste infinie
bonté qui le comble de iour en iour de nouuelles
graces, luy fit bien peu apres changer de senti-
ment & de langage.

Ie finiray ce Chapitre, en disant, que sa con-
stance au bien l'a rendu remarquable luy & toute
sa famille, non seulement à ceux du bourg, mais
mesme à tout le païs; en sorte qu'on en parle fort
diuersement; les plus raisonnables l'ont admiré,
& l'admirent encore tous les iours; d'autres s'en

moquent, & appellent sa famille, par derision, la famille des Croyants. Il s'en est trouué quantité qui luy ont reproché les dangers où il se mettoit luy & les siens, ne se voulant seruir des remedes de tout le país. Bref, le bruit a esté quasi vniuersel, que ces bons Chrestiens s'estoient possible associez avec nous pour perdre toute leur nation par la maladie. Où Dieu l'a le plus esprouué, eu égard aux langues mesdisantes; ce fut à mon aduis en vn voyage qu'il fit pour la chasse de l'Ours: car bien que ceux qui songent icy le mieux, & croyent ce qu'ils ont songé, passent par vne tromperie diabolique, pour les meilleurs chasseurs; nostre Chrestien néanmoins qui se mocquoit de tous les songes retourna les mains vuides, avec le mespris, ce luy sembloit, de nostre sainte Foy dans l'esprit de ses compagnons, lesquels attribuant le bon-heur de leur chasse à leurs songes, luy donnerent bien du sujet de patience, & le gausserent sanglamment sur sa croyance; il tint bon cependant, se retranchant tousiours dans l'entiere & forte resignation à la sainte volonté de Dieu.

CHAPITRE VII.

Jour de S. Ioseph solemnel dans les Hurons pour quelques circonstances.

DES LORS que nous vismes nostre bon Ioseph dans le train d'un veritable Chrestien, nous souhaitasmes la mesme grace à sa femme

pour le bien de toute sa famille : car bien qu'elle creut en Dieu, elle ne se desfit pas si tost de tout ce qui estoit contraire à la loy de Dieu. Il pleût donc enfin, comme nous croyons, au grand S. Ioseph, Patron de ceste famille, & de tout le pais, luy toucher le cœur en sorte, que nous iugeasmes à propos de disposer son Baptisme pour le iour de sa feste. La veille de ce beau iour, son mary fit vn festin solennel à ses parents & à ses amis les plus considerables du bourg, où nous assistasmes. Il le commence par la benediction de l'Eglise; & pendant que la chaudiere se vuide il les entretient brauement; voicy ce qu'il leur disoit, Mes Freres, ie veux bien que vous sçachiez que ma femme est entierement resoluë de croire en Dieu, & le servir: & que dès maintenant elle abandonne pour iamais toutes les superstitions du pais, pour estre baptisee. Pour moy, & le reste de nostre famille nous auons tous esté baptisez pendant la maladie. Echon paracheuera seulement quelque chose qui y manque; il termina toute la ceremonie avec l'action de graces des Chrestiens, qu'il fit à haute voix.

La nouuelle ne fut pas plustost respanduë par la bourgade, que nous allions ouurir la Feste; quand nostre cabane se trouua pleine non seulement des plus considerables, mais d'une grande partie de la ieunesse; en sorte que si elle eût esté capable, ie ne sçay s'il fut resté personne dans le bourg. La cabane estoit parée assez honnestement pour nostre pauvreté; sur tout nous y admirions vn silence extraordinaire pendant toute la ceremonie; soit que l'éclat que nous y apportions

portions leur donna dans les yeux, soit que le S. Esprit leur toucha pour lors les cœurs. Ce qui nous rauisoit le plus, ce furent nos Neophytes, le bon Ioseph, Marie sa femme, Pierre son nepueu, & deux de ses petites nieptes baptisées en danger de mort. Son frere eust esté de la partie, ne manquant pas de foy ny de bonne volonté pour cela; mais parce qu'il auoit de la peine à quitter vn mestier diabolique, auquel il est passé maistre, nous l'auions remis pour vñ autre temps; lors que nous supplerions les ceremonies du baptesme, que nous auions esté contraints d'obmettre à celuy de sa femme & de ses deux enfans: Mais ceste femme (qui n'estoit venue qu'en intention de voir) touchée, comme il est à croire, du S. Esprit, fendit la presse avec son petit garçon qu'elle auoit à la mammelle, & vñe petite fille de cinq à six ans, demandant la mesme faueur qu'on alloit faire aux autres. Chose qui augmenta beaucoup la ioye de ce grand iour.

Nous commençâmes la celebrité par vñe priere, que nous chantâmes en leur langue, laquelle nous auions composée exprez, en faueur de cete heureuse famille. Je ne dis rien de la deuotion du Pere de famille, qui redoubla en ceste celebre action. Apres les ceremonies du baptesme N. Superieur s'adressant à toute l'assemblée, leur parla hautement de la saincteté du Mariage parmy les Chrestiens. Puis interrogeant là dessus nostre Ioseph & Marie sa femme, qui luy satisfirent pleinement, il procede aux ceremonies de l'Eglise pour leur mariage, dont il est à croire qu'ils receurent la grace, que sembloit meriter la fidelité qu'ils s'estoient gardez iusques alors. La

foule estant escoulée, nos deux mariez, & leur nepueu Pierre approcherēt de la Sainte Table; reseruant cette faueur aux autres, quand elles en seroient capables. Nous les bienueignâmes en compagnie de six des plus notables d'un petit festin de quelques poissons enfumez. Ils monstre-
rent par leur Ho ho ho redoublez le contentement qu'ils en receurēt, possible pour les beaux discours avec lesquels N. Superieur assaisonoit ce peu que nous gardions depuis l'Automne.

Dieu nous destrempa vn peu cette ioye, en ce qu'Anne la belle sœur de Ioseph (c'est elle qui se presenta de son bon-gré pour accompagner les autres au baptesme avec ses deux enfans) fust prise mesme le soir d'une fiebure si maligne, que la voila au tombeau en moins de 2. fois 24. heures. Nous auions beau nous cōsoler sur ce qu'elle estoit morte apres les deuoirs d'une bonne Chrestienne, car d'un costé l'affliction soudaine de cette bone famille, & d'ailleurs l'estōnement vniuersel de toutes les cabanes, nous donnoient bien de quoy penser, & recommander à Dieu son affaire. En effect il s'en trouua qui demanderent froidement à vn de nos domestiques, quel present nous auions fait pour satisfaire aux parens de la defuncte, que nous auions fait mourir si tost, en la baptisant. Ce fust vn coup du Ciel, de ce que cette mort n'esclata pas dauantage, laquelle sans doute eust esté d'une consequence plus sinistre, tant y a que peu de personnes en ont parlé, & la famille Chrestienne n'a rien perdu de la confiance qu'elle auoit en nous. Rien ne tenoit tant en ceruelle le bon Ioseph son beau-frere, que l'apprehension d'un costé, Que cette

en l'année 1637. C. 38. 51

mort si soudaine, ne fust la naissance d'une nouvelle persecution : d'autre part, Que son petit nepveu, faute de Nourrice (lesquelles on ne rencontre pas icy comme en France) ne la suivit tost apres. Nous venant voir sur le soir il fit ses prieres accoustumées, lesquelles il accompagna de tout plein d'actes heroïques de resignation. Mon bon Dieu, ie ne suis qu'en peine (disoit ce Chrestien) de mon petit nepveu ; conservez le mon Dieu pour vostre service. Si vous luy faites la grace d'atteindre l'usage de raison, ie m'oblige dès maintenant à l'instruire, car tout mon souhait n'est autre que de le voir un iour capable de vous recognoistre, pour vous honorer & vous aymer de tout ce que vous luy avez donné.

Pour dire un mot de Marie Annetta sa femme, elle est trop heureuse d'avoir rencôtré un si bon Pere en un si fidelle mary. Elle se confesse souvent ; ce qui nous fait esperer qu'elle perseverera ; c'est qu'elle va rondement & à cœur ouvert ; de plus elle n'a jamais vescu dans le libertinage où se iettent icy les filles & les femmes. Ce nous est une consolation inexplicable, de ce que les actions vertueuses de ces nouveaux Chrestiens, contraignent en fin ces peuples d'aduoüer ce qu'ils ne pouvoit croire, Que les Hurons aussi bien que les François, peuvent garder la loy de Dieu. Ils n'osent plus nous dire que nos pays sont differents ; & que, comme leur terre ne peut pas leur fournir les fruiets qui croissent en France ; aussi ne sont-ils pas (à leur dire) capables comme nous, des vertus du Christianisme. Ils n'ont donc plus rien qui les retienne, que leur infirmité, & la foiblesse de courage, qui manque

autant à plusieurs Chrestiens d'Europe, pour quitter leurs mauuaises inclinations, qu'aux barbares de ce nouveau monde. Nous changeons donc maintenant de batterie, nous resoluant d'entreprendre particulièrement les adultes, attendu que le chef d'une famille estant à Dieu, le reste ne nous fera pas beaucoup de resistance.

CHAPITRE VIII.

Nostre employ pendant tout l'huyver quand ces peuples sont plus sedentaires.

NOUS auons esté sept des Nostres, ceste année parmy ces Peuples, en deux Residences. Le R. P. Iean de Brebeuf nostre Superieur, les PP. Charles Garnier, Paul Ragueneau, & moy en ceste nouuelle du bourg Ossossané, sous le titre de l'immaculée Cōception. Les PP. Pierre Pijart, Pierre Chastellain, & Isaac Iogues à saint Ioseph à Ihonatiria.

Le peu de temps que nous a laissé l'instruction, & le secours que nous rendons icy aux malades, nous l'auons employé à sonder quelques bons esprits, que nous iugiōs les plus dociles & les plus capables d'autoriser la doctrine que nous preschions. Entr'autres la famille de Ioseph a occupé vne bonne partie de nos soins; Dieu nous en ayant fait present, dès nostre arriuée en ce bourg. L'opinion qu'il a de nous luy fit naistre vn grand desir de sçauoir lire & escrire, comme il nous voyoit faire: il trouua incontinct des Maistres tous pleins de bonne volonté. Il a passé vne bonne partie de

l'hyuer en cét estude, avec vne patience, & vne assiduité digne de son courage : au reste, avec vne telle pureté d'intention ; qu'il nous demandoit n'agueres, s'il y auroit du peché, de desirer sçauoir l'escriture, non seulement pour pouuoir coucher par escrit ce qui regarde l'aduancement de son ame, mais aussi les affaires du païs. Cettravail n'a pas esté inutile : pour l'escriture, il y aura vne grande facilité ; la lecture luy coustera vn peu plus. La difficulté que nous auons eu à luy en expliquer le secret, l'a vn peu retardé : neantmoins nous esperons que dans peu de téps il en viendra à bout. Vous serez consolé de receuoir vne de ses lettres, ie vous donne desia parole qu'elle est toute de sa main. En eschâge le profita esté bien grand pour nous, car en luy seruants de Maistres pour la lecture, nous nous sommes façonnez vn bon Maistre en la langue ; quand nous luy demandons les initiales ou finales des mots, ce qui est quelquefois quasi imperceptible, il nous les dit fort distinctement ; si qu'il nous seruira fort, avec l'ayde de Dieu, pour les coniuguaisons. Il nous a medme dicté plusieurs beaux discours sur nos Saints Mysteres, dans vne suite fort iudicieuse ; mais si distinctement que vous ne perdrez pas vne syllabe.

Le 8. de Decembre, nos Sauuages estants de retour de leur pesche, nous prismes resolution de les enseigner publiquemét. Or comme les festins sont les grosses cloches du païs, nous en fismes vn, auquel nous inuitasmes les Chefs de chaque cabane. La compagnie estoit d'environ cent cinquante personnes. Ils approuuerent nostre dessein ; & à les entendre, au moindre mot ils se deuoient rendre chez nous. Mais leur pesche ayant

esté fort heureuse, les festins continuels les occupèrent en sorte nuit & iour, que nous ne pûmes les assembler avant le 9. de Ianuier. Ce iour donc le premier Capitaine secondant nostre dessein, fit vn festin chez luy, à l'issuë duquel il arresta la compagnie. Mes Nepueux, leur dit ce bon vieillard, demeurez icy, nous allons tenir conseil, ie m'en vay y inuiter les principaux qui ne sont pas icy. Tous ne furent pas plustost assemblez, que ce bon homme leue sa voix, & dit; cét Echon qui assemble icy le Cōseil: or bien que ie ne sçache pas son dessein, ie iuge pourtant que l'affaire qu'il a à nous traiter est importante, c'est pourquoy que tous l'escoutent attentiuement.

Le Pere auoit vne belle occasion, aussi s'en seruit-il tres à propos, & les toucha si puissamment, qu'vn des Anciens sembla luy reprocher d'auoir trop differé à leur parler d'vne chose de telle importance, comme est la vie qui nous attend apres nostre mort: & cela avec vne eloquence qui ne sentoit rien du Sauuage. Mais cōme il deffendoit vne mauuaise cause, on luy monstra doucement qu'il se plaignoit à tort de nostre siléce. Et ce que l'assemblée admira le plus, ce fut la repartie de nostre Ioseph, qui nous seruit icy d'Aduocat: car ce braue Chrestien reprit courageusement vn de ses cousins, qui se plaignoit malicieusement, de ce que pas vn des François n'estoit mort pendant la contagion. Le remede, disoit-il, dōt ils se seruent c'est de croire en celuy qui a tout fait, il ne tient qu'à toy de t'en seruir. Nous leur sommes trop obligez de ce qu'il sont venus de si loing, pour nous donner la cognoissance de ce remede si salutaire, lequel, Dieu mercy, ils m'ont enseigné; ce

m'est trop de gloire, de croire comme les François. Le reste de son discours va de mesme air en faueur de nostre Foy. Cette generosité fut loüée des plus sages. Le succez de ce premier conseil ou assemblée fut; que ce qu'on y auoit deduit touchant l'Enfer & le Paradis, auoit grandement remeüé les consciences, chacun en tirant les côclusions que sa passion luy fournissoit. Vn vieillard entr'autres, homme d'esprit, & respecté pour son aage & sa prudence, témoigna au sortir qu'il souhaitoit fort que nous voulussions les assembler ainsi plus souuent.

Cependant si nous eusmes de la peine à assébler ce premier, le second ne nous cousta pas moins. Il nous fallut attédre quinze iours, pour obeir aux songes d'un vieil richard, pour la santé duquel ce bourg estoit tous les iours de feste. Enfin le Pere gaigna le plus considerable de tous les Anciens: il l'engage fortement dans nostre dessein: sçauoir, qu'il auoit à leur dire des choses nouvelles de l'Enfer, & sur tout comme ce ne sont pas fables, ainsi que la pluspart s'estoit imaginé. Dôc le 1. de Feurier, voila l'auditoire plus beau que deuant, avec bonne deuotion de prester l'oreille à nostre Predicateur. Il prit le sujet de son discours, sur ce que, si pour eschaper les mains des Iroquois leurs ennemis, ils n'espargnoient aucune industrie; à plus forte raison deuoient ils se tenir sur leur garde, pour ne tóber vn iour entre les mains d'un ennemy cruel, qui les tourmentera pour vn iamaïs. C'est à mon grand regret que ie ne puis icy rapporter la naïfueré du lágage, que le Pere possede parfaitement, sans doute ie iugeay ce discours capable de cōuaincre le cœur le plus endurcy. Mais

ce qui fut, à mon aduis, le plus persuasif; ce fut le discours de ce bon Capitaine, qui pour encherir sur ce que le Pere leur auoit auancé, loüa tout haut nostre Ioseph, & exhorta ceux du bourg à se faire instruire. A tout cela ils redoublent leur Ho, Ho, Ho, ce qu'ils font quand ils agréent la cōclusion d'un Capitaine. Ils demeurent en suite dans vn profond silēce; iusques à ce qu'un autre vieillard s'adressant au Pere l'aduertit de tesmoigner sa ioye en plein conseil, attendu qu'il auoit obtenu ce qu'il pretendoit. Nous chātâmes alors l'Hymne, *Veni Creator*, que nous iugeâmes le plus cōuenable à cette rencontre. Les prieres finies, chacun s'entretint vn assez long temps sur le sujet du cōseil. Or n'estoit que ie crains d'estre ennuyeux, ie coucherois icy les diuers sentimens de ces Barbares; ils butoient tous à ce point, qu'en fin il falloit nous croire, & croire en Dieu! Apres tout, ils adioustèrent d'un commun consentement, que doresnauant ils recognoistroient le Pere Supérieur cōme vn des Capitaines de la bourgade; & qu'en suite, il assembleroit le conseil en nostre cabane toutes & quantes fois qu'il trouueroit bon.

Depuis ce Sermon, nous auons remarqué vn notable changement dās toutes les cabanes: chacun ne parloit plus que de la resolution qu'on auoit prise de Croire. Il s'en est trouué mesme qui ont fait des festins exprès, pour faire entēdre que toute leur famille desiroit embrasser nostre foy. Quelques estrangers mesmes ayant sçeu le tout comme il s'estoit passé, se promettoient de suivre ceux-cy. Mais hélas! *Non omnis qui dicit mihi Domine Domine, intrabit in regnum celorum;* ils ressembtent quasi tous à leur bon Capitaine

dont ie viés de parler, cét homme gouste veritablement les veritez eternelles de nostre sainte creance, mais il n'est pas pour se resoudre en vn moment à quitter vne vie qu'il meine il y a tant d'années. Je le recommande, & tous les sujets à ces saintes Ames de France, à ce qu'il plaise au Maistre souuerain des cœurs de regarder enfin ce bon vieillard en pitié, car il seroit pour fauoriser cette Eglise, naissante par son exemple, autant qu'il l'autorise tous les iours dans les assemblées, où il parle de nostre Foy avec aduantage. Helas! s'il est difficile en Europe de conuertir vn grand Pecheur; il est icy encore plus mal-aisé de faire changer de cœur à vn Infidelle; c'est battre l'air, que de luy parler de l'vnité d'vn Dieu. Tous nos motifs de credibilité qu'on apporte touchant la venue du Fils de Dieu sur terre, leur sont des tenebres en plein midy.

Voicy à peu près ce qui les fait ioindre à la Verité que nous leur preschons. 1. L'art de coucher sur le papier les choses esloignées. 2. La grande conformité avec la raison qui se retrouve en toutes nos maximes. 3. L'vnité de nostre doctrine; s'estonnans qu'on leur dit à Kébec le mesme que nous leur preschons icy. 4. Nostre assurance à maintenir ce que nous enseignons. 5. Le mespris qu'ils nous voyer faire de la mort, & de tous les dangers qu'il nous faut essuyer. 6. L'auersion qu'ils admirent aux François, de toute sorte de sensualité, à laquelle ils se laissent emporter par vne pente qu'il leur est naturelle. 7. L'opinion qu'ils ont maintenant, que nous ne sommes pas gens à nous tromper en chose de si grande importance. 8. Cette confiance Chrestienne en la bon-

té de Dieu, qu'on leur monstre dans les aduersitez qui se rencontrent. 9. Ce principe. Que l'homme ne s'est pas formé soy-mesme : & qu'en suite il faut monter iusques à son origine, qui ne peut estre qu'un Estre independant. 10. La vanité qu'ils vont descouurant en leurs refueries ordinaires.

Depuis le bon sucez de ce conseil ; la curiosité de voir nos Images, & d'entendre nostre chant attire ces peuples, les Dimanches & les Festes en nostre cabane, où nous paroissions avec nos surplis pour les prieres publiques. En voicy l'ordre. N. Supérieur commence par vne Oraison en leur langue, qu'il prononce dans le ton ordinaire des Conseils. Elle est vn peu longue, comme estant faite pour leur instruction, aussi bien que pour les recommander à Dieu. A mesme dessein nous chantons en suite le symbole des Apostres en rymes du país. Tout cecy n'est que pour les disposer au Catechisme, où il nous faut autant de variété qu'en France, car ils ont vniuersellement l'esprit bon. Icy nostre Ioseph fait merueilles, car par fois faisant du retif, tant est de l'ignorant, ores du Docteur, il donne sujet à Nostre Catechiste d'expliquer par Dialogue & avec plus de clarté, ce qui d'ailleurs ne se conceuroit qu'à demy. Il n'est pas croyable comme quoy ces demandes & ces responses leur agréent, & les tiennent dás l'attention. Suit quelque Hymne de l'Eglise, pour finir le tout par vne priere sur le ton de quelque air approchant de leurs chansons qu'ils aiment fort. Ces Catechismes leurs plaisent grandemér, & n'en sortent quasi iamais sans leur acclamation de ioye & d'approbation, Ho, Ho. Ce qui est le

plus admirable pour le pais est, que ny les grands ny les petits ny ont autre attrait que le desir d'entendre, & la curiosité de voir, aussi nostre pauvreté ne suffiroit pas ou aux presents, ou aux festins. Vn certain aueugle d'environ cent ans, voulut à son tour faire son objectiō au Catechisme & apporta la pluspart de ses resueries; mais nostre Ioseph luy respondit avec tant de modestie & de prudence qu'il se fit admirer de tout le monde. Iamais il n'eût si beau jeu, & c'est de verité à regret que ie tranche ses beaux discours.

Celuy de qui nous esperons de plus apres Ioseph, c'est vn des plus honorables Capitaines. Il parle de nostre sainte Foy avec honneur, y exhortant la ieunesse. Il se mocque de ses songes, & se plaît fort à prier Dieu, si qu'il nous inuita n'agueres à vn sien festin; apportant, pour nous y attirer puissamment, que nous y donnerions la benediction des Chrestiens, & dirions les graces de l'Eglise: mais nous en estāt dispensez, force nous fut de luy dōner vn de nos domestiques qui suppleroit pour nous le *Benedicite*, & les graces qu'il demandoit. Ce fut là où ce bon vieillard prit sujet de parler honorablement de nostre bon Dieu & de sa sainte Loy: attribuant à nos prieres la bonne pesche qu'il auoit fait cette Automne. Les plus touchez d'entr'eux adressent souuent cette priere au Ciel. O vous qui auez fait le Ciel & la terre assistez-moy, ie desire me desfaire de tout ce que vous auez defendu: aydez-moy en cecy & en celz qui me donne bien encore de la peine. Dieu vueille benir ces belles semences, qui ne nous promettent que de bons fruiets.

Bref quelques ieunes hommes se rengent chez

nous constamment depuis l'Hyuer, l'instruction desquels nous employe grandement : Ils se sont d'eux-mesmes offerts à nous, avec beaucoup de tesmoignage de bonne volonté. Nous ne precipiterons pas neantmoins leur baptesme, à raison que nous les mettrions quasi dans l'impossibilité de trouuer party, n'y ayant point encores icy de ieunes filles bien Chrestiennes. Iusques à ce que nous ayons vn bourg qui soit tout à Dieu, les mariages de nos nouveaux Chrestiens nous donneront de la peine. Nous recommandons d'affection à V. R. & à tous nos Peres & Freres ces bons vieillards, lesquels bien qu'ils ne soient pas Chrestiens, ne laissent pas de donner vn credit à nostre sainte Foy.

Ce que nous battons maintenant est, de leur leuer les difficultez que le diable leur fait naistre aux rencontres, sur leurs songes, leurs danses, sueries & festins. La raison que nous leur alleguons de nostre propre experience en tout plein d'idolâtres & d'infideles, & cōme ceux fraichement du Paraquay, les contente le plus; lesquels enfin ont ouuert les yeux à la verité de l'Euangile. Quoy qu'il en soit, le plus grand fruit que nous esperons de ce pays, sera, Dieu aydant, dans les conferences particulieres, pour y persuader ceux que nous iugerons pouuoir gagner à Dieu. Ce qui n'est pas l'affaire d'un iour. Si nous eussions esté le nombre que nous souhaiterions en ces commencemens, ie ne doute pas, que le salut de ces peuples n'en fust de beaucoup plus aduancé.

CHAPITRE IX.

La Residence de S. Ioseph à Ihonatiria.

NOstre P. Superieur, & le P. Chastellain qui ont icy passé tout l'Esté, y ont baptizé onze personnes tant adultes que petits enfans. Le Baptisme de quelques-vns est remarquable. Ils estoient à la recherche d'une pauvre malade, laquelle d'abord on leur fit morte : cependant ces bons gens, gaignez qu'ils furent par quelque gratification, apportent aux Peres deux petits enfans pour estre baptisez, ce qu'ils firent, eu égard à l'estat déplorable où estoit toute la bourgade. Là dessus vn d'entr'eux s'apperçoit que celle qu'ils croyoient defuncte auoit le visage extraordinairement vermeil, ils apprennent qu'elle n'estoit pas encore passée, mais bien qu'elle auoit entierement perdu la parole & l'usage des sens. Le desir qu'ils eurent de la baptiser leur fit faire vn vœu de trois Messes en l'honneur de S. Ioseph. En vn mot elle reuient à soy suffisamment pour estre instruite. Bref, interrogée si elle estoit contente de recevoir le Baptisme, ne pouuant parler elle respōdit fauorablement en portant la main sur sa teste, ils le luy octroyerent, & elle mourut tost apres.

Vn Sauvage leur vint donner aduis qu'une pauvre femme estoit à l'extremité, qui venoit d'arriver de dix lieuës loing. Par une heureuse rencōtre pour elle, ils y accourēt : ils l'instruisent autāt que le tēps le pouuoit permettre, elle meurt incontinent apres le Baptisme. Ils doiuent, ce disēt-ils ceste autre faueur à N. Dame, & à son glorieux Espoux.

Vn des Nostres ayant disposé vne petite fille aagée de huit ans pour mourir Chrestienne, sans

toutefois le baptiser, ne voyant rien qui pressât du costé de la maladie, quelques heures apres ses parens la trouuant extraordinairement mal, vint et appeller le Pere, à ce qu'il luy fit la faueur toute entiere Elle quitta bien-tost la vie du corps, pour aller iouir de celle de l'ame dans le Ciel. Presque le mesme est arriué à vne autre, qui apres son instruction sembla chanceler en sa demande, pour le respect du Sacrement; mais le lendemain il luy resta encore assez de temps, pour se disposer au S. Baptisme, & alla voir sa Patronne S. Elisabeth.

Voicy deux mots de consolation. Atsan premier Capitaine de guerre dans tout le pais nous vint voir, & nous demanda instamment le Baptisme. Ayant eu pour response que ce n'estoit pas vne petite affaire, & qu'il falloit estre bien instruit auparavant: le le scay bien, dit-il; c'est bien mon intention de vous voir plus d'une fois pour ce sujet, mais j'ay esté bien aise que vous sceussiez mes pensées & ma volonté. En effect il se moque desia de toutes leurs superstitions, & ne peut souffrir ce qu'il croit estre desplaisant à Dieu.

Pierre nostre premier Chrestien estant frappé de la maladie se cōporta tousiours en bon Chrestien; car il n'eut pas recours aux sottises du pais non plus qu'il n'auoit fait pendant l'affliction de sa famille; resmoignant tousiours qu'il mettoit toute sa confiance en Dieu. Aussi ne luy auons-nous pas manqué au besoin, tant spirituel que temporel, selon nostre heureuse pauvreté. N'agueres vn de nous l'estant allé voir, il fit de son propre mouuement ce qu'on n'eut pas attédu de luy à l'extremité: car ayant trouué son Chapellet à rastons il baïsa deuotement l'Image de N. Sci-

gneur & de N. Dame qui estoient à sa medaille; puis faisant le signe de la Croix, il cōmença à rouler les grains entre ses doigts, disant sur les gros, Iesus aye pitié de moy; & sur les petits: Marie ayez pitié de moy; entre-coupant souuent sa priere par des actes de Resignation. Seigneur vous estes le seul Maistre de nos vies, disposez de la mienne selon vostre sainte volōté. Sainte Marie gardez-moy ceste nūct. Il a esté exaucé, car il eut vne crise fauorable, qui a esté le cōmencemēt de sa santé.

Dans nos visites nous auons fait rencontre d'un vieillard si touché de ce que nous luy preschiōs, qu'il se plaignoit mesme de ce que, disoit-il, on ne prenoit plus à cœur ceste affaire comme elle meritoit. Il adjousta qu'il estoit resolu de quitter ses songes, danses & festins superstitieux. Depuis il nous est venu voir souuent, avec resolution de se faire Chrestien avec toute sa famille, qui monte iusques à treize personnes. Nous auons tousiours remarqué de bōnes inclinations en ceste famille: les espreuues ferōt voir ce qu'ils ont dās le cœur.

CHAPITRE X.

Bref iournal des choses qui n'ont peu entrer dans les Chapitres precedents.

VOus aurez sceu la risque que courut le Pere qui arriua icy le premier de Septembre; & comme il pensa tomber entre les mains des Iroquois: bon Dieu que ces entre-veuës sont douces! Le Pere qui est remonté icy ceste année remarque avec raison, que nos Hurons sont loiables, pour leur humanité par dessus les Algonquins, car au lieu que ceux-cy s'abandonnent pour l'or-

dinaire les vns les autres dans leur maladie ; les Hurons au contraire s'incommodent pour assister vn malade iusques à la mort. Il dit les auoir veu faire des brancarts, & porter par les Sauts leurs carcasses languissantes, si que-s'il arriuoit que quelqu'un des leurs mourut, ils l'enseuelissoient & l'enterroient avec autant de soing que s'ils eussent esté sur le pais; au lieu que les Algonquins laissent souuent les leurs sans sepulture.

Il auoit disposé vn pauvre malade d'un autre canot, qui fut baptisé auant que mourir par vn ieune François, qui luy donna le nom de S. Barthelemy à l'occasion de sa feste. Il en baptisa vn autre, qu'il eut assez de peine à instruire, pour ce que d'autres Sauvages s'y opposoient; il mourut tost apres, pour porter le nô d'Augustin au Ciel.

Passant aux Bissiriniens, il trouua ceste pauvre Nation fort affligée de la maladie. Et vn Aréndivané entr'autres des plus suiuus, qui se plaignoit aux autres, de ce que le mestier de Sorcier, ce disoit-il, ne valoit plus rien, attendu que le Manitou se mocquoit d'eux, les faisant mourir aussi bien que les autres.

Ahiendasé l'un de ces ieunes hommes que l'on auoit esleué en N. Seminaire, descendant avec son pere aux trois Riuieres pour retourner à Kébec, tomba en danger de mort, & fut baptisé par vn de nos domestiques, avec vne marque euidente de sa predestination; car peu apres son Pere, hélas! fut pris au passage, & tué par les Iroquois. Ce ieune homme estoit d'un fort bon naturel, il ne luy manquoit plus que la faueur que Dieu luy a faite à la fin de sa vie. Que ce petit Seminaire a desia attiré de benedictions celestes.

Remarquez

en l'année 1637. & 38. 65

Remarquez que pas vn de nos domestiques n'est monté icy cette année, qui n'ait gagné à Dieu quelque ame par les chemins. Ce sera vn tres-grand bon-heur pour cette mission, s'il plaist à Dieu nous donner tousiours des domestiques qui prennent en affection de cooperer, comme ils peuuent beaucoup, à la conuersion de ces peuples. On ne sçauroit croire le grand bien qu'à fait le bon exemple de ceux que nous auons eû depuis 4. ans. Nos Sauuages en parlent avec admiration; & voyans que des personnes qui ne portent pas nostre habit, pratiquent neantmoins si exactement ce que nous enseignons, ils font plus d'estat de nostre foy: ce leur pourra estre quelque iour vn motif pour l'embrasser.

Nous fismes nostre petite moisson & nos vantages pour le saint Autel, au mois de Septembre. La recolte a esté d'environ vn demy boissau de bõ froment, c'estoit trop pour le peu que nous auions semé: & d'un petit barillet de vin, qui s'est fort bien conserué pendant tout l'hyuer, on le trouue encore passable. Trois Prestres s'en seruent il y a tantost six mois.

Nous sômes sur les termes de leuer nostre nouvelle Chapelle: Elle aura 30. pieds de longueur, seize de largeur, & 24. de hauteur. Si Dieu nous fait la grace de voir cet ouurage accompli, ce sera non pas vn des plus grands, mais vn des plus ioly qui ait encore paru en la Nouvelle France.

Vne eclipse de Lune, qui arriua le dernier de Decembre au matin, & dura iusques au leuer du Soleil, qui fût à 7. heures 4. minutes, nous donna vn grand credit pour faire approuuer ce que

66 *Relation de la Nouv. France,*

nous croyons. Car (leur disions nous) vous avez veu comme la Lune est eclipsée le mesme iour & au mesme moment que nous auions predict. Au reste, nous n'eussions pas voulu mourir pour vous maintenir cette verité, cōme nous sommes prests de faire, pour vous maintenir que Dieu vous brûlera eternellement, si vous ne croyez en luy.

Je ne puis icy rapporter sans rougir les beaux eloges que certains Capitaines nous donnent en leurs conseils de guerres, où ils ont coustume de nous appeller; Nous en esperons de tres-bons effects. Desia les chefs du païs font gloire du Christianisme, nous desirans dans leurs bourgades, ils recognoissent desia les torts qu'ils ont eu de nous persecuter avec si peu de raison. Ils ont desaduoié publiquement ce qu'ils auoient controuué du P. Antoine Daniel, si que toute l'assemblée agrea fort cette reparation d'honneur. Pour le faire court, nos nouueaux Chrestiens continuent dans leurs premiers sentimens, ils se confessent & communient avec la deuotion que nous pourrions souhaiter, ils redoublerent leur pieté les saincts iours de la Pentecoste, & de la feste Dieu.

Nous allons en fin transporter la residence de saint Ioseph qui est encores à Ihonattiria, en vne autre bourgade plus belle & plus grande. Elle est comme la capitale d'une nation qui est estroitement alliée avec celle des Ours, nos meilleurs amis. Nous vous enuoyons le R. Pierre Pijart, qui vous informera de tout plus en particulier, cōme aussi de tout ce qui nous touche. *Qua circa nos sunt, quid agamus, omnia vobis nota faciet si-*

en l'année 1637. & 38, 76

*delis minister in Domino, quem mittimus ad vos
in hoc ipsum, ut cognoscatis quæ circa nos sunt, &
consoletur corda vestra.* Nous nous recomman-
dons tous bien humblement aux Saints sacri-
fices & prieres de V. R. & de tous nos. P. P. &
F. F. & moy sur tout

De la Residence de la Conception

au pays des Hurons

Au bourg d'Offosane ce 9. Juin

1638.

Vostre tres - humble &
tres-obeïssant serui-
teur en N. Seigneur
FRANÇOIS IOSEPH
LE MERCIER.

Extrait du Privilege du Roy.

PAR Grace & Priuilege du Roy, il est permis à Sebastien Cramoisy, Marchād Libraire luré en l'Vniuersité de Paris, & Imprimeur ordinaire du Roy, Bourgeois de Paris, d'imprimer ou faire imprimer vn Liure intitulé, *Relatiō de ce qui s'est passé en la Nouvelle France en l'annee 1638. Enuoyee au R. P. Prouincial de la Compagnie de Iesus en la Prouince de France. Par le P. Paul le Ieu- nē de la mesme Compagnie, Superieur de la Resi- dence de Kébec: & cependant le temps & espace de dix annees consecutiues. Auec defences à tous Libraires & Imprimeurs d'imprimer, ou faire im- primer ledit Liure, sous pretexte de déguisement, ou changement qu'ils y pourroient faire, à peine de confiscation & l'amende portee par ledit Pri- uilege. Dōné à Paris le 14. iour de Decēbre 1638.*

Par le Roy en son Conseil.

DEMONCEAUX.

—

—


Permission du P. Prouincial.

—

NOVS ESTIENNE BINET, Prouincial de la Compagnie de Iesus en la Prouince de France, auons accordé pour l'aduenir au sieur Sebastien Cramoisy, Marchand Libraire, Imprimeur ordinaire du Roy, l'impression des Relations de la Nouvelle France. Faict à Paris le 26. Mars 1638.

ESTIENNE BINET.





EA638

L534r1





